

也。諸君子其以士論聞之。晉使若簇之舉幸甚。

大東野乘卷之十八終

大東野乘卷之十九

海東雜錄一

(未詳)

本朝 趙浚

平壤人。字子明。號松堂。版圖判書德裕之子。恭愍王末年。出按江原道。行到旌善郡。有滌蕩東溟知有日。居民拭目待澄清之句。識者知其有大志。佐我太祖爲開國功臣。官至領議政。諡文忠。○麗末權勢之家。競爲互市徵歛。民甚苦之。扶老携幼。渡江而西。願自今抑買者。一切禁止。痛繩以法。具抑買之貨。在民間未盡收者。宜令制括以充官用。時務書舊制。下王牌于諸倉庫宮司。必印以行信寶。今內豎獨署其名。非所以防奸也。自今凡內用。令都評議使供之。毋下王牌。○請令士大夫庶人。當忌日必祭。不許騎馬出行。對賓客。如居喪禮。○自事元以來。昇平日久。文恬武嬉。宿衛無人。至設護軍等官以代禁衛之任。而祖宗入衛之制。皆爲虛設。○國法。州

郡每歲計口籍民。故朝廷之徵兵調役。如指諸掌。近來此法一毀。守令不知其州之戶口。徵調之際。鄉吏欺蔽。富壯免而貧弱行。貧弱之戶不堪其苦而逃矣。貧弱逃則富壯之戶代受其役。不堪其苦。亦如貧弱逃矣。其任徵發者。憤吏之欺蔽。痛加酷刑。則吏亦不堪其苦而逃矣。鄉吏百姓流亡四散。州郡空虛者。此戶口不籍之流禍也。同上處九重則念吾民之不庇於風雨。御八珍則念吾民之不足於糟糠。服輕煖則念蚕婦之赤立。而法大禹之惡衣。臨宴享則念農夫之餓餒。而體隋文之一肉。同上寢園署禮文。與祭者不飲酒。不茹葷。凡四日。謂之散齋。或居於本司。齋明端坐。致其誠敬。凡三日。謂之致齋。今則諸執事自散齋。至致齋之日。各於其家。與婦人狎處。甚不敬也。自今一遵禮文。違者罪之。書上請上墳之禮。許從風俗。以每年三令節。寒食爲定規。以成追遠之風。違者以不孝論。○當農驅民。旬月弋獵。農失其業。民不足食。若夫鷄豚之畜。取之罕則不擾於民。請築鷄豚場二所。一令典廐署主之。以奉祭祀之用。一令司宰寺主之。以供賓客之需。

○國家自祖宗朝。衣冠禮樂。悉遵華制。迨至元朝。壓於時王之制。變華從戎。故上下不變。民志不定。○上書恭讓王。軍士與倭戰。而所得倭物。悉輸京都。以此軍士解體。自今破賊者。獻馘而已。軍士所得倭物。勿使推鞠。○京畿八縣。徭役甚煩。民不聊生。無所控告。上書請依各道置官。使開城府考績。以明黜陟。以革其弊。○按廉使秩卑。以五六品爲之。不能嚴於黜陟。賞罰。請擇遣兩府。有廉明勤幹者。許令臺諫薦舉。爲都按廉黜陟大使。以田野闢。戶口增。詞訟簡。賦役均。學校興。巡察州郡。而黜陟之。以號令嚴。器械精。兵卒鍊。屯田修。海寇息。巡臨方鎮。而賞罰之。俟依貼出。乃遣之。自元帥以下。皆郊迎。呈叅從之。後改稱都觀察黜陟使。○內外大小之官。除拜後。不即上官赴任。因致公事稽緩。奸吏容匿。浚上疏。遂定其赴任日限。○凡公私滋息。只一本一利。比來貨殖之徒。一本之利。或至十倍。貸假之徒。鬻妻賣子。終不能償。至於喪家失業。自今一本一利。毋得剩取。以爲恒式。○驛戶有知路指路之役。麗末驛戶凋廢。州郡代受其苦。浚上書以爲。欲

使州郡復業。先當恤驛戶。請於每驛置丞。令監司薦補。如守令例。以致蘇復。○國家置成造都監。使管一國材鐵之用。一木之曳。至斃十牛。一爐之冶。至廢十農。○以爲學校風化之原。欲得經明行修之士。以勤敏博學者爲教授。閑居儒業者爲教導。令學者常讀四書五經。不許讀詞章。誘掖獎勵。有成效者。擢以不次。○今之學者。以雕篆之學。幸中科第。取榮一身。從仕之後。盡棄其業。昧於施措。使自今取各年及第四品以下。對策庭中者。使掌製教。不中者左遷。○上書恭讓王。以爲近因兵興。學校廢弛。鄉愿之托儒名者。避軍役者。至五六月間。集童子讀唐宋絕句。至五十日乃罷。謂之夏課。雖欲經明行修之士。其可得乎。○敬之一字。帝王作聖之基。公之一字。帝王治政之本。○麗季其人之役。法久弊生。分隸各處。役之如奴隸。不堪其苦。至於逋亡。主司督徵闕布。稱貸於人。不能償之。直趨州縣。乃謂京中貸借。倍數督徵。州縣之凋廢。職此之由。浚上書請革其弊。○古法。百官謝牒。堂後官署之。近來詐僞日滋。故上將軍以下。軍簿司印之。奉翊以

下。典理司印之。乃防詐冒也。○司幕。即古之尙舍。而今之司設也。今司設廢其職而食其祿。司幕勤其事而不食祿。請改其舊制。從之。○吾東方家廟之法。廢弛。顧自今。一用朱子家禮。大夫以上祭三世。六品以上祭二世。七品以下至庶人。止祭其父母。擇淨室一間。各爲龕以藏其神主。以成追遠之風。○每一里。擇耆老有學者爲社長。依黨序之法。教導子弟。毋使子弟群戲。以長浮薄之風。○上書辛禍。以爲羅末田不均而賦稅重。一頃之租。收至民不聊生。太祖即位。用什一之法。以田一負。出租三升。遂放民間三年租。○食爲民天。穀由牛出。設禁殺都監。所以重農事也。上浚云。糾正職察百官。爲人主之耳目。凡祭祀朝會。至於錢穀出納。悉皆監檢。秩卑而任重。史麗辛禍時。禾尺等詐稱倭賊。相聚爲盜。焚檢公廨。浚上書云。禾尺之徒。不事耕種。坐食民租。相聚山谷。無恒產無恒心。其勢可畏。自今課其生口。授以曠地。與平民同其里。違者罪之。禾尺一號楊水尺。上李仁任死。國人聞之皆喜曰。人不能誅。天乃殛之。浚曰。仁任罪盈惡積。幸天殛之。

請削官爵。以懲為惡之人。上同李子松見殺。浚上書以為。子松廉謹守節。死非其罪。國人惜之。請賜誄諡。厚恤其家。上同恭靖初。臺省上疏。請罷私兵。門下府事。李居易聽。趙浚之言。不即納牌字記。後浚被鞫。魄喪魂迷。不得一言。直視而已。上同上書以為。軍政多門。則號令不肅。每一道只遣一節制。餘皆罷去。上同司僕。掌乘輿之馬。而別立內乘。內豎之徒。專擅其職。其收芻藁也。刼奪萬端。轉輸入城。農牛瘡仆。破殘畿縣。毒流諸郡。自今畿內芻藁。計馬定數。分月而供。以除民弊。時務書壬申七月。我太祖即位。即夕召趙浚曰。卿知漢文帝入自代邸。夜拜宋昌為衛將軍。鎮撫南北軍之意乎。因賜都摠使銀印。畫角形弓。五道。皆委摠之。寶鑑國初趙浚等。始置濟生院。哀集諸方。又聚東人經驗者。名曰鄉藥濟生集。頒諸中外。陽村有跋選。趙浚嘗於。上前。乍泣。乍哀。外示遷善之狀。內要寬罪之計。此乃偽悔也。金陽震論浚書浚若不經意於詩。為詩橫放傑出。為大人之氣像。嘗題百祥樓詩。薩水湯湯漾碧虛。隋兵百萬化為魚。至今留得漁樵話。未滿征夫一晒餘。盖有譏

隋唐之意。造語奇特。詩話雪梅妓名。善唱樂詞。趙浚初入相。諸國老宴西郊。以慰。酒未半。命召赴闕。諸老共進一爵。令雪梅唱歌詞。乃唱西園未罷。看花會。又被宣招宴。上陽之句。一座嘉嘆。後河崙巡察西鄙。設帳都門外。簪纓滿座。雪梅又唱勸君更進一杯酒。西出陽關無故人之句。一座稱嘆不已。上同自幼有大志。一日母吳氏見新及第人綴行呵喝。嘆曰。吾子雖多。未有登第者。何用哉。浚跪泣稱天誓曰。予所不第者。有如天。自是勤學。遂登第。列傳自幼倜儻。在壽德宮。望見浚書過宮前。即命屬寶馬。陪指諭。列傳浚嘗知製教。撰祈讓疏云。踈正直忠信之人。狎諂倭讒邪之人。知申事。金濤曰。正直忠信。而踈者何人。諂倭讒邪。而狎者何人。則何以對。即令浚改撰。全平壤伯趙浚卒。我太宗聞訃。慟哭。素饌輟朝。親臨殯次。吊慰。寶鑑趙須

字享父。號松月堂。又曰晚翠亭。我太宗朝登第。官至成均司藝。博極群書。必讀百篇。中遭家禍。禁錮三十餘年。我英廟惜其才。晚乃進用。臨卒

焚其稿。○趙須有能詩聲。一日英廟使內豎賚一簇子。求題詩其上。須奮筆一揮。詞旨兼美。且吟且卷曰。老子書法。正如乳虎爬。即還之。其坦率如此。劇談博極群書。尤長於詩學。我英廟命集賢殿諸儒。輪日往復質問。應對如響。人皆服其該博。筆苑晚翠堂無書不讀。尤精於韓文。人有受業者。公不授書秩。合眠低頭。口誦教之。全上嘗曰。聰明不如多讀。余於群書。必讀百遍。是以雖老亦不忘。同韓斯文閨。請堂名於晚翠堂。趙先生。先生扁曰三畏。韓問曰。先生亦有三畏乎。先生曰。吾有三不畏。有錢沽酒。酒盡則醉。醉則長臥。臥必鼻雷。不畏霹靂。一也。冬裘夏葛。朝饘夕粥。盜無餘糧。篋無餘衣。不畏盜賊。二也。十年游宦。進寸退尺。浮雲富貴。脫屣功名。不畏卿相。三也。閑話流落三十餘年。乃大肆力於學。無書不讀。有能詩聲。一日匪懈堂以李白集遺之。以手撫腹不受曰。此腹中有太白全集。劇談

趙晤

橫城人。我英廟朝登第。官至藝文館提學。性廉介。清節無比。○嘗倅陝

川郡。產銀魚。夏月雖至腐敗。不許妻子。嘗子壻奴僕往來者。皆賚私種。官名天性廉謹。後退老村庄。室如懸磬。無絲毫干請於人。真篤信君子也。筆苑家至貧。嘗為禮郎。避方賃。桂玉不繼。同僚以白粒三斗問之。不受。後於公座誇之。人或譏其作者。全上

趙元紀

漢陽人。字理之。燕山朝登第。幼不好弄。氣像安重。為人清白。雖居宰相。庖厨所儲。不過鹽菜。有饋遺。不合義必辭之。官至吏曹判書。謚文節。○高麗摠管良琪之後。漢川府院年九歲。嘗着戲。其父吏郎衷孫見之。私語其婦曰。吾兒已學無益之事。將何以成立乎。公聞之。即涕泣告父母曰。吾偶然學之。若害于身。豈敢學之以貽父母憂乎。誓不復為。平生遂不着。有清白節。弊廬短堵。僅庇風雨。人視之不堪。而公樂之不厭也。○嘗與甥姪洪議政子美。趙大憲孝直書曰。美之投閑。真男兒事也。直之被薦。真稀世事而誠可賀也。唯叟之無咎無譽。足自安保。雖無可謂之榮與賀。

矣。其所以終至於無憂。則信可樂也。直之被薦。喜與憂并。薦在我用在天。夫人特盡其在我者爾。盛名之下。其實難副。夫既有譽之者。則毀之者又從而擠之。此古今通患也。若危言狂驕。害已敗身之戒。則吾於孝直不當警也。凡人群居天地中。不可以高飛遠走。則必須小同於俗。庶免爲衆所嫉。昔杜祁嘗戒門人曰。切當韜晦。毀方瓦合。無露圭角。不然無益於事。而祇足取禍爾。今之時與杜之時。又加邈矣。而世路險巇。又萬倍焉。則吾之所戒。豈無所見而然耶。去秋四館之議。亦其一驗也。當其時一二君子。沮而抑之。則其能無屈於砭者之鋒耶。吾家勢自先祖。以廉謹自守。計不求足。而兄又早逝。汝之兄弟三人。俱業儒未成。寡妹偪側。言可寒心。吾自甲子亂離來。家業幾盡。雖復見天日。殆不能還成家業。今則轉轉僑寓。邈在萬里。無意家事。辛勤萬狀。未易殫記。仕不爲貧。而有時爲貧。爲貧之仕。豈今也其時乎。以家貧親老。比不能專業。則爲有間矣。况前聖以爵祿之辭。比於蹈白刃。凡人之樂於好事者。安知不以此爲矯情之誚耶。此吾所憂。

也。然則是舉非喜也。乃所以憂之也。唯無咎無譽。真所謂保身之道也。昔馬伏波在交趾。爲書以戒其兄子。吾之所以使汝曹欲不失令名成家業。全門戶之意。則不始不同於馬將軍也。其先見之明如此。己卯爲開城留守。官至判書。卒年七十七。己卯居官必先周娣妹。以及門黨之孤寡。如也。其陞嘉善資憲。皆以清白褒之也。

趙末生

漢陽人。魁建文辛卯科。典文衡。官至領中樞府事。諡文剛。○兵判趙末生。右議政趙涓。府院君延嗣宗等。受人相訟奴婢。暗爲致力得決。憲府按覈得情。末生等並中道付處。雜記

趙廣臨

漢陽人。字興叔。漢川府院君涓之玄孫。母李氏夢日而生。我成廟季登第。天性醇靜。游心學問。一室圖書。家貧晏如也。以承文院正字早歿。人皆惜之。○廣臨常一室危坐。貼聖賢之訓於四壁。以自省。濯纓集生海隅一千

載不得尼叟。生癸未死甲寅。三十有二。顏之壽。圭首之碣兮。安能使爾以不朽。全上

趙廣輔

漢陽人。識見高明。佯狂自晦。隱不仕。燕山朝任士弘用事。一日憤謂朴松堂曰。汝武夫。何不斬殺此奴。不殺則吾當殺汝。松堂曰。斬一賊固所甘心。後史書之曰。盜殺之則奈何。廣輔笑之。

趙光祖

漢陽人。字孝直。號靜菴。生有美質。不屑科舉之文。聞寒暄先生。學有淵源。往從之。得聞爲學大方。乙亥以孝廉薦拜司紙。是年秋登乙科。四年間超拜大司憲。以興起斯文。堯舜君民爲己任。及神武變起。館學諸生守闕號哭者千百。竟謫于綾城。賜死後。特贈領議政。諡文正。○先生篤信小學。尊尙近思。而發揮於諸經傳。行狀先生丁母憂廬墓。常坐必對墳塋。奠哭之暇。循繞展省。冽寒暑雨。未或廢止。服闋。猶抱切切之哀。乃卜塋側。構草堂數

間。爲永慕之所。又於其傍。引溪開塘。築堦爲圃。種蓮栢。常游息於斯。蓋平生雅賞之懷也。○鸞停而鳳峙。玉潤而金精。如猗蘭播芬。皓月揚輝。○嘗入天磨龍門山。講習之暇。兀坐終晷。潛心對越。堅苦刻厲。人所莫及。○進則日有三接。退則人爭手額。斯可謂上下交欣。千載一時。○先生坐則危跪。手必交執臂肱。故所服之衣。當臂膝處先弊。○一不幸登第大驟。二不幸而求退未遂。三不幸而謫日斯終。○每入對。必齋心肅慮。如對神明。知無不言。言無不讜。○每日鷄鳴。盥櫛仰思。必期自得。未嘗以未得自畫。○先生編管綾城。及命至。沐浴冠帶。顏色不變。從容就死。略無怨尤。其言曰。愛君如愛父。憂國如憂家。又曰。白日臨下士。昭昭照丹衷。全上先生承命製進戒心箴云。天理晦暝。則氣亦否屯。彛倫敦而萬物不遂。戒心箴先生於經筵進啓曰。士大夫家。儉約自持。則子孫長久而不敗。遊宴自恣。則易至傾家破產。廢朝之末。士大夫耽樂奢靡。而社稷幾危。今之有識者。亦爲習俗所移。指儉約爲蕭條。以游宴爲大氣像。一言喪邦。此之謂也。儒先錄先生

云。外間有愛馬者。有愛花草者。有愛養鵝鴨者。若馳心於外物。則必至着泥。而終無以入道。是所謂玩物喪志也。○少事金宏弼。及其長也。自悟奮發。一時之人。頗多毀謗。或稱禍胎。朋友皆絕而不交。先生立志甚篤。不少撓屈。始以其學倡導後進。而感發者甚多。○先生著春賦自序云。春者天之元也。四時自春而始。四端自仁而發。無春序不成。無仁端不遂。天無欲而春行。四時成。人有欲而仁喪。端不充。故心窃自悲。以作賦。上全先生嘗登天磨聖居山。遇適處。緩步微吟。蕭然有出塵之想。碑序驟用無以融澈。早終無以立言。設教接引。因其材。稟品藻。取其器識。○嘗寓天磨山蓮社。兀若泥塑人。攻苦食淡。與禪共之。○已卯禍作。先生與諸公下禁府。先生責綾城。扶墻北望。以紓戀君之思。○每當進講前夕。端書熟讀。如在 上傍。至曉而進。肅然對越。冀必感動。○先生嘗開陳治道。自性情善惡義理之卞。天人王霸淑慝之分。莫不傾倒羅列。日昃忘倦。○以省身克己爲先。持敬主靜爲務。沉潛刻厲。精思力踐。○先生爲大憲。每賜對。必引論義理。縱橫

出入。不得措一辭於其間。雖隆寒盛暑。日午不止。所言無不允之事。同侍者苦之。皆有厭色。撫言而貢物則過多。以此民日困。經費之

用。量宜裁減。然後庶可以安民。經筵陳說體認古事。以某事爲可學。以某事爲

不可學。求以積累之功。則雖一講一張。所得亦多。不然則雖一講十張。只爲虛文。○父不知子。則子不免憂色。君不知臣。則臣不能盡忠。君臣父子大槩一也。○志大之人。雖未做經綸之業。當大節能不失其所守。譬之登山。期至山上者。雖不至頂。可至山腰。若期至山腰。則不離山底。而必止矣。○人君當辨君子小人。然辨小人至難。辨君子似易。先用其易知者。信任則雖有小人。自不能放恣。○利源一開。其害甚大。爲士者平時持論。雖似正直。若有事故。則手脚忙亂。利源是國家之病源。痛絕然後可以永保其休矣。○委質爲臣。則當盡忠事君。不計一身之禍患。然善人常少。不善者常多。故不能不計禍患。而若有事。則莫不驚疑畏縮。鮮有抗顏極諫者。○中人以下。爲善爲惡。隨時所尙。在上之人。其可不盡勸勵之道乎。不可以

士習不正歸罪於在下者也。○廢朝非宦寺煽亂也。大臣險諛。窺伺上意。逞其私忿。使成廟初年。推養士林。一網打盡。一無餘者。上同嘉靖壬午天旱。康翎縣有三人俱鋤禾。一人曰。旱勢如此。年必不稔。聞趙宰相光祖清簡。各道州群絕無折簡。以此村里無叫呼之吏。今聞被竄以死。天災恐由於此。其一人來京告之。即拿拷。竟被極典。一人坐同鋤不告之罪。告者受賞。言粹已卯趙靜庵諸公被竄。有黃李沃者。先作救疏。又與尹世貞李來等連名上疏請罪。靜菴終以此遭禍。蓋黃作疏。而舛以售其惡。其奸譎之狀。可勝道哉。雜記已卯秋。南袞與趙靜菴同在試圍。見成守琮試券。靜菴曰。非成其如此。此文藻不能作。乃得彙。及禍歸咎靜菴。以文理不屬。容私試取。見削於榜目。錄本已卯十月。左相申用漑卒。上欲依禮舉哀。大臣議以爲重難。不果行之。後趙光祖入對。啓曰。臣聞柳寬之卒也。世宗哭聲徹於外。至今聞者莫不悚動。前日下教之意甚美。而大臣乃以爲別殿可爲云。其不能將順甚矣。世宗柳寬柳廷顯之卒也。禁川橋外。設幄次行之。雜記

己卯十月。大司憲趙光祖等合司伏閣。論丙寅反正時。多有無功而濫錄者。請削去猥濫者。副提學金綵等合司上筭。大臣六卿亦啓之。上不從。兩司至於辭職。上引見諭以重難之意。趙光祖極諫不可不從之意。上意允。抄削二三等之濫錄者。及四等全數。及光祖等敗。還仍不削。上全太學生朴謹等上疏。極論趙光祖學術之正。先王爲群小所誣。請還給職牒。以正士子趨向。仁廟甚加嘉獎。廷臣亦有言者。而慎重不敢遽施。蓋有待也。六月末。及大漸。傳于大臣曰。光祖等復職及復賢良科事。予謂先王時事。可從容爲之。今予病如此。其復光祖等職及賢良科。上全趙光祖初謫綾城。俄賜死。故事。凡賜死宰相。不有御寶文字。只奉王旨施行。金吾郎到竄所。宜旨。公以爲國家待大臣。不可如是草草。其弊將使奸人得以擅殺所惡者。欲疏陳一言。而竟不果。沐浴衣冠。出跪庭中。問上體若何。次問三公六卿姓名。都事柳滄有迫促之意。公歔歔嘆曰。古人有抱詔書伏哭傳舍者。何其異耶。又曰。愛君如愛父。天日照丹衷。遂仰藥。覆衾

而未絕。遂縊之。言野先生生成化壬寅。天分甚異。自少慷慨有大志。博學力行。年二十九。中進士壯元。中廟乙亥。吏曹判書安塘啓曰。趙光祖明經術。有行義。所當擢用。若拘資格。例調叅奉。則不足以勸勵士林。請除六品職。上允之。即授司紙。是年秋。謁聖別試。登乙科第一人。及拜正言。彈臺諫權敏手李荇等。自防言路之失。丁丑。由修撰校理應教。拜典翰。辭曰。小臣有志於學問。而不能實用其力。乞補僻邑。治民之暇。致意於學術。治民治學。庶乎兩全。而小臣未成人也。一朝蒙不測之恩。豈可冒居其地乎。不允。戊寅正月。陞副提學。五月。移同副丞旨。右丞旨金淨啓曰。趙光祖在經幄。補益弘多。丞旨喉舌之地。固當擇任。亦可入侍論難矣。然不若專主其任也。居數日。還拜副提學。每入對。或至日昃。上皆虛心傾悚而上會寧城底野人速古乃。潛與深處野人等。入甲山府界。多檢人畜。南道兵使密啓。上命招三公該曹議之。先諭密旨于本道。又送兵甲器械。命李之芳特賜御衣弓矢。即日拜辭。上御宣政殿餞宴。丞旨金正國啓曰。

副提學趙光祖請入對。即允之。公進曰。此正類盜賊狙譎之謀。且以堂堂大朝。爲一么麼醜虜。行盜賊之謀。臣竊恥之。上却衆議。罷遣。公以三品之官。能以片言感動。上意以正朝廷大議。人皆側目。上正德戊寅。臺諫請革昭格署。弘文館亦逐日論啓。皆不允。一日。公自製笥。謂同僚曰。今日未蒙允。不可退。日暮。臺諫皆退。玉堂仍論啓。至鷄鳴不止。上不得已允之。承旨等倚案熟睡。皆懷厭苦。上己卯五月。公復爲大司憲。啓曰。國家修舉之事。皆先朝所未遑也。他日小人若假紹述之說而中之。則善類殆矣。近來祭魯山復昭陵。皆志士欲行而未得者。而至於聖世。建白行之。且慎氏復立之議。金淨朴祥。至於上疏。亦是正論。而其時議者欲置之大罪。此等事皆小人之藉口。而士林之禍根也。其交結往來者。所以講論修己治人事君事親之道。自古正直之流。盛行於世。則必有大禍隨其後。今之朋友交遊講學。豈無其人。閭閻之間。皆以爲大禍必生於朝夕。蓋懲於前者深矣。上嘗於晝講。丞旨朴世熹啓曰。趙光祖少師金宏弼。潛心

道學。時人毀謗。或稱狂者。或云禍胎。朋友絕交。而至於反正之初。始以其學倡導後生。如臣之發開。皆由於此人。上全臺諫請削靖國功臣之濫授者。命收廷議。南袞以禮曹判書欲避其議。求爲拜陵獻官。其後公入侍啓。曰。近有崇品六卿爲陵獻官。其人必謀避事。人臣愛身如此。餘無足觀。袞方同侍。慚惶而退。上全南袞沈貞不爲清流所容。因公知遇。小民稱善。欲藉此網打。使洪景舟寅緣椒掖。以人心悉歸趙氏。以撓上志。又以不經識文。假作於禁苑花木葉書。以走肖爲王四字。以此恐動之。以公爲罪魁。幸賴鄭相光弼涕泣牽裾。小霽雷霆之威。及其下獄。香徒之人環守宮城。館學之士號哭闕庭。由是上惑滋甚。供曰。士生於世。所恃者君心而已。頓無他意。初擬死律。乃杖配綾城。俄而賜死于謫。即十二月二十日也。時年三十八。是日白虹繞日。東西各二匝。南北各一匝。南北繞外各有二條虹。如垂紳者竟天。又於未申方。別有一條虹長丈餘。皆移時乃滅。明年歸葬于龍仁先塋之兆。乃遺志也。子定年五歲。容年二歲。定早卒。容仕至文川

郡守。無子。以從姪舜男爲後。綾城人作書院以祀之。賜額曰竹樹書院。且賜書籍以獎之。楊州牧使南彥經。又作書院于道峰山下。鄉人又作書院於龍仁墓下。宣廟即位二年。太學生洪仁憲等上疏。請配享文廟。兩司及領相李浚慶相繼啓請。玉堂上筭。請贈大官美諡。於是命贈領議政。諡文正。萬曆辛亥。從祀文廟。已卯錄趙夫子居家行己。不愧古人。爲學篤實。危坐積熟。衣冠必端正。自朝而暮。自初昏而三更。兀然不動。清曉早起盥櫛。雖夏熱短宵不少變。想其學問不及程亦不遠。但設施粗遽。至不幸。當時之事。可忍言哉。洪恥齋日錄

趙之瑞

林川人。字伯符。號知足亭。我成廟朝登第。又魁重試。性訐直。燕山在東宮時。爲侍講院輔德。至甲子被殺。○世居山陰。性鯁直。燕山在東宮時。日事遊戲。全不留心學問。之瑞爲輔德。每進講投册於前曰。邸下不力學。臣當啓達。燕山甚苦之。許文貞琛爲弼善。柔辭宛然。從容開悟。燕山甚許之。

一日燕山大書壁間曰。趙之瑞大小人也。許琛大聖人也。聞者為趙甚危。及甲子禍起。燕山先誅之。沒其家。許琛位至首相。○禍作。與鄭誠謹同時被拿。之瑞自度未免。與妻鄭氏飲訣曰。吾之此行。必不能返。奈祖父神主何。鄭氏泣曰。當以死自保。之瑞見殺。籍沒其家。鄭氏即忠義伯夢周之曾孫。其父曰。家已敗矣。盍歸本家以觀其終。鄭氏以節絕之曰。亡人托我祖父神主。妾許之。豈宜中負。且亡人之妾。別有茅舍。可以往依。遂抱神主詣其家。朝夕哭泣致祭。如聞中使到境。即抱神主伏於舍後竹林。或至數日。以終三年。反正之後。遂復舊家。奉祀事如常。一邑稱之。時李堦為晉州牧使。審悉其然。故嘗為特進官。啓聞。立旌其門。有是哉。以忠義伯之後。來配伯符。矢死不貳。以全婦道。不係世累。雖曰高矣。源清之流。表正之影。豈無所關哉。粹言

洪逸童

南陽人。字日休。號麻川子。氣宇卓犖。善詞賦。又能飲。我英廟朝登第。官

至同中樞府事。逸童性任天真。不修邊幅。獨撫古琴。有絃無譜。嘗曰。吾之琴。得淵明千載不傳之趣。淵明不生。無知者。筆嘗於 上前論佛事。光廟佯怒曰。當殺此虜以謝佛氏。命左右取釵來。逸童論辨自若。左右以釵撫項者再。亦不顧視。無懼色。上壯之曰。汝畏死乎。逸童曰。當死則死。當生則生。豈敢以死生易其心乎。上嘉賜貂裘一領以慰之。全洪逸童劇飲無何。醉則用草葉作吹笛聲。悲壯震厲。全一日劇飲。尋卒。人疑其爛腹。有志不施。位不滿能。惜哉。全效八音體。以金石絲竹匏土革木八字。為詩一篇。寄徐剛仲云。金多令人貴。無詩令人俗。石頑固不害。桂香終見伐。絲染不須悲。歧多何必泣。竹看君子操。松變歲寒骨。匏飲信可樂。窩室聊自適。土床冬暖足。華牖夏散髮。革帶任男頑。縑衣置妾惡。木草與同腐。一生何役役。選

洪貴達

義興岳溪縣人。字兼善。號涵虛亭。一日虛白亭。我光廟朝登第。官至左

叅贊燕山朝被罪謫慶源卒于謫所文章雅健典古允典文衡謚文匡○
爲江原監司時遊三日浦序云自古神仙不死或變名易形復遊於千載
之後而人不知者永耶徒安知今日不在座中耶詩云昔聞三日浦今上
四仙亭水拍白銀盤山圍蒼玉屏天空彩雲濕石老秋光清仙人去已遠
古亭今無楹當時遊戲處雲外笙簫聲千載復吾人六字看猶明風高永
耶湖月出安商汀孤尊泊舟處此固云蓬瀛集本謫慶源登城南樓作詩云
去國一身投絕域高城五月上南樓乾坤納納存雙眼尊俎喧喧失百憂
賈生不用傷王傳子厚何須恨柳州底處江山非我有古今人世本來浮
集本爲江原監司瓜還過醴泉次客舍詩前村烟暝已藏鴉客舍沉沉夜不
譁深樹月明啼杜宇廣庭春盡落梨花衰容對鏡年年換病眼看書字字
斜夢裡溪山明日去門前流水是吾家上全

洪彥忠

義興岳溪縣人字直卿號寓菴文匡公之子燕山朝登第仕爲吏曹正郎

以詩鳴世又有氣節甲子被禍謫遠地自分必死作自挽詩稱文章勝於
其父○燕山追罪舊日言事之臣日拷鞫丹陛下洪直卿亦在囚中。人見
其衣血淋漓惻然指之曰慘矣哉直卿曰弘文館水所染蓋坐館中論列
而弘與紅字同音血色紅故云然鞫了還配僕又候之郊直卿曰平生爲
學之禍一至此哉頗有酸苦色僕戲曰若使子刮去智慧沉冥學識爲慳
慳然一物則子亦爲之乎直卿憮然曰惡流離顛沛中外或省記者學也
客路辛艱枵然垂橐人或繼給者學也竄伏海島神魂危悸除文墨無可
娛玩學之功大矣俾我心善惡口是非猜叢疾簇招禍于世者固是學也
又自得力加彼當其崇臻釁積受苦最毒顧吾學門而病之不啻若返我
顛蒙奪我知覺頑然徒哺餒而已惘然如自九天上墮下坑澗中雖有顛
沛吾安敢爲是哉往往拔起坑澗中掩取九天上之榮祿舉世皆然九天
上者之甚危非復坑澗中之可安且樂也然吾安敢以吾危而易彼安耶
反而思吾之有不啻如拱壁在身矣共哂然發一笑野言謫眞寶作自挽云

大明天地日先照國。男子姓洪名忠字直。半世迂拙。文字之攻。在廿卅有二年而終。卜居故縣茂林之鄉。命何云短。何何云長。青山在上。灣漪在下。萬歲千秋。誰過斯野。指點徘徊。其必有悵然者矣。錄本後李荇按本道。巡過墓下。作文以祭之。曰。八月初吉。日將西曛。荇來奠盃直卿之墳。日月幾何。梓木連雲。青山灣漪。正如君文。一哭而退。幽明之分。

洪允成

洪仁山允成登第未幾。佐我光廟靖難。享富貴三十餘年。聲勢輝赫。叢話允成酒量甚雄。一日我光廟宴群臣于內殿侍坐。上以傾海名其堂。謂公之飲酒甚多。不為困也。後奉表如京師。翰林陳鑑書傾海堂三字以與之。黃守身金何酒量與洪相敵。終日痛飲。一無醉色。我光廟贈號傾海堂。刻圖書賜之。有一士好飲。作詩投謁云。傾海主人傾海客。主人傾海客何辭。一時傳笑。苑筆洪仁山得寵於光廟。多受賞賜。兼務蓄積。輸運納第。晝夜不絕。大起甲第。臨池有堂。招聚名儒鉅士。無日不設宴。饌品豐腆。

絲竹嘹亮。日夜不絕。客畏威。無不引滿。必倒載還家。雖何曾萬錢之食。不能過也。粹言我光廟誅宗瑞之夕。先使訓練主簿洪允成記稟公事往覘之。宗瑞在內房偃枕。三妾在後。招允成使前。曰。聞汝有力云。吾有強弓試彎之。允成引彎。連折二張。宗瑞曰。樊噲不如也。雜記

洪應

南陽人。字應之。漢城尹深之子。我文廟朝擢壯元科。有文名。又善書。風標端雅。持身有律。叅翊戴佐理功臣。官至左議政。人以賢相稱之。諡忠貞。○許磐初以蔭調社稷叅奉。左相洪應為提調。說之曰。世子國之儲君。他日萬姓之所仰賴。今與宦寺居處。游玩狎昵之時多。請勿如是云云。友師

洪順福

字子綏。己卯禍作日。儒生上疏。公名在第三。以金大成弟子拷檢。供曰。頃者奸臣擁蔽天聰。構陷君子金湜等。忠信不欺之心。欲極言而死。卒不果。

欲尋見金湜共議除去奸臣。臺諫請置死律。臨刑係索再絕。顧謂刑官曰。君奉王命監刑。以朽索係頸死耶。顏色不變而死。己卯錄

洪彥弼

洪領相彥弼。律身儉素。不喜紛華。嘗遇初度。子弟欲以歌管佐酒。公曰。吾叨據崇高。恒懷戒慎。敢當聲妓之娛乎。服飾之侈美者亦却之。子婿官已通顯。每候門屏。悉除呵辟。○洪益城彥弼夫人。乃宋相軼之女也。益城與軼皆為首相。子暹亦為首相。夫人享年踰九耋。暹八十持服終制。夫人之壽福。古未有也。盧相守慎於暹。賜几杖宴席。作賀詩云。三從不出相門闈。此事於今始有之云云。宣廟優賜米豆。○子暹號忍齋。為吏曹佐郎。許沆蔡無擇等。方與金安老締結。沆等力圖安老之子金祺。薦銓郎。暹不從。語觸沆。沆構捏成獄。鞫于殿庭。杖配興陽。金吾郎狎行到公州。錦江杖瘡甚。鮮血模糊於衣裾。見者避之。時有科舉南方士子。駢闐上京。相值於津頭。有一士年最少。揚言於眾曰。吾聞洪暹乃士類。無罪杖流。必是小人當

國。吾輩安用應舉於此時。乃相與回鞭。暹在臥輿呻痛中。聞此言不覺心神洒然。徐問其姓名。乃林亨秀也。雜記

洪仁佑

字應吉。號恥齋。嘗遊關東。有錄。退溪先生跋其後。恥齋歿後十餘年。先生遇其游山時同行僧人。書贈曰。余友洪上舍應吉。求道甚切。不幸遇喪。過毀滅性。痛哉。應吉曾示余以遊金剛山錄。余為之叙題。今不能記。東歸舡上。偶逢一僧。乃所與導遊山者。能言當日探歷事。余感涕久之。聊以一詩見情云。楓岳久聞天下勝。洪君可惜後來賢。盪胸曾喜憑遊錄。隔世今嗟遇伴僧。只為相從同學道。非緣長往獨求仙。冷烟風雨驪江上。回首平生思惘然。本錄眷眷孝友之實。懇懇樂善之誠。燁燁才華之美。孳孳學問之明。

退溪先生祭文

洪裕孫

南陽人。字餘慶。號篠叢。又稱狂真子。世家清貧。放達不檢。嘗謁佔畢齋受

業爲人文如漆園。詩涉山谷。材挾孔明。行如曼倩。雪岳嶺上石間。有八分書一絕云。生先檀帝戊辰歲。眼及箕王號馬韓。曾與永郎遊水府。又牽春酒滯人間。讀之令人有出塵之想。洪餘慶聞南秋江遊嶺東。預爲此詩以待之。餘慶亦物外士也。錄丙丁性放達不檢。又家世清貧。僅裹身體。或不裙而行。師友錄嗚呼公之違世。無乃惡夫人詐。然知死之逾生。縱萬世其尙乍。祭梅月堂文

洪瀚

南陽人。我成廟朝登第。官至叅議。性剛直少許可。爲權貴所忤。戊午禍起。遂見陷杖流。道卒。我中廟命贈吏叅判。

崔茂宣

永州人。性通敏。且曉華語。使家僮私習元人焯焯之法。置火燭。與沈德符擊倭。燒倭舡三十餘艘。封永城君。入本朝。官至叅贊門下府事。○崔茂宣患倭陸梁。思水戰火攻之策。求焯焯煎用之術。建白于朝。始置火燭。火藥

庫記與元焯焯匠李亢同閑。竊問其術。使家僮數人私習試之。建白于朝。始置火燭都監。麗史

崔潤德

通川人。字白修。襄莊公雲海之子。以武藝進。爲世名將。我英廟朝征野人。全師以還。古議政。諡貞烈。配享廟庭。○嘗判安州牧使。公務之暇。治廳後隙地。種瓜。手自鋤之。村民不知爲公。問曰。相公今在某所。公給曰。在某所。入而改服。出廳決。劇談判安州時。有一村婦。泣曰。虎殺妾夫。曰。吾爲汝報仇。乃跡虎手射殺之。剖其腹。取其骨肉支節。裹以衣服。備棺槨埋之。其婦感泣不已。上同我太祖幸海州講武。潤德扈駕而從。一日。上欲徑渡巨川。潤德啓曰。臣請先試水之淺深。乃乘馬直入水中。控轡縮頸。佯側其身。水及鞍韉。即還出啓曰。水深不可渡也。何乃欲涉此水耶。殆非道而不徑舟而不浮之意也。上嘉納而止。行狀崔貞烈出將入相。位至台司。嘗於居第南鑿雙池。種藕其中。又植花木嘉卉於其旁。號曰雙池。每於公退之暇。

引耆老置酒談笑於其間。蕭然有山野之趣。上全崔貞烈率征婆猪江野人。將渡江直衝賊藪。有獐四隻突入營中。軍士射殺之。人頗恠之。公曰。吾聞武王伐紂。師渡孟津。白魚入于王舟。人曰。白商色也。今入于王舟。乃商人歸周之徵也。獐乃野獸也。今而自來。實野人見虜之兆也。因進兵搗其窟穴。勢如破竹。遂大捷而還。上全嘗鎮安州。種柳數萬株于州治之南。可以藏州基而捍水災也。公歸之後。人思其德。愛其柳。遂為鄉約。敢有伐其條者。禁罰之。其約至於數世而不替。人以甘棠比之。上全嘗鎮鏡城。胡人等畏服。相戒曰。勇將在鎮之時。不可近塞。待其還朝。當復舊居。遂相率而遠去。上全承命征野人。進兵婆猪江。會天大雨。人馬雨濕飢困。公仰天大號曰。惟茲野人。殺害我生靈。今天恕彼有罪。困我無辜。嗚呼皇天寧不我矜。言訖沾襟。須臾雨止。令諸將分道而進。遂大破之。上全自少英偉不群。父襄莊公以事流北青。公時年二十一。棄官而歸。親負石作塊。採薪爇之。娛待之餘。日漁獵以資甘旨。夜則於門外假寐。承候安否。終始不怠。上同嘗守泰安郡。所

佩矢服粧鐵壤。工以官鐵補之。公聞之。即命工還解所補鐵。其清介類如此。上同自早歲久在軍旅之中。逼冒寒暑。因致勞傷。遂成痢疾而卒。上同崔貞烈生而母卒。養于同鄰楊水尺家。稍長。膂力絕人。隨水尺出獵山中。有大虫。瞥出林莽。公一箭斃之。來報水尺。往視之。乃大虎也。上同筆

崔恒

朔寧人。字貞父。號大虛亭。我英廟朝擢壯元。又捷重試。叅靖難佐翼功。官至領議政。工四六。久典文衡。一時表箋皆出其手。謚文靖。○崔恒應製詩云。大地窮炎蕩。二精尺天雷鼓。但轟轟言二芳之變。一國臣民皆被河崙陷害。我康獻雖有開土之功。遠于一方。徒增憤鬱。上天雖有雲雷之大張。但轟片天之碌碌。誰能動念。誰肯警畏乎。上同雜錄我世祖命製十二駿贊。崔恒製進。潛龍時所御馬。自。上書示群臣。命作圖。一曰靖世驃。

二曰流霞驃。飛霞乍流。汚血尙新。于葦于釜。命中孔神。三曰梨花驃。輕雲點漢。梨花散風。鏞不虛鳴。一策

衡從。四曰玉英虬。英英凌雲。矯矯挈空。日行千里。時乘六龍。五曰凌空鶴。天駟之精。雲鵠其姿。王方逐鹿。衆服其奇。六曰逐風駒。天與之逸。風亦可逐。筭沒寶藏。名高于岳。七曰籥雲螭。狀侔青螭。足籥碧雲。惟龍之傑。矯迅不群。八曰騰霧豹。玄霧依霏。赤豹騰陵。山岩麗龜。驍雄莫稱。九曰軼驚鴻。紫燕凌風。赭珠噴空。朝燕暮越。影軼驚鴻。十曰翼飛龍。雋絕飛黃。奇超赭白。灤河之絲。神龍是翼。十一曰戴房麟。神維月毓。秀乃星鍾。振鬣天衢。冀北群空。十二曰照夜聰。霜輝照夜。虹彩燭霄。翰如飛如。所向無遠。崔寧城嘗與人言。先示退捐。不自表襮。又不立崖岸。墓誌爲文章。不襲古人吟哇。白出機杼。雄豪富贍。筆苑金翰林係熙。棄官歸養于金海。崔恒以詩送之曰。銀海幾寒金海望。青雲難奪白雲思。詩話古人云。天下無無對之句。薛司藝緯忤執政遞職。有句云。怒於甲者移於乙。用則行之。舍則藏。徐達城頃在春坊。聯句云。治國其猶示諸掌。崔文靖對曰。存人者莫良於眸。信乎天下無無對之句。全上古之詩人。托物取况。語多精切。如崔文靖黑豆詩曰。白眼似

嫌憎客意。柴身還有報仇心。以文人烈士比黑豆。用事奇特。同文靖平居雖隆寒盛暑。終日整冠。畧無惰容。同誌聰明絕世。詞源逸發。大爲儕輩所推服。同權止齋每見崔文靖著述。嘆曰。吾東方文章。氣習頽靡。能發揚振起者。必此人也。誌序端午日。在太虛亭。小雨洒庭。攤飯黑恬之餘。和作十六韻律詩。戒二子令書紳。本集國朝琉球國。來獻鸚鵡。崔恒進獻鸚鵡賀箋。選我世祖嘗嘆。東方學者。語音不正。句讀不明。雖有權近。鄭夢周口訣。紕繆尚多。遂命老臣宿儒。分授四書五經。考古證今。叅定口訣。又會文儒。講會異同。上親加睿裁。崔恒常在左右。毫分縷析。應對如響。上聽之不厭。語左右曰。寧城真天才也。筆苑

崔德之

全州人。自號存養堂。我太宗朝登第。累典州郡。皆有聲績。世宗朝。官至集賢殿直提學。有詩名。文廟末年。棄官退老靈岩。一時名士皆餞之。成三問以詩贈之曰。歸田非隱計。出處正如斯。漢主思疏廣。唐宗重戮孔。

江山如有待。猿鳥亦相知。終始能全義。如公我所師。本錄守益山。行己儉約。處事詳明。名宦錄

崔敬止

全州人。字和甫。我光廟朝擢壯元。有才名氣槩。官至弘文館副提學。有狎鷗亭題詩一絕。語甚警云。三接慇懃寵渥優。有亭無計得來遊。胸中政有機心靜。宦海前頭可狎鷗。韓明澮惡之。不列懸板。出明澮傳

崔淑精

陽川人。字國華。號逍遙亭。我光廟朝登第。又擢重試拔英試。官至副提學。詩文絕倫。有集行于世。○又見一年春事歇。玉人猶唱滿庭芳。○水國寒潮漁店暮。天涯斜日海門秋。○深鎖洞門閑讀易。此時方覺寸心惺。道遙

亭與

崔致雲

江陵人。字我。太宗朝登第。官至叅判。以事朝京師。蒙允受勅而來。

論功賜田結奴婢。固辭不受。性嗜酒。竟以酒纔過四十而卒。○性嗜酒。我

英廟患焉。嘗賜御札以戒之。公遂以札粘之壁之左右。出入觀省。或

出外轟飲。大醉還家。夫人指壁而示之。公於昏醉中。搶頭於床頭。頓首謝

罪。瑣錄

崔應賢

江陵人。字寶臣。號睡翁。叅判致雲之子。我光廟朝登第。官至刑曹叅判。嘗出尹鷄林。有詩云。塵間榮辱幾番春。案牘堆邊白髮新。半夜慣成林下計。明朝又作未歸人。

崔婁伯

婁伯父尚翥。出獵爲虎所害。婁伯曰。父讎不可不報。即荷斧跡虎。直前叱曰。既食我父。吾當食汝。虎乃掉尾俛伏。遽斫而刳其腹。取父骨安於器。盛虎骨於瓮埋川中。遂廬墓側假寐。其父來詠詩曰。披榛到孝子廬。情多感淚無窮。負土日加塚上。知心明月清風。生則養死則守。誰謂孝無終始。及

服闋取虎肉食之。行實

崔山斗

字景仰。自號新齋。燕山甲子生員。癸酉及第。所製綱目賦。膾炙人口。世居光陽。與尹衢柳成春齊名。人稱湖南三傑。公先登第。選入玉堂。族親皆以軍保成列鎮。公奉使歸鄉。必求酒肴。親詣所寓營廨。俯伏酬酢。不敢以榮貴凌宗族。以舍人謫同福。居蘿菴山下。寄尹衢詩曰。江路尋春晚。思君步月時。年年山澗曲。隨分有生涯。嘗聞本縣司馬所讌集。先往焉。諸司馬未會。取其酒盡飲而歸。守者恐獲罪。公摘取柿葉題詩曰。桑椹青紅柿葉肥。小園風物屬芳菲。欲知司馬樽中盡。看先生醉後歸。

崔漢公

金山人。字台甫。天順己卯春。與諸友生同赴鄉試。馬上忽夢垂楊裊裊。鞞于馬首。覺而異之。說與同行。友生日。垂楊之狀。正似青蓋。汝夢奇甚。吾當買之。崔先生曰。吉兆已定。何可賣得。遂捷鄉圍。果登第。瑣錄

崔裕

進士崔裕題桃源驛云。避秦三四家。仍作桃源驛。自言延送勞。却勝長城役。有風騷諷諭之意。當時以為警策。裕十上不第。以布衣終老。今觀崔詩。語意自苦。無和裕將大之氣。補閑

崔倬

凡詩或無意而作。或有時而識者。若先自識不可。崔上舍倬。卓犖不群。嘗作詩云。春軒之後菊軒翁。壽到希年兩頰紅。一事只應方寸愧。謾將檇櫟位三公。或問曰。是何詩。曰。我享壽七十。位至三公。當如是作。元日訪河壯元。緯地作詩云。今日訪君應有意。欲將詩句換龍頭。仍語人曰。此倬他日壯元之讖。倬竟不登第。不得一級。早歿。詩可先意於讖乎。詩話

崔壽城

江陵人。字可鎮。號猿亭。磊落不羈。無意於遊宦。能詩能琴。真絕代奇才也。冲菴常愛其詩。以為垂名不朽。及己卯禍起。嘗勸其叔父世節退休。南袞

聞而怒。鞠殺之。○自少逃世遠遊。善詩善畫。為族人構陷。非罪竟被法。平日從遊李連亨輩。以簾斂屍。權厝空谷。夜守其側。猿亭來吟一絕云。玄室誰相問。清猿獨可親。自從簾谷後。遙憶蓋骸人。錄丙丁年十九。逃世遠遊。遍觀名山水。到處剖松作琴。彈罷棄去。未嘗留駐。作詩飄逸。且善書畫。南袞嘗以山水圖一幅。寄冲菴求題詩。公訪冲菴適見之。遂題其上曰。落日下西山。孤烟生遠樹。幅巾三四人。誰是輞川主。袞見而銜之。金老泉與孝直元冲大柔會語。公自外至。長立不拜。急呼老泉。可飲我一盃酒。即與之。快飲浮白曰。吾棄敗舡幾溺。心甚怖悸。令飲酒釋然也。亦不辭徑去。座中恠之。孝直曰。敗舡之喻。指吾輩也。顧諸君不知耳。公嘗語其叔父世節曰。世事如此。強仕何求。不如穩臥湖山。以保餘年。辛巳冬。世節為丞旨。謂同僚曰。壽城勸我退休。欲去不能。忌公者言於袞。袞為祀連獄推官。請並推公。供曰。士林不和。恐生禍朝廷。故語叔令辭官退休而已。遂誅之。錄己卯猿亭磊落不羈。時俗尚大袖。其制甚濶。公令縫造窄袖衣。僅容一臂。蓋無人世

宦遊之意。務異於衆。以玩一世。釋官雜記世節為丞旨。猿亭在鄉。感慨時事。勸乞外任。世節以其言上告。竟置極典。同上

崔溥

羅州人。字淵淵。自號錦南。我成廟朝再登第。學問該博。英傑不羈。為弘文校理。奉使濟州。漂至浙江寧波府定海縣。乃生還。燕山戊午禍起。杖流遠地。竟被殺。官至禮賓寺正。○漂海泊于浙江地方。有人在湖岸。運水車以灌水田。用力少而上水多。可為當早農稼之助。語于千戶溥榮。願學其制。榮畧言機形之制。溥曰。我所見轉之以足。此則運之以手何也。榮曰。備所見必是蹈車。不若此制最便。止用一人。可以運之。松木輕不可造也。其機通上下用杉木。其腸骨用榆木。其板用樟木。其車腸用竹片。約之前後。四柱腰大。中柱若少。其車輪腹板長短廣狹如之。如不得杉榆。須用木理堅韌者。方可。錄漂海江以南人人死。巨家大族或立廟旌門。常人則畧用棺不埋。委之於水旁。至於城邊白骨成堆。○江以北雖白髮。皆垂耳環。○還

到北京。寓玉河館。琉球國人陳善。將餅饌來饋。感其恩。即減糧以與之。善揮手却之。乃曰。我國王二十年前。差我父送貴國。大爲人人見愛。常想恩情。今又得與公相見。得非幸乎。時琉球國使正議大夫程鵬等。以進貢來寓後館。善其從者也。○還至凌河驛。凌河東岸六七里間。有白沙塲。沙窩鋪其中。白沙隨風簸揚。填塞鋪城。城之不沒於沙。僅一二尺。○玉河館。一夕有一人驅群羊過門去。其中二羊毛長垂地。○還到山海關。關內十里置烟臺。以備烽燧。過關後。間五里置小墩。立標以記里。○奉使濟州將還。以其舟甚大無載物。故輸若干石塊于舟中。使不搖動。及漂在大洋中。以索纏石爲假碇。錄本濟州之海。色深青。性暴急。雖少風。濤上駕濤。激復濤。無甚於此。黑山島之西。亦猶然。○濟州在大海中。波濤凶暴。人多漂沒。故閭閻間。女三倍於男。爲父母者。生女則必曰孝我。生男則皆曰非我兒也。鯨鯢之食也。○漂入大洋中也。舟中人皆曰。嘗聞海龍甚貧。請投行李有物以讓之。爭檢衣服錢糧等物。投諸海。○大洋中。怒濤如山。高若出青天。

下若入深淵。轟衝擊躍。聲裂天地。忽遇大風雨。掀天鼓海。帆席盡破。舟以二檣高大。尤易傾撓。勢將覆壓。命舟人操斧去之。得免沉沒。至以衣漬雨汴。咋以沃焦。○海中水色。或青白。或赤黑。隨處各異。自白還青以後。風力雖勁。濤不甚高。○十二日而泊于一巨島。有二船來到。舟中人皆穿黑襦袴。著竹葉笠。棕皮簑。喧呼。嗷。渾是漢語。乃是浙江寧波府地方也。天晴之日。登漢挈山絕頂。遙望西北絕域。則海外若有白沙汀一帶者。以今觀之。非白沙。乃白海也。大洋洪濤間有物。不知其大。其見於水上者。如長屋廊。潰沫射天。波翻浪駭。梢工相戒曰。彼乃鯨也。大則吞航。小則覆舟。過淮安府。有龜山臨淮河。人言此山足有神物。狀如獼猴。縮鼻高額。青軀白首。目光如電。諺傳大禹治水時。以大索鎖此物。命住于此。俾淮水安流。今人有圖此物之形者。以免風濤之患。○泊于寧波府。行到蘇州。泊舟姑蘇城下。乘月過閶闔門外。有通波亭。舊名高麗亭。宋元豐間所築。以待高麗朝使者。○在大洋第九日。有海鷗群飛而過。舟人喜曰。嘗聞水鳥晝飛海上。

夜宿島渚。今見此鳥。洲渚必不遠也。十二日得泊于寧波府。○泊于台州。乃古東甌之地。風氣溫暖。恒雨少日。實炎荒瘴癘之方。當正月而氣候與三四月同。桃杏滿開。牟麥欲穗。竹芽方盛。別一區天地。○江南俗。婦女皆不出門庭。或登朱樓捲珠簾以觀望。無行役服役於外。好冶容。男女皆帶鏡奩。市店皆建帘標。○舟至東昌府。人家掛雕籠畜一鳥。其形如鳩。其味赤而長。其吻微黃而鈎。其尾長八九寸。眼黃背青。頭與胸水墨色。其性曉解人意。其音清和圓轉。人或言。皆應之。問曰。此鳥能言。無乃鸚鵡乎。此則隴西鳥。我則東海人。隴西海東。相去數萬餘里。我與此鳥。客他鄉同也。思故鄉同也。形容憔悴亦同也。觀此鳥。彌增悲歎。有人答曰。此鳥長在籠中。終死他鄉。今足下好還貴國。胡可謂之同也。○還到永平府。閭閻間皆尙道佛。不尙儒業。商賈不業農。衣服短穿。男女同制。飲食腥穢。尊卑同器。胡風未殄。是可恨也。○濟州邈在大海中。水路九百餘里。波濤視諸海尤爲洶瀑。貢船商舶。絡繹不絕。漂沒沉溺。十居五六。不死於前。必死於後。故

男最少。○浙江福建以南漕運。或鑿運河。或築堤置閘以通漕。又決黃河注于淮。通于白河。大加修築。水渴則置堰壩以防之。水游則置隄塘以捍之。水淺則置閘以貯之。水急則置洪以逆之。水會則置嘴以分之。壩閘洪嘴。其制不同。而皆築石爲之。○在水大洋中。舟中無水渴甚。或細嚼乾味。掬其洩溺以飲之。○大洋中得一大島。緣島岸繫舟。舟人闌下。覓飲溪流。欲炊飯。以爲飢餓之極。五臟塗附。若驟得食飽。則必死。乃煎粥而啜。○滄波雖若一海。水性水色。隨處有異。海州之海色深青。行過四晝夜。愈白。或還青。還白。又三晝夜。赤而濁。又一晝夜。亦黑。中全濁。其色非一。○缸中無一器甘水。盡搜行裝。得黃柑五十餘枚。視人唇焦口爛者。均分食之。令沃舌以救舟中一刻之渴。○漂至寧波府桃渚所。有一官人。來指所着喪笠。曰。此何帽。曰。國俗廬墓三年。不幸有遠行。則不敢仰見天日。以堅泣血之心。所以有此深笠也。○行到杭州。杭爲東南一大都會。連衽成帷。市積金銀。人擁錦繡。酒帘歌樓。咫尺相望。同上

崔脩

題呂江樓詩云。璧寺鍾聲夜半鳴。廣陵歸客夢初驚。徐達城與一二文士。讀崔詩曰。古今貶張繼詩云。僧家無半夜之鍾。崔踵其跡何也。有一僧曰。今設齋之寺。徹夜鳴小鐘。何但夜半而已。詩話

崔淑生

慶州人。字子真。號忠齋。我成廟朝登第。能詩文。尤工四六。官至右贊成。已卯禍起。削奪官爵。謚。○戊寅年間為大憲。振起頽綱。朝市肅然。人以犯禁為羞。己卯錄為大憲。黜巫女之城內居住者。使聚于東西活人署。撤城內尼舍。毀佛像。使僧尼不得接跡於都下。士大夫過制家舍。撤去間架。十二月削奪。明年庚辰卒。子彥弘登文科。

崔命昌

開城人。字汝慎。弓裔內奉卿凝之後。燕山甲子登第。官至禮曹叅判。嘗指金安老為小人。一擯不用。久處散地。晚年築室雙溪洞。僅容一身。自號松

石居士。自罷官後。歲糶楊州倉粟。人稱糶倉宰相。碑序

崔萬里

海州人。我英廟朝登第。選入弘文館。為副提學十餘年。嘗上書論宦官著烏沙帽不合古制。請依中朝著倒冠。諸宦官皆側目。官至江原道觀察使。

崔霖

崔霖才高。性嗜酒。禮法之士頗短之。及赴試。眼疾作。艱於書字。乃嘆曰。吾所得僥倖者也。今才高於我者非一人。屈斯人而必得之。非吾望也。眼之如此。必天也。乃不赴。大平通載

宋希美

我英廟朝。守慶源有侍妓曰。昨夢有賊忽至。斬令公頭去。頃之有報賊至。宋以夢為忌。遂閉門不出。僚佐諫不聽。賊遂驅檢人馬百餘而去。事聞。

上大怒。拿致。論以軍法。竟賜死。劇談

宋于喜

礪山人。我成廟朝登第。性剛果。嘗爲慶尙監司。咸陽郡有女巫。自稱能人病。遠近雲集。爭施米布。于喜杖殺之。一境肅然。官至吏曹判書。

宋欽

宋欽之。我成廟朝登第。歷敷清要。官至贊成。天性廉介。居處自奉如寒士。雖位至宰相。爲老母乞外便養。年九十而卒。

宋麟壽

恩津人。字眉叟。號圭菴。擢正德辛巳科。官至叅判。立朝謇諤。議論讜直。我仁廟初。朝中以鎮靜浮俗。非公不可。拜爲大司憲。李尹等忌之。目爲浮薄領袖。罷歸清州舊墅。竟殺之。致命之夜。白氣如虹。貫屋。亘天者累日。狀行我仁廟嗣位。即擢尹元衡爲工曹叅判。蓋以慰慈殿之心也。大憲宋麟壽論劾逾月。竟奪嘉善資。或有憂其已甚。欲其停論。皆不聽。麟壽之妹夫成悌元。清修好古。麟壽心重之。言無不從。一日同宿。從容語及不必堅執

之意。反覆重言。則佯睡不應。麟壽平生虛已受言。而於此事。固執如此。元衡得志。李震與麟壽皆被害。同上圭菴樂善好學。嘗以副使朝京師。中朝人稱公爲一片冰玉。乙巳禍作。指爲浮薄徒領袖。削奪官爵。丁未賜死。臨死。大書曰。皇天后土。實表此心。從容就死。稗官雜記成希顏舊第在終南山下。洞壑幽邃。圭菴賃居之。鄭林塘惟吉往訪。圭菴謝以詩云。玉人乘月訪幽居。柴戶推來樹影疎。山釀慙開千日酒。盤肴偶得八梢魚。枉詩不用傳驚俗。清話方知勝讀書。明日送君山下路。小堂寥落似逃虛。一時文人多酬和。成秩。雜記圭菴與金慕齋論議相契。遂爲知心忘年之交。慕齋臨終。語及國事。曰。後日之事。子當任之。行迹圭菴誠孝。出於天性。嘗居廬。一依文公家禮。有白燕巢幕之異。人以爲孝感所致。同上乙巳禍作。公被劾歸清州村舍。退溪先生寄詩曰。圭菴昔在風塵中。瀟灑不作風塵客。今歸清城學耕稼。清城穀熟如姑射。肯將榮辱入靈臺。一簞一瓢師顏回。吾聞天下有至樂。非金非石非絲竹。同志之人與我違。獨抱塵編荒是非。丁未有後命。金吾郎

至公跪聽。傳旨沐浴就死。貽書訣其堂弟麒壽曰。皇天后土。可表此心。一子託子。吾何憂焉。其戒子書曰。母以余之被禍沮抑。勤讀書。戒酒色。喪事從儉。無違禮。負愧而生。不如無愧而死。筆畫飛動。凜凜有生氣。其平日所養可見矣。時年四十九。今上初命復爵。玉堂上筭請加贈。不許。同上

宋好智

字景愚。戊午生員。以公薦拜叅奉。移拜義禁府都事。戊寅累轉持平正郎。登薦科。擢受獻納。至弘文館校理。出入臺閣。風采動人。己卯禍作。削奪。事將叵測。不以禍患怵其心。謝絕人事。閉關自守。窮不失志者。八年而終。孫承禧曾孫壽駟駿。時吉行吉獻吉。皆登科。

宋希奎

宋僉樞希奎。自幼穎秀。嘗受業於先進家。一日值昏黑。欲投人家。望門未及。忽於枳林中有一老嫗。呼公幼名。狀若戲謔。迫而視之。顏面之大滿於籬。真鬼恠也。進退維谷。奮身直前將歐之。其形漸消。退而顧見。唯面掛於

籬上而已。

宋世琳

壺山宋先生世琳。早捷崑科。忽得柴毀之疾。遂晦迹不出。得脫廢朝甲子之禍。因自號曰醉隱。乃採樵村間。戲話可以破眠者。為孟浪之說。名之曰

禦眠楯。本集

安景泰

興寧人。字遜甫。謹齋之子。辛禍二年登第。事我太祖。為開國功臣。封興寧府院君。諡良度。○天資簡重。秉心直謙。行己謹恪。臨事謹詳。未嘗有疾言遽色。亦未嘗趨勢以低昂。亦不立異以表襮。碑序再堂銓選。不用私謁。誌序

安琛

順興人。字可珍。我光廟朝登第。官至判書。有文名。子處善。處誠。俱登第。早歿。○靈岩客舍東。有徘徊樓。題詩云。徘徊樓上月徘徊。客子登臨亦快哉。玉兔幾年仙藥搗。素娥何處鏡奩開。搖波散百東坡水。對影成三太白

孟勝覽

安塘

順興人。字彥寶。生於天順辛巳。年二十中司馬。二十一我成廟十三年登第。天性簡直。守正不撓。燕山時。久革諫院之官。中廟反正之日。特以公爲大司諫。彈枉歸正。四館都憲。振起頽綱。乃判銓曹。痛革奔競之習。凡孝行公薦之人。標題行實而銓注之。又啓曰。明經行義之儒。不可拘循資級。請擢授不次。當時聞望之士。如趙光祖。金湜。朴薰。持除六品職。金安國。金淨。宋欽。潘碩。枰。皆賢大夫也。亦請薦拔。力陳求言而不可罪言事之人。上以法外建白責之。臺諫以誤國劾之。公則晏然不撓。以甄拔賢士。激濁揚清。爲己任焉。自乙亥以後。與李相長坤。申文節。鄧相繼典選。以啓己卯。明良際會。當時名賢荷遇寵眷。庶幾大猷之盛。而新進諸賢。勇於敢爲。不能無過激之疵也。及登台府。與鄭領相光弼。務持大體。裁抑鎮定。○公子處謙等三人。皆中薦科。而俱列清顯。公戒盛滿察時勢。欲退而不能。己

卯十一月十五日。夜五更。府胥來言。領相承召詣闕。公驚駭詣闕。首相鄭公獨坐賓廳。公問事由。鄭公揮涕掉頭。不忍語。但道器械已具於殿庭云耳。公遂與鄭公力請。會朝庭議罪。乃命召叅議以上。共啓伸救。十二月。臺諫欲加罪清流。追劾竄逐三十餘人。以公爲首。鄭相極諫營救。止落職焉。辛巳秋。沈貞陰。喉執義尹止衡。削公官爵。是冬。公聞子處謙等觸時宰語。驚駭仆地。即欲上達。以其言語無實事。又恐惹起士林之禍。率歸外鄉。欲使消沮。而豈意所親信者。按劔瞋目而相待耶。公平生不顧生產。己卯夏。夫人暴逝。無以爲措。至於假貸。性又剛直。唯將甄拔賢才。力排邪議。庶救忠良。誣枉之獄。權奸畜憾成獄。二子俱被極刑。身且不免。痛哉痛哉。○公之父。司藝公敦厚。年老喪耦。以兄監司寬厚之婢。重今爲妾。重今有女。曰甘丁。乃家畜前所生也。性狡黠。多爲不道之語。司藝公怒。其有離間之漸。大杖足掌。送于白川外家。司藝下世後。甘丁嫁白川宋麟。生子祀連。公之一家。視祀連如親子。時奸兇執政。國勢日危。公之子處謙。常懷憤惋。

言及時事。未嘗不涕。隨言零。偶與詩山正正叔權礪等語曰。沈貞南哀專擅威福。俾上聾瞽。除去此輩。則可以扶國勢。保士林矣。祀連聞之。以公夫人初喪時。吊客錄。及發柩時。役軍簿。上變告。遂成辛巳之獄。○後丙寅孫玠上書言。一時緣坐。皆蒙收叙。而惟祖父未蒙伸雪。誠為九泉之冤。明廟特憐愍。還賜職牒。萬曆三年乙亥。宣廟贈諡曰貞愍。東閣雜記

安處謙

順興人。字伯虛。貞愍公之長子也。癸酉進士。與權礪請從祀鄭文忠。革昭格署。釋奠儀物。獻議更定。餉羹大羹。陽燧明水。各得其制。至今遵用。登第授學諭。遭母喪。辛巳服闋。與同里詩山正權礪等語曰。哀貞專擅威福。必除去此輩。可以扶國勢。宋祀連與其妻甥鄭瑞告謀。大臣推官鍛鍊構捏。故入大罪。雜記

安處謹

順興人。字靜夫。處謙之弟也。資稟安詳。與朋友交。愈久愈敬。世稱三珠白

眉勝諸兄。登薦科。為弘文博士。辛巳杖殞。

安處誠

順興人。字久叔。處謙之弟也。天資渾厚。無疾言遽色。信於然諾。少與諸友語曰。三十後監試。四十後東堂。決不可赴。至戊寅三十一也。父翁命赴司馬。對曰。君子一言。千年不改。少與友言。今不可改。與兄同登薦科。為弘文修撰。聞兄語觸時宰。言于貞愍。貞愍欲其消沮。卒歸外鄉。變作。公以先告貞愍。免罪。而亦緣坐。定屬于清州。壬午蒙放。閑住二十二年而終。

安名世

順興人。字我。中廟朝登第。為弘文正字。戊申李芑以曾為史官時。褒揚柳灌等。論以逆黨殺之。人皆惜之。

安應世

竹山人。字子挺。號月窓。與南秋江最相善。為人清淡洒落。能詩。尤長於樂府。安貧喜分。不求功名。不喜甚奕。自號烟波釣徒。又鷗鷺主人。性又嚴厲。

雖不白眼待俗。於人少許可。中司馬試。二十六早歿。人莫不慟之。師友錄安子挺死。南秋江會葬畢。於墓前用兕觥酌酒。以詩哭之曰。揮淚強高歌。酌汝一觥酒。集本子挺為人清淡洒落。白玉疵喜酒色也。嘗曰。不義之財。補止於家。不義之食。補止五臟。不可犯也。師友錄子挺抱不世大才。有文章操行。天性朴野。不喜紛華。乃就古人古律歌詞中。拔其閑適可玩之尤者。一百十四首。合爲一部。名曰湖山老伴。以爲終老江山之計。洽話秋江夢見子挺。述夢中所見。作詩一絕。記之云。邯鄲一夢暮山前。魂與魂逢是偶然。細雨半庭春寂寂。杏花無數落紅錢。集本子挺善吟詩。喜看花。嘗曰。死亦看花吟詩。死無恨矣。及子挺死。秋江以詩哭之曰。吟詩死亦得。渠恨半消除。秋江集記秋江云。吾友安子挺亡後十年。高生淳夢見子挺於廣漠之野。子挺問伯恭安在。高曰。上寺隸業。子挺不悅。即成一絕。付高生以遺之云。文章富貴摠如雲。何須勞苦讀書勤。但當得錢沽酒飲。世間萬事不須云。高覺而記之。遺余。余罔知其意。後十年。然後乃覺之。洽話

安純

安純爲司憲。雜端官娥犯罪。上命大司憲趙璞立殺之。公曰。憲府非刑官。且不正其罪而殺之。可乎。璞以。上旨強之。公曰。人命至重。死不復生。遽刑之於義何。宜付有司鞫訊。太祖聞而悟從之。誌序崔瑩誅權姦。進士安純座主亦連坐。尸諸郊時適雨。流漂積屍。純年十八。率一僮物色求之以葬。識者服其大器。碑序

安瓚

精通醫術。尤精於理學。士類取以爲友。有一男子。乘晚出去。忽兩眼皆合。以手搯之。如以漆接之。仍作盲瞽。瓚曰。眼者屬肝。肝受病故眼閉。教治肝之病。未久漸開如常。又有女子。陰門忽痛。有頃黃黑毛相雜。如牛馬之毛。如水湧出。晝夜不止。瓚曰。毛者血之餘。血受病有恠也。可先治血。其人受服。未久毛止。又有婦人漱口。自舌端血出淋漓。連日不止。多用止血藥。猶不止。罔知所措。問瓚。瓚曰。急服龍腦蘇合元。稍遲則不救矣。血者屬心。而

血得熱則沸。今此婦人多用心慮。心氣極熱。血湧湧出。妄行于舌。血盡心虛。客邪乘之。則不能救矣。治心去熱。則血自止矣。果服四丸。流血即止。人服其術。精識遠非庸醫所及。由是見重於一時。問病診脉者。填咽門巷。不能周徧。毀譽交起。同輩人疾如仇讐。大司憲李沆以交結黨人。拿致鞠問。受杖一百。流外。至延曙驛而死。人皆惜之。

安止

康津人。字號臯隱。我太宗朝再捷科。官至領中樞府事。有文名。諡文靖。○安止為集賢殿大提學。時文士方趨附。安平大君獨不致公。屢折簡邀之。則曰。大君簡不可遙答。當親謝謁云云。竟不赴。一日諸文士有製述。爭其高下。性質之。公故以高者為下。下者為高。諸文士笑曰。此老衰耗不足較。遂絕延請。項錄

安堅

小字得守。性聰敏精博。多閱古畫。皆得其要。集諸家之長而拆衷之。山水

尤其所長。所畫內藏青山白雲圖。真圖中絕寶也。詩話八駿馬。我太祖征

戰時所御。我世宗朝命護軍安堅圖其形。集賢殿諸臣製其贊。以傳後。

雜記一曰橫雲鵲。產女真走納氏平紅贊曰。雄姿應圖。駭骨超群。掃盡妖氛。

橫爾橫雲。二曰游麟青。時所御中三箭養三十一死。贊曰。偉此游麟。瑞我

聖德。積年三十。宣威南北。三曰追風鳥。純黑鳥。產女贊曰。色潤玄雲。眼閃

明星。一鞭騰驤。萬里縱橫。四曰發電楮。產安邊赤色所御。贊曰。逸倫之

驥。應機如神。千軍陣開。一策電奔。五曰龍騰紫。產端川平倭所御。中贊

曰。虬螭變化。風雲雜選。凱旋孤竹。功存三捷。六曰凝霜白。產濟州純白色

烏蹄所御。綠回贊曰。神奇天與。光景練素。義旌一回。鴻業永樹。七曰獅子黃。

產江華煤島智異山平贊曰。三尺威奮。一怒而成。頭流山峙。黃獅有名。八

曰。玄豹。產威興兎兒洞潛邸平贊曰。玄豹趨迅。所向無濶。粵騁逸足。揚我

武烈。

孫舜孝

平海人。字敬甫。號勿齋。魯山朝登第。性踈蕩。畧於世事。自號七休居士。有文名。尤精於經學。常淨掃一室。掛歌器圖。出入觀省。官至贊成事。有集行于世。○七休常戒子弟云。吾家起於草萊。無傳舊業。唯以清白傳之足矣。行嘗罷官。構草堂於終南山下。鑿雙池種蓮。日以教誨後生自娛。同性不喜華靡。爲丞旨者。衣必薰香。公獨不爲。○我成廟昇遐。公晝夜號哭。曰。天日之表。那得復見。不食一月。一夕發狂。夜半脫衣。走上南山。因此病革而歿。○嘗爲賀正使。時有西戎之釁。道路梗塞。公臨行謂曰。人臣受命之日。忌其家不見妻子而行。○嘗按廉嶺南。路遇忠臣孝子旌門。下馬拜之。○嘗於上前論忠恕之道。上命製進忠恕詩。乃製五章以進。一曰父子。二曰君臣。三曰夫婦。四曰兄弟。五曰論忠恕主敬之功。後製進兩章。上曰。卿每以忠恕二字勸我。我每以忠恕二字待卿。○公年甫十餘。母病臥。欲嘗杏子。至杏樹下。仰天而拜。有若祈禱狀。俄而杏子無風而自落。遂拾而走進。人奇之。○嘗書戒曰。事君忠。處官勤。只一箇誠。又書戒曰。獨坐

防心。群居慎口。心是發爲善惡之幾。口是樞機吉凶之關。知戒防關。則天君泰然。○每對酒。必稱清風明月。嘗醉書一紙曰。明月明未明。清風清未清。我心正未正。待得明月明。○居家飲食。不嘗華靡。客至置酒。只松芽燠豆而已。廐中只有一馬。○每於中夜。稽顙北斗曰。誓不欺君。有倒授階資。不授君子。皆授一弟一姪。○嘗觀察嶺南。既見瓜。巡至東萊。翌日將開餞宴。縣令聞公兄仁孝。計秘不發。公夢見仁孝子祖括。中夜起坐。語夢泣下曰。老兄必死。明日具設素饌。令驚愕。告以實。其友于誠感如此。○嘗爲贊成。我成廟置酒宴諸宰。酒半公啓曰。有親啓之事。上命陞御榻。公啓曰。今女謁太盛。言路未廣。侍宴宰相咸愕然。欲問所啓之事。上曰。無他以予爲不聽諫耳。○嘗爲丞旨時。上官性執拗。論事有不合。公疾其所爲。數相抵牾。上以同僚不協。移授他職。○取三休四休之說。號七休。人曰。欲於急流中勇退。今逢聖主。將何歸乎。更號七不休。以事遞罷。憲長徐達城以詩戲呈云。可休休日休方好。不休時休亦羞。三四休并七休客。休休

今復更休休。詩格圃隱祀堂在永川地。孫七休嘗按是道。巡過郡境。馬上醉睡。嘗過圃隱村。夢間見一老翁。鬚髮皤白。自言圃隱。且云。所居頽弊。風雨無庇。如有相屬之色。七休驚異之。詢故老得故址。勗郡營之。堂成躬奠。又作文書于堂壁。談寂記嘗為江原道監司。時大旱。禱雨無効。公曰。如或誠心感天。天必應之。遂齋戒。親自祈雨。夜半聞雨聲。喜而起曰。我當謝天。被朝服立庭中。無數拜天。雨勢甚急。有吏持傘倚後。公曰。壓尊處安用傘。為命去之。衣裳盡濕。叢話一日與宰樞飲話。竟夕。晨起謂曰。吾氣不平。速具飯來。飯訖曰。吾欲休焉。乃隱几而臥。家人以為就睡。良久視之。則息絕矣。遺命以燒酒一大壺。埋于靈石下。家人如命。瑣錄嘗按慶尙。過金烏山下。吉先生故居。為文以奠之曰。拜瞻祠宇。彷彿儀形。惟惟烏山洛水之如昨。念先生兮何在。奠蕉黃兮荔丹。冀英靈之不昧也。此老無意雕琢於文字間。胸中所發。自能如此。可以想見其風槩。談寂記有感興詩八首。一曰。對梅讀易云云。三晝初成萬變存。箇中俯仰只乾坤。省來不覺梅花爛。只把濂溪

太極論。本集公知燕山不克負荷。一日登御榻。有撫床之請。臺諫請問密啓何事也。成廟曰。戒予好色。竟不言。丙丁錄文丞相忠義伯兩先生。肝膽相照。忘一身立人紀。千萬世景仰無已。唯利所在。古今奔走。清霜白雪。松栢蒼蒼。構屋一間。將以蔽風。公靈安兮。我心安兮。題圃隱孝子碑閣寧海府有泣嶺。為一邑迎送之地。俗傳大小使星。若初過此嶺。必有凶事。人皆避之。孫七休為監司。直到嶺上。削古木白而書之曰。汝揖華山呼萬歲。我將綸命慰群氓。箇中輕重誰能會。白日昭然照兩情。仍改名曰破峴。勝覽有一農夫於此。其父既種。其子當耘。見其稗曰。父之所種。不忍去之。見其莠曰。父之所種。不忍除之。則其可乎。關佛疏

孫昭

廣州人。字日章。叅議士晟之子。登第。所莅皆有聲績。我光廟朝。從征李施愛。叅敵愾功。封鷄城君。謚襄敏。○孫昭嘗從朴從善征李施愛。其兄旭奉使咸興。為賊所害。公庶幾求其屍。欣然而行。及在軍中。求得兄屍於積

屍之中。遂反葬之。墓誌

孫仲噉

慶州人。字泰發。鷄城君昭之子。我成廟朝登第。官至吏曹判書議政府。參贊。性清儉。所蒞有聲績。諡景節。

尹紹宗

茂松人。字憲叔。號桐亭。栗亭之孫。恭愍王朝擢崑科。恭讓王時拜禮儀判書。以事放于錦州。入本朝爲修文館大提學。有集行于世。○年九歲有異質。崔斯立見而奇之。曰神童。爲作神駒行贈之云。飛黃驥子生有種。作駒權奇志千里。選爲正言。草疏請黜倖臣金興慶。斬寵宦廣大同希興慶旨。以事劾之。使不得上疏。公作詩書懷云。孤臣野服謁天門。玉色温温授正言云云。未封社稷安危計。大負君王眷拔恩。千載不欺皇上帝。陳湯劉向二忠魂。按漢書。王鳳以陳湯爲從事。凡事皆決於湯。劉向雅奇湯。與之友善。謂湯曰。今外家日盛。必危劉氏。吾以同姓蒙厚恩而不言。孰當言之。

遂上書極諫。公意盖以湯既爲鳳所信任。若洩向言於鳳。則鳳必先去向矣。封事安得上乎。深嘆今同舍之不然也。上同挽白淡菴文寶有卓爾知天著踐形之句。踐形淡菴所著性理之論。上同恭愍王見狗鳴。以爲腹痛。以藥救之。尹紹宗作詩記之云。庚子上在白岳寺。上見病狗傷天衷。宣傳急呼大醫來。出藥與狗中使催微物。且加不忍恩。家法仁愛難名狀。上同尹紹宗嫉李崇仁之才高。又忌李穡譽崇仁不譽己。多方讒毀。史李存吾論辛肫。謫長沙。尹紹宗作詩送別云。復上離亭重回首。秋高喬岳易生悲。存吾氣節。與秋色喬岳爭高。既別存吾。對其似者而悲也。風雅洪儒申崇謙裴玄慶卜智謙庾黔弼崔凝。佐太祖創業。皆贈太師。尹桐亭詩。攀龍附鳳六太師。白日大名天地間。上同便佞近習。實害盛德之荏莠。賢士大夫薰陶之益。乃泰德性之雨露。尹紹宗疏林廉之敗。奸之未熟也。奸之熟則人不得罪。天不得禍。上同李仁任當國。循私情而害公議。貴貪墨而賤清白。好好回而惡正直。三韓之人。以禮義廉恥爲貧賤禍敗之檻筭。惟恐陷於其中。尹紹宗書我

太祖回軍。尹紹宗詣軍前。懷霍光傳以獻。太祖令趙仁沃讀而聽之。乃極陳復立王氏之議。史高麗臺諫。皆面啓時。改得失。至恭讓時。破面啓之法。尹紹宗請勿罷之。史

尹淮

茂松人。字清卿。桐亭之子。我太宗二年擢高科。學問該博。尤長於史。太宗常稱諄儒。官至大提學。謚文度。有集行於世。○我世宗欲使儒士分授諸史而讀之。淮對以經學爲本。不可專治史學。世宗曰於經筵。問以左傳漢書所記古事。則皆不能對。博覽古事。以備顧問。不亦可乎。遂命諸臣分讀諸史。寶鑑自幼聽明絕倫。一覽輒記。尤長於史學。嘗背誦資治通鑑。不差一字。四佳亭集性嗜酒。在家沉醉。我英廟遣中使急召。左右扶起上馬。宿醉未醒。及至。上前畧無醉色。命草宣制。揮翰如飛。皆合睿志。上曰。真天才也。時人語曰。文星酒星聚精。生此一賢也。嘗侍宴。太宗前倚之曰。予之柱石也。筆苑尹淮南秀文皆能文章。性喜酒。常飲過度。我

英廟惜其才。命飲酒毋過三爵。自後凡會。二公必飲大椀。名雖三爵。實倍飲於他人。英廟聞而笑曰。予之戒酒。適所以勸飲也。同上

尹祥

禮泉人。字實夫。初名哲。號別洞。我太祖二年。以鄉吏登第。學問精深。誨人不倦。長成均十有六年。官至藝文提學。退老于鄉。學者雲集。近代師儒之最。壽八十三而卒。○尹提學祥學問精深。爲冑監之長。諸生皆爭先。樞衣。絲分縷。柝耳提面命。終日矻矻不知倦。粹言尹提學爲文章。皆自六經中流湊。而同時據臯。比如金樞府末金司成。泮金衣長長鈎。經術則可謂流亞。而文章則不能與之爭衡焉。本嘗守黃澗。金公淑滋徒步往授易。窮探陰陽變化之數。原始要終之說。由是易學大明。彙事錄尹提學管鄉役。雖在極務。退食往還。必取松明。藏諸官廨密處。以爲夜讀之資。名臣行跡

尹弼商

體甚短小。帝征野人。徵兵于我國。我成廟以尹弼商應命。率師助征。大

撻而還。上悅。中朝亦降勅褒美。覽勝燕山朝。竄謫于珍原縣被殺。親族子弟皆流絕島。伏尸于野外。過旬不收。烏鳶不食。隣犬不顧。撫言尹坡平弼商少時朝京師。訪善卜者問命。道終始。曰。平生壽位俱隆。但終死於三林之下。廣詢卜者。皆未解三林二字。遭廢朝之亂。被竄于珍原。寄寓邑內。一夕隣居人倩旁居耘手曰。明日早朝。齊會于上林之田。坡平偶然問曰。何以曰上林。其人曰。去此未五里。地名有上林中林下林之號。坡平始憶三林之下。仰屋憮然。未幾燕山遣使誅之。同上

尹殷弼

字商老。燕山甲子壯元。嘗爲大司諫。因事見遞。己卯十一月十五日禍作。翌日除丞旨。進啓曰。今茲之事。不覺傷痛。臣昨夜四更。聞之驚愕。至西門外。欲入啓微誠。而命牌外不許入。故退去也。時有持平欲入者。軍士摔去。衣襟盡裂。臣見之。不覺流涕。三司盡命遞之。故著笠而環坐門外。豈料有如此事乎。趙光祖等。若謂之中道則未也。使之成就。則豈易得哉。一朝待

之如反逆。不知有何事。夫人臣密啓。非奸則佞。古書不云。不由中書耶。國家元氣。自此斲喪矣。後官至監司而卒。孫承吉登文科爲判書。承勳爲領相。曾孫瑛爲修撰。璠登武科。官至統制使。

尹壽

字靜叟。號柒林。與四寸柳大憲雲相酬唱。詩語清新。己卯後。與睦玄軒申龜峯同志相從。語及己卯。未嘗不仰天傷心。子希聖。孫淳玄。城。皆登文科。

尹之彪

善山海平縣人。政丞碩之子。性寬厚。不立崖岸。又通蒙古語。官至知門下省事。諡忠簡。

尹子松

生而穎異。稍長。知讀書。有大志。祖文度公。准嘗撫其頂曰。此兒有栗洞諸祖風。天其或者興吾門乎。碑序

尹自任

坡平人。字仲耕。坡平君全孫之子。我中廟癸酉登第。官至右丞旨。與靜菴冲菴相善。己卯謫北青。憤懣而卒。年三十一。

尹孝孫

南原人。字有慶。爲兒時能解禮。又孝親。遂以孝孫名之。魯山元年登第。歷踐中外。燕山朝。官至右叅贊。諡文孝。

尹欽

永川人。自少聰敏篤行。我中廟朝以生進。晚年登第。家度甚嚴。以縣吏之清。擢拜吏曹叅議。上燕坐問左右曰。朝廷有亂政臣民乎。左右不能對。公獨對曰。畜猫之家。鼠不恣行。上嘉其言。賜名兢。以年老退歸鄉閭。於鄉黨賦禁人言長短及土主是非之箴以揭之。人皆敬而慕之。年八十七而卒。

尹世豪

字士英。癸亥及第。爲全羅監司。赴任時。偶與忠清監司申公濟言及靜菴

之事曰。此豈至於死乎。時宰聞而大怒。遂被彈罷。後歷典三陟星州晉州。及三奸見敗。始得還朝。官至刑曹判書而卒。諡恭簡。

朴信

雲峯人。早有時譽。辛禡時登第。入本朝。歷吏曹判書修文殿大提學。官至贊成事。諡惠肅。嘗奉教製進圃隱集序。子從愚。尙我太宗女。封雲城府院君。○公嘗按關東。愛江陵妓紅粧。府尹趙石礪云。乞云紅粧已仙去。朴信悼念不自抑。石礪邀按廉使。出遊鏡浦。密令紅粧覲飾。別具畫船。選一官人狀貌類處容者。載紅粧。又揭彩額。題詩其上曰。新羅聖代老安詳。千載風流尙未忘。聞道使華遊鏡浦。蘭舟不忍載紅粧。徐入浦口徘徊洲渚間。石礪語廉使曰。此地有古仙遺跡。至今仙曹往來其間。花朝月夕。人或見之。但可望不可近。朴曰。山川如此。風景殊異。涕淚盈眶。熟視之。乃紅粧也。一座大笑。極歡而罷。詩話其後朴寄詩云。少年持節按關東。鏡浦清遊入夢中。臺下蘭舟思又泛。却嫌紅粧笑衰翁。

朴歲

密陽人。麗季爲金海府使。破倭兵于黃山江。累遷至知門下府事。四爲守令。三鎮南服。寇戢民安。蔚有聲績。後仕于本朝。○才超耿賈之儔。勇在關張之右。恭讓王教書。麗季倭寇方熾。朴歲有智略。時爲將。百戰百勝。使賊不得肆。人至今稱爲智將。地志

朴宜中

密陽人。字子虛。初名實。號貞齋。恭愍王南幸清州。擢壯元。辛禡朝。官至密直提學。入本朝。拜叅贊議政府事。天性聰敏。典雅精深。○恭愍王御經筵。謂曰。予齒已暮。雖讀聖經。恐無益也。朴宜中引師曠諫。晉平公之言。諫之曰。少而好學。如日之出。壯而好學。如日之光。老而好學。如秉燭之明。秉燭之行。孰如昧行。王嘉納之。麗史。嘗奉使如京。遼東鎮撫徐顯索紵布。宜中傾橐示之。解與所著紵衣。顯嘆其清白。以告禮部。天子引見。待之有加。勝覽。朝京師。將東還。行數日。遼東以崔瑩舉兵。聞從者恐爲所執。中路皆逃。宜

中以單騎到遼東。別無懼色。列傳。古之人。危治世而憂明主。蓋君之明暗無

常。時之理亂相乘。治世可危而不可安。明主可憂而不可恃。貞齋集。三國鼎

峙。各守一方。日事攻戰。勢同蠻觸。貞齋記。朝京及還。高皇帝移咨。數其五侮

責之。歲貢種馬。盡皆駑下之獸。此侮之一也。以馬爲禮。及其至也。皆爛斑

雜色。雖行商亦不以爲用。此侮之二也。時或遣人密覘事勢。致令發露。此

侮之三也。水陸往來。明白輿販。何事不成。何機不得云云。此侮之四也。以

匹帛易馬。伐胡倍臣等。皆以駑來易。以價較之。今三四匹馬價。易一駑馬。

終不爲用。此侮之五也。本史。朴子虛資稟端謹。學問精博。爲一代搢紳之秀。

說字

朴安身

尙州人。後改名安臣。我太宗朝登第。爲臺官。坐言事當誅。顏色自若。口吟一絕云。爾職不供甘受罪。恐君得殺諫臣名。以磁尖畫地成字。語獄吏曰。當以此上聞。否則我爲厲鬼殺爾類。太宗聞而赦之。詩話。奉使日本。還

遇海賊。賊攔入舟中。踞胡床不動。從容指揮。賊不敢近。一行賴以得全。勝覽

朴苞

戊寅定社之後。知中樞府事朴苞。自以為功多。反居諸臣之下。怏怏不平。謂人曰。李茂雖預定社之列。而功不滿於人心。且反覆難測。太宗聞之。啓于恭靖。流苞于竹州。未幾召還。銜之謀作亂。抵懷安君芳幹為博戲。是日適有雨。苞曰。古人云。冬雨損道。兵交於市。宜填之。時赤祿見。苞又詣其第。告曰。天有妖氛。宜慎處之。曰。何以處之。苞曰。不與兵謹出入。整衣冠。重行止。如前朝諸王之例。斯乃上策。更問其次。苞曰。逃之。荆蠻如秦伯仲雍。其次也。又問其次。苞曰。靖安君兵強衆附。公之兵弱。危若朝露。不如擊而去之。芳幹信而從之。欲請太宗至其第仍作亂。太宗將往。疾忽作。不果行。苞伏誅。芳幹亂免山。後以病卒于謫所。雜記

朴堧

永同人。我太宗朝登第。精於律呂。英廟制雅樂。堧實主之。官至大提

學。有孝行。旌門。我英廟嘗作石磬。使堧校正。堧曰。某律高一分。某律低一分。更視之。則高律有查滓泥。英廟命剔滓泥一分。又於低律。更付查泥一分。堧啓曰。今則律定矣。人服其神妙。叢話後以子之故。罷歸鄉曲。匹馬一僮。行裝蕭索。親朋餞于江上。公自少善吹笛。抽笛三弄而行。聞者莫不悽感。同上作蓮花回文。體云。古人有璿璣回文體。別作五言四韻。如蓮文之狀。名曰蓮花回文云。獨處甘遺逸。安身一小園。谷盤宜陋室。灣細近清樽。翠竹栖明月。青山冠白雲。學仙心切切。難事世紛紛。選我英廟得。柅黍於海州。朴堧以蠟燃成柅黍。粒形差大。積分成管。以一粒為一分。累十粒為一寸。法以九寸黃鍾之長。三分損益。以成十二律。作徧磬。勝覽新造徧磬。夷則一枚。其聲不諧。堧審視曰。限墨尙未盡磨也。即磨之。墨盡而聲乃諧。寶鑑

朴彭年

平陽人。字仁叟。性沉潛寡默。文章冲澹。筆法慕鍾王。我英廟朝再登第。

與成三問等。同在集賢殿。及光廟丙子。爲刑曹叅判。與成三問及河緯地等。謀復魯山。與其弟大年及子憲皆死。公天性沉默。文章冲澹。不落中下人窠臼。常以小學律身。竟遭大禍。遺稿不傳。本我英廟朝文學之士。如朴仁叟成謹甫柳太初河仲章李伯高皆擅名一時。而儕輩皆推仁叟集大成。以其

叢話

魯山癸酉。金宗瑞被誅。設宴于府

中。朴彭年與焉。作詩云。廟堂深處動哀絲。萬事如今摠不知。柳綠東風吹細細。花明春日正遲遲。先王大業抽金櫃。聖主鴻恩倒玉卮。不樂胡爲長不樂。賡歌醉飽太平時。我光廟愛此詩。銘諸板懸于府中。後撤去之。本傳爲忠清監司狀啓。不書臣字。受祿不食。封閉一庫。及事敗。光廟詰之曰。汝旣稱臣食祿。而復欲背之。反覆人也。彭年曰。吾未嘗稱臣食祿。使人校其啓目。果無一臣字。與弟大年及子憲皆死。妻爲官婢。守節終身。彭年臨刑。顧謂人曰。爾毋以我爲亂臣。我輩之死。非若癸亥之人焉。禁府郎金命。中私謂彭年曰。公何不孝於君父。致有此禍。嘆曰。中心不平。不得不爾。本傳

彭年之裔孫忠後居大丘爲賤役。府使朴應川落籍免役。宣廟初除職。上同朴先生彭年有詩云。孰謂周公不以誠。寃無多少獻微爭。當年又未平斯憤。地下何顏更聖明。謂我光廟在潛邸。輔幼攝政之時。公將不利於孺子之意也。時人以朴先生庚字韻詩。爲速禍之本也。雜記我世宗時。朴彭年以集賢學士。買田於廣州。其友責之曰。祿足以代畊。買田何爲。彭年即還賣之。其時士習可知。儒先錄乙亥光廟受禪。彭年知時事終不克濟。臨慶會樓池欲自殞。三問固止之曰。方今神器雖移。上尙爲上王。我等不死猶且後圖。圖而不成。死未晚也。今日之事。無益於國家。彭年從之。遂與三問潛謀。無何出爲忠清監司。明年入爲刑曹叅判。與三問及三問之父勝。武人俞應孚。文官河緯地李塏柳誠源金磧。上王之舅權自慎等。謀復上王。時天使來寓太平館。光廟欲同。上王請使臣。宴於昌德宮。彭年等謀曰。以是日使勝及應孚爲別雲劍。當宴廳舉事。閉城門除羽翼。復上王。猶反掌也。應孚曰。上與世子吾當之。餘在君等處之。謀

已定。適於其日。上命罷雲劔不入。世子亦以疾不從。應孚猶欲入擊。三問彭年固止之曰。今世子在本宮。公之雲劔不用。是天也。若舉事於此。而世子從景福宮動兵。則成敗未可知也。不如俟他日舉事。應孚曰。事貴神速。若遲他日。則恐事泄。世子雖不在。其羽翼在此。今日盡誅之。奉上王號令。使武臣往彼除。世子千載一時。不可失也。彭年三問固不可曰。非萬全計也。遂止不發。金磧知事必不成。馳去與妻父鄭昌孫謀曰。今日。世子不隨。駕特除雲劔。彭年三問止其謀。此天也。不如先發告。僥倖得生。昌孫即與磧馳詣闕。上變告曰。臣實不知。磧獨與焉。磧罪當萬死。上特赦磧。昌孫錄功。收彭年等辭服。上愛其才。密令人語彭年曰。汝能歸我而諱初謀。則得生。彭年笑而不答。稱上必曰進賜。以宗室為進賜方言也。上欲擊其口。曰。汝既稱臣於我。今雖不稱無益也。對曰。彭年為上王之臣。拜忠清監司一年。啓目於進賜。未嘗稱臣也。我仁廟朝廷經官。韓澍啓曰。世祖於朴彰年等。心雖嘉之。而危疑之際。不得加罪。故嘗下教。

曰。當代之亂臣。後世之忠臣。恐其泯滅於後世。故為此微言。以曉後世子孫也。并東閣託昌平縣令李公麟娶公女。生八男。曰龍。文科佐郎。曰鼉。生員無子。取龍子渤為嗣。渤子憬胤。子大建。進士。子時發。判書。題剛仲家梅竹蓮海棠四詠云。剛仲吾執友。嗜好異尋常。竹愛霜餘靜。梅唵臘底香。水明搖淨植。渤泛崇光。輝洒閑中興。黃庭一兩章。選哭尹大提學淮詩云。孫桐祖栗繼箕裘。華國文章第一流。楊子夢中成吐鳳。庖丁眼底欠全牛。人間未畢抽金櫃。天上誰催記玉樓。怡悵九原難可作。遺書應傍茂陵求。上題寒雲曉月圖詩云。紛紛衆卉覺芳辰。誰向窮陰風雪親。植物無知猶爾許。西山獨有採薇人。上同贈權秀才足下詩云。箕裘傳世業。才器冠群英。剛壓塵凡陋。偏憐山水清。雪窓窮聖學。風月養詩情。愛得山人號。羞稱舉子名。雕虫辭俗習。吐鳳擅雄聲。學海波瀾濶。詞鋒劔戟明。慚余拘鷓路。羨子展鵬程。拙句如燕山。那得得報瓊。出大東詩林

雙清堂記

天地間風月最出東文選。人心之妙亦與之無異焉。拘於形氣累於物欲。於是焉能全其體者鮮矣。蓋雲烟四合。天地陰翳。而清風掃之。明月當空。上下洞澈。無纖毫點綴。其氣像固未易形。惟人之能全其心而無累者。足以當之而自樂之。故黃魯直嘗以此擬諸春陵。邵康節亦有清夜之吟。嘆知音者之少也。蓋今世亦有知此樂者乎。市澤宋公愉。本簪纓之舊。而不喜功名。退居村野。今三十有餘年矣。其縣曰忠清之懷德。里曰白達。構祠堂於居第之東。以奉先世。置田數頃。以供祭祀之需。乃於祠堂東。別立堂凡七間。堦其中以宜冬。而右闢之者三。豁其軒以宜夏。而左闢之者三。庖厨溷浴。藏祭器各有所。丹碧繚垣。華而不侈。每時祀與忌日。公必衣深衣。入其室以齋。克敬克誠。凡所致享。皆遵禮經。且值佳辰。必置酒邀客。或詩或歌。以洽鄉黨之歡。晚好禪學。淡漠其心。不以事物撓之。蓋其性高明。而外乎聲利者也。中樞朴公堦扁其堂曰雙清。而詩之安平大君又從而和之。余聞而祗歛曰。有是乎雙清之說也。伯夷聖之清者也。公其聞伯夷

之風而興起者乎。蓋風而耳得之。月而目寓之。人皆知二物之清。而不知於吾一心。有不羨乎彼者存焉。然則安知其知之者之不與不知者比也。今觀公奉先之敬。娛賓之興。其自樂之趣可知已。然壕上觀魚之樂。莊子不知魚之樂。惠子亦不知。予何敢窺其涯涘哉。公之令胤主簿繼祀。以余在末屬。不鄙鄙拙俾記之。聞其說而記之。

朴弘信

我英廟初年。朴弘信從其兄彥忠。征對馬島。不利而還。上謂弘信曰。我知彥忠之勇久矣。不圖汝亦有武材。可謂真伯仲矣。諸宰爭慰藉曰。君之兄弟。非完顏之種。何其驍健絕人如是耶。叢話朴弘信傳云。興六月之師。涉重溟之險。伺其空虛。欲俘其老倪。此兵之尤者也。跋傳彥忠短小而勇悍。弘信豐大而寬厚。彥忠酒盞不近口。弘信善飲。人謂之二反。本集我船遲重。賊船輕迅。帆風飄忽。一瞬千里。弘信傳跋

朴元亨

竹山人。字之衢。號晚節堂。我英廟朝登第。以文藝顯。清儉律身。我光廟朝。功名官至領議政。久典文衡。謚文憲。○正統皇帝復位。陳

鑑高潤來頒登極詔。時朴元亨為遠接使。暨還途于境上。鑑執手揮涕曰。古人有千里神交者。况累月相從乎。相與酬唱。歡若故舊。皆作詩書于簇。以為贐。由是身居海外。而名聞中國。集三灘我光廟朝。琉球國使臣來。自

上引見於別宮。命朴元亨為擯。使謂左右曰。朴某真所謂束帶立於朝。可使與賓客言者也。上同我光廟末年。帝以本國討斬李滿住。遣內宦姜沃等。賚勅褒獎。時朴元亨為遠接使。上宴罷。出御更衣堂。將入啓事。見

上不冠。遲回不進。上望見。遽命左右取冠帶曰。吾之汲黯也。誌序朴元亨明達諳練。華使張寧等東來。公皆為擯。周旋交際。咸得其宜。張使語公曰。如子之才。出於春秋之時。當不下叔向子產之下。筆苑朴政丞元亨教子弟有法。其子安性值其生日。置酒獻壽。公受獻勸飲至夜。公呼安性使前。口占曰。今夜燈前酒數巡。汝年三十二青春。吾家舊物惟清白。好把相傳

無限人。雖於杯酒之間。無浮浪流蕩之玩。而有警責詔教之義。撫言朴元亨

五為遠接使。天順元年。陳鑑高潤。三年。陳嘉猷。四年。張寧武忠。八年。金滉

張城。成化四年。姜玉金黼。行狀

朴錫命

順天人。府院君天祥之孫。以文藝顯。嘗為丞旨。薦黃喜代之。人以知人稱之。我太宗朝。叅佐命功臣。封平陽府院君。謚文肅。少時與我太宗同衾而寢。錫命夢見黃龍在其傍。視之則上也。由是奇之。相友益厚。及即位。寵幸隆極。近代人臣無比。叢話為丞旨。太宗曰。誰可代君任喉舌。錫命曰。朝臣無可者。惟丞樞都事黃喜真可人也。上遂用之。未幾代為丞旨。終為名相。世謂朴知人。同上

朴元宗

順天人。字伯胤。平陽君仲善之子。以武藝顯。燕山昏亂。與成希顏柳順汀。決策靖國。官至領議政。謚武烈。○朴元宗將廢燕山。使勇士李藻椎擊慎

守勤守勤被擊墜地。有奴一人覆其上。以身當椎。藻遂并擊殺之。元宗遂與柳成二公。決策靖國。遐氓賤隸稱公姓名不離口。或呼為朴爺。朴爺樂二集。生於豪貴。發於武藝。不學無術。不拘名檢。及其大拜。自量其不壓其眾。望常折節謙恭。陰崖雜記元宗為人。龜厲無稽。廢燕山錄功時。以瑣瑣姻婭。皆受鐵券。以賂之多少。第功之高下。多有連車續狗之譏。同上朴元宗使李藻擊殺慎守勤等四人。飛血滿面。衣服盡赤。欲赤其功。數日不頰面。觀者醜之。同上燕山將遊長湍石壁。朴元宗與成柳兩公。約是日舉事。倉卒無見兵。驅役夫直詣光化門前。立馬成陣。元宗揮扇指揮。容止若神。同上元宗不學無術。龜厲之氣。常發見於外。雖在上前。指論一忤其意。暴露形色。不敢自戢。粹言成希顏將廢燕山。意朴公可屬大事。欲與之同事。而無交分。隣有武人辛允武者。與元宗親密。希顏使允武微諷之。平城躍起曰。此吾素所蓄積也。昌山及昏抵平城家。各痛哭曰。男兒死生有命。豈可見宗社危在朝夕而不恤乎。野言

朴漢柱

密陽人。字天支。自號迂拙子。嘗遊學佔畢齋門下。我成廟朝登第。歷正言獻納。燕山戊午。杖流碧潼。甲子被殺。中廟即位。命贈都承旨。

朴世熹

商山人。字而晦。我中廟甲戌擢壯元。官至承旨。及己卯禍作。與靜菴同被詔獄。後謫江界。卒于謫所。丙子三月初八日。正言朴世熹辭職云。臣前為副修撰時。直提學金安老構出兩是之說。當初臣意不然。為人所拘。未敢別達已意。罪當萬死。上曰。於意為非。則其時即陳已意可也。而既不能然。今乃余意本不如此云云。豈為可乎。世熹汗出沾背。欲死無地。

朴薰

密陽人。自少不逐群遊戲。弄玩之具。不近於手。人以大器目之。九歲而孤。發憤力學。研精義理。旁通諸史。無不貫穿。中甲子司馬。戊寅以薦拜義盈主簿。為母乞縣。言者以為宜臺閣。乃授監察。遷郎持平。登薦科。擢授掌令。

歷檢詳司諫。陞同副丞旨。禍作被囚。初謫星州。移義州。十三年量移安岳。後三年放歸田里。時母夫人尙在堂。痛母子久睽。不離待側者五年。耳目之樂。甘旨之奉。靡不用其極。及至大故。哀毀成疾。卒于服中。清州人立書院以祀之。己卯錄

朴英

密陽人。字子實。號松堂。少時倜儻不羈。中武科。即棄官退居。折節讀書。深有自得之妙。戊寅還朝。官至兵曹叅判。及己卯禍作。斥爲外官。晚年與鄭新堂相好。甚有相長之樂。精於醫藥。令家僮常探劑。以救人病。有白鹿洞規註疏。行于世。松堂少時取武科。棄官歸鄉。德容粹盎。勸誨後學。以自得爲先。其所著述詩文。皆悟透之語。尤精於醫術。戊寅爲丞旨。權撥啓曰。朴英精通醫術。請使兼之。監劑御藥。公固辭不居。時議兩美之內醫提調。大典只言丞旨兼之。都承旨例兼。己卯以兵曹叅判。庚辰爲金海府使。民金億香訟屈怨之。構告公與慶州府尹柳仁淑謀去執政。拿致酷訊。公不

知所因。累受刑。至於碎骨。後始知億香所訴。遂暴白。赴任後未見仁淑。及億香訟屈之事。反坐億香。翌歸治療得不死。於洛東江上構小亭。扁曰松堂。後爲慶尙兵使。未幾卒。有處士趙廣輔。識見高明。佯狂自晦。當燕山朝任士弘用事。處士憤怒。謂松堂曰。汝爲武夫。何不斬殺此奴乎。吾當殺汝。松堂曰。斬一賊紓國患。固所甘心。後史書之曰。盜殺則奈何。處士笑之。松堂卒。李晦齋作輓詩哭之曰。天不喪斯文。東隅尙有人。淵源元有自。英邁又超倫。窮探極遐妙。高步入真純。活人憑餌藥。醫國秘經綸。遲暮時逢泰。風雲道更屯。丹心天北極。素髮海東濱。愚陋蒙曾擊。乖離炙未親。忽聞仙路遠。長慟大論湮。秋晚西行路。三盃但沾巾。野言朴英在。上前有白馬繫柳枝。作此詩以進。上特賜其白馬云云。白馬寒嘶繫柳梢。將軍無事劔藏鞘。國恩未報身先老。夢踏關山雪未消。集本

朴闇

高靈人。字仲說。號晚翠軒。燕山朝登第。仕爲弘文修撰。以文章名世。乙丑

追論言事。謫東萊被殺。年二十七。有集行于世。白岳山麓。有白雲岩。萬里瀨。即南止亭之舍。後朴闇名之。題詩曰。主人有峯巒。吾家之薰爐。主人有礪石。吾家之簷溜。勝覽

朴祥

忠州人。字昌世。號訥齋。燕山辛酉登第。天性倜儻。甚有氣節。詩語雄剛。奇古。嘗守潭陽。與金冲菴聯名上疏。請復慎氏。遂被罪。丙戌擢魁。重試。出牧羅州。爲監司。所屈辱。罷歸田舍。忿恚而卒。有集行于世。性簡伉。少許可。嫉惡之心。出於天性。以此不容於朝。乙亥二月。與金淨上疏。請復立慎氏爲妃。拿致王獄。大諫李荇大憲權敏手指爲邪論。擬於死罪。力請究治。事幾不測。左議政鄭光弼率朝廷救解曰。言雖不中。不可罪之。以防言路。八月當杖一百徒配。盡奪告身而杖贖。大臣之救也。吏曹判書安瑋常憤大臣之議不得行於朝廷。因朝啓曰。朴祥金淨承求言之教。竭誠盡言。今以一二人之言。反加嚴譴。此杜言路沮士氣。貽萬世之譏也。李權反駁安瑋。

指以誤國。自是朝野之士。喪膽畏縮。以言爲諱。丙子放還。己卯被斥。沈貞構逍遙亭。遍求一時名作題懸板。公詩云。半山排案俎。秋壑閣樽孟。貞遂拔去之。訥齋嘗曰。南衮小人之雄。處事奸巧。使人主蠱惑。不自覺其端倪。錄本訥齋爲詩文。不樂熟軟。力去陳言。獨追古作者爲徒。源流混渾。而氣力雄勁。迹行趙靜菴謫湖南。朴訥齋以詩贈之曰。分手院前曾把手。惟君黃閣落朱崖。朱崖黃閣莫分別。才到九原無等差。錄丙丁趙靜菴賜死。訥齋以詩哭之曰。不謂南臺舊紫衣。牛車草草故鄉歸。他年地下相逢處。莫說人間是與非。集本

朴公達

公陵人。字大觀。登薦科。官至佐郎而罷。世居江陵。與三可亭朴遂良爲酒朋。常懷雙蘭亭。忘形縱飲。日以爲常。兩家之間有水。時或漲溢。不能厲揭。則各於崖上。隔水對坐。舉盃相勸。興盡乃已。遂良贈詩曰。三五綱常於我何。一鄉專美在君多。世人一樣看雙老。蓬直誰知賴依麻。遂良先亡。公爲

文哭之曰。宦海風波。遭歲黃兔。君既脫屣。我亦家食。朱陳古村。犬吠鷄鳴。三間白屋。一溪南北。天胡不佑。奄爾云亡。雙閑亭月。萬古長明。年八十餘而終。尙震按關東。嘗就訪之。語人曰。斯人如玉壺秋水。己卯錄

朴遂良

江陵人。字君舉。朴訥無華。孝行甚篤。燕山朝。短喪法嚴。遂良遭母喪。猶服衰廬墓三年。我中廟命旌其閭。以遺逸拜龍宮縣監。剖決如流。庭無訟。己卯罷歸。自號三可亭。與朴公達。詩酒自娛而終。己卯錄

朴紹

羅州潘南縣人。字彥胄。高麗直臣尙衷之後也。真率無偽。表裡如一。見之者。皆爲玉人。篤志好古。且有文藻。被薦於別科。先登式年壯元。以是免禍。庚寅爲司諫。與同僚議去金安老。約以明日啓之。時權輓爲大諫。蔡無擇爲正言。仕罷。公往見友人任捷言之。捷曰。君之同席者。皆可信乎。公愕然。初不料蔡無擇其黨也。即往大諫家。謀先逐正言。正言已到權家。心旣爲

一。翌日見敗。歸陝川田里而卒。子應男應福皆登科爲大憲。應順以國舅封潘城府院君。孫東賢東老及東善東說東望東亮。曾孫垣燁烜潢漪。登科多至宰相。己卯錄

朴光佑

字國耳。自號昭堂。能文。操筆立成。己卯禍作日。都中約徒。欲上筭伸冤。公把筆臨紙。文詞湧出。所製十餘度。詞意皆懇。後登乙酉甲科。常調散官。乙己之變。以司諫殞於杖下。

朴巨卿

以典翰兼帶臺官。往檢湖南塲屋。出高臥南陽詩試士。俄而批草自京來。以巨卿拜南陽府使。人以爲詩讖。叢話

大東野乘卷之十九終

大東野乘卷之二十

海東雜錄一

(未詳)

本朝 金子粹

慶州人。字純仲。恭愍王末年登第。辛禍初拜正言。以事流突山戍。恭讓王朝拜刑曹判書。後仕本朝。官進都觀察使。以孝旌門。○曹敏修禦倭敗績。後邀擊于密城。斬數千級。辛禍賜衣馬。敏修上謝箋。禍命左正言金子粹製回教。子粹曰。小捷功不掩罪。辭不製。禍怒。下巡軍府鞠之。史

金末

義城人。我太宗時登第。精於性理之學。與尹祥同在成均。於經旨頗有異同。不相上下。後爲我光廟所重。官至判中樞府事。年八十餘。諡文長。○金末有女無子。嘗曰。開千眼得陰報。余自筮仕以來。五十餘年。未嘗不帶學官職。教誨不倦。卒無嗣。豈非余荒蕪爲學。無功德於人耶。臨終沐浴

冠帶。執笏端坐。家人痛哭。公止之曰。位至一品。官非不達。年踰八十。壽非不高。死生常理。得正而死。豈非幸歟。尋卒。苑筆

金壽寧

安東人。字願叟。叅判益精之孫。魯山癸酉年十八。擢壯元叅佐理功。官至吏曹叅判。封福昌君。文章俊發老健。尤工於章疏。一夕劇飲而卒。諡文悼。○我成廟以幼冲嗣位。大諫金壽寧上劄曰。爲學之道。如舟泛流。不日進則日退。今經筵只御朝晝。不御夕講。恐非磋磨及時之意。乞令經筵官更日直宿。以備顧問。上嘉納之。寶鑑處高危則思謙降。臨滿盈則思挹損。遇逸樂則思樽節。在宴安則思後患。見可慾則思知足。將興繕則思知止。防壅蔽則思迎納。疾讒邪則思正己。行爵賞則思因喜而僭。施刑罰則思因怒而濫。兼是十思。而行之以悠久。守之以誠信。則民心悅而天道順。太平之治。可以立効。寧金壽疏金願叟語徐剛仲曰。高麗詩文。詞麗氣富。而體格生疎。近代著述。辭纖氣弱。而義理精到。孰優孰劣。剛仲曰。豪將悍卒。抽

戈擁盾談說仁義。腐儒俗士。冠冕從容禮法。先生何取。頤叟大笑。詩話

金禮蒙

光州人。字敬甫。我英廟朝再登第。官至判書。有文名。諡文敬。○李文康石亨云。人之死生。至於名諡。亦皆天定。明非偶然。嘗夢金判書禮蒙遠征。騶從填街。有人手持一物先行。書曰文敬公。公覺而甚恠之。後一年金卒。執紼於都門外。見其諡曰文敬。與所夢相符。劇談

金孝誠 武崇政

延安人。自少事親盡孝。我世宗朝累闕寄。叅靖難功臣。封延山君。諡孝襄。○金孝誠父母異居。孝誠四五歲。有婢抱立桑樹下。忽有雙鳩來集。孝誠曰。瞻彼雙鳩。雖雄並行。吾父母各在東西何耶。遂泣下。鄉閭皆異之。後官至二品。筆苑

金克一 孝子

金海人。性至孝。為母吮疽。為父嘗痢。廬墓六年。有虎乳於墓側。取祭餘飼

之如家畜。父有賤妾二人。事之如父生時。天順甲申旌門。○金處士克一母歿。勺水不入口。幾至滅性。卜葬于距家三十里地。因廬其側。每朝夕奠後。必以草屨徒步來省父。雖隆冬暑雨。終不少懈。孝門為父嘗糞。意其嗜酒爛腸所致。貯之器埋于地。尋出嘗之。必危。及歿。哀毀踰禮。孝門自幼有至性。晚年與里中人作睦族契。凡禍患相恤。婚冠相慶。春秋吉日。徵逐遊樂。俱有節目。至於鄉鄰執友之喪。必以情好。隆殺其吊賻。且不進酒肉。孝門銘性恬靜。不求仕宦。遂終身白衣。惟日日淨掃一室。整冠危坐。讀小學書。教弟子必稱張公藝以勉之。同上

金時習

江陵人。字悅卿。稍長。口吃猶不能言。以筆墨與之。則皆書其意。我光廟朝。玩世不仕。佯狂出家。號雪岑。自號東峯。一日清寒子。一日碧山清隱。晚年還俗而卒。有梅月堂。歷代年紀。金鰲新話行于世。○悅卿離胞八月。能知讀書。語遲而神警。口不能讀。而意則皆通。本傳東峯三歲。口吃猶不能言。

其外祖教抄句曰。花笑檻前聲未聽。即指屏間畫花而哂哂。又教曰。鳥啼林下淚難看。又指屏間畫鳥而哂哂。蓋不言而能通也。○三歲乳母碾麥。朗然吟之曰。無雨雷聲何處動。黃雲片片四方分。人神之。○三歲謂其祖曰。何以作詩。祖曰。聯七字謂之詩。答曰。如此則可聯七字。呼首字可也。祖呼春字。即應曰。春雨新暮氣運開。人嘆服。○五歲能作詩。我英廟聞之。召致于政院。命知申事朴以昌傳。旨問虛實能否。以抱置膝。上呼名曰。汝能作句乎。即應曰。來時襁褓金時習。又指壁上山水圖曰。汝又可作。即應曰。小亭舟宅何人在。所作詩文不少。即入啓。傳曰。待年長學成。將大用之。大加稱嘆。賜帛三十段。使之自輸。遂各綴其端曳之而出。人亦奇之。○清寒子見客問消息。聞人有肆罵者。則必有喜色。若曰。佯狂有所蘊。則攢眉不怡。○有時種禾盛。穎粟可玩。乘醉揮鎌。盡頓委地。因放聲而哭。上同爲詩以紙窮爲限。詩成輒焚之。上同佯狂自晦。人之欲問道者。以百千數。陽爲狂妄輕躁之態。或以木石擊之。或彎弓欲射。以試其志。上同山行好白。

樹題詩。諷咏良久。輒哭而削之。上同聰悟絕人。四書六經則幼時受業於師。若諸子百家不俟傳授。無不涉獵。一記不忘。故平日未嘗讀書。亦不以書笈相隨。而古今文籍貫通。無漏。上同生五歲。許文敬稠聞其名。到廬訪之。即呼曰。余老矣。以老字作句。即應曰。老木開花心不老。文敬擊節喟喟。此所謂奇童也。上同集本。生孩八月。自能知書。三歲能綴文。其詩云。八朔解他語。三弄能綴文。上同九日有茱萸詩云。更把茱萸仔細看。今年何似去年歡。秋風能解人間鬢。纔着霜花抹未乾。上同東峯載六經書史。涉關東山水。求得黍地。資耕力以活。無復還鄉之意。秋江持薄酒。握手嗚嗚。作詩以爲千里無相見期之別。上同做梅蘇故事。作五禽言。曰。布穀今山鳩。曰。脫敝袴與鷓鴣同。曰。欺妾婦。曰。我欲死。曰。不如歸。曰。巢燕。曰。秋鶯。○著大言小言近體二篇。大言極言大。小言極言小。以寓意。○忽於途中。見蘭委於草莽中。作詩以哀之。○洗硯後。戲題自嘲詩云。安得陶景嶺上雲。攤爲玉牋之金花。宋鐵千丈磨崖。爲端溪之金爛。蟾蜍腹裡藏洞庭。禿盡中山千首穎。其揮也風。

掃雲聚。其曳也斗轉河迴。○在山中煮菌蔬於小鐺。詩以記之。洞庭雪未消。雪底山蔬秀。採之煮小鐺。細細蚯蚓鳴。足以充吾飢。可以保餘生。可笑鍾鼎人。區區利與名。何似鐺中蔬。一味和且平。○用藥名作勸退體一篇。丈夫有遠志。歲暮行當歸。松老伏苓長。秋深山芋肥。宦情薑桂辣。世路汞鉛違。措大苦曾歷。早休忘是非。○聞山中有四禽。警於朝夕。足以感人。故作四禽言。因以警世。曰爲誰趨利。曰亦莫把空。曰不如歸。曰悲悲。○山中有我欲死鳥。作詩云。我欲死埋山岡。四月青梅如耳鐺。深林無物可以食。飛向枯枝空斷腸。禽兮禽兮奈爾何。不思夷齊飢首陽。○嘆世上富足之人。自奉猶惜。况能賑人。貫朽粟腐。引後世子孫驕奢豪俠。以至累族而已。故賦慳鬼以警之。○築室如窰。後以堵前以壁。僅容一身。列圖書筆硯於旁。名曰知命環堵。因爲銘貼諸壁。因壁爲窓。明敞可愛。外雖質野。內則端豁。○有懶治花塢詩云。積石爲塢築花塢。年年鋤治又淨掃。邇來無復事勤劬。新枝盤鬱舊枝槁。從茲不復理繁蕪。好事不如無事好。○嘗云。處身

至難。不得居於人世。有五不可。見人裝束。不以心志。而無浣污裁縫者。一不可也。得妻若妾。便作居計。治生所絆。不能於貧富自在。二不可也。又安得如陶之翟氏。梁之孟光乎。三不可也。故舊見憐。薦以一官。秩微祿薄。不能遽神。性又戇直。不能容於碌碌輩。四不可也。居於深洞。只愛山明水麗。若耕耘之事。非所介懷。出洞求活。則人便謂如前窮迫。故立身如此。五不可也。○山中有十景。一曰焚香高臥。二曰服藥導引。三曰灌園鋤蔬。四曰躬耕代祿。五曰折薪拾樵。六曰携籃采采。七曰清潭垂釣。八曰採藥深洞。九曰移床讀書。十曰放曠疎狂。○入山每於皓月中宵獨坐。誦離騷經。痛哭而返。○作夜如何二篇。夜如何其夜未央。繁星燦爛生光芒云云。末篇夜如何其夜向晨。衆星收芒餘北辰云云。○拙於生事。乞得城東數畝。種菽粟以獲。有詩云。我乞城東畝。作力代學干。唯半雀鼠耕。足啓清臣顏云云。甘處不諂驕。足以無永嘆。○有嘲釣叟二篇。一嘲太公佐周室。誅其君不能全君臣之大義。一嘲子陵守區區之節。不能補漢祖之中興。○東峰

於墻下作小圃。種草七八種。作詩八首以記之。曰苜蓿。曰山藥。曰山薺。曰黃精。曰當歸。曰子薑。曰萱草。曰紅蓼。○洪篠叢祭清寒子文。現幻術而立奇。誠我公之惡斯。○東峯居金鰲山。雪夜擁爐。寂無聲音。風竹蕭騷。與山童撥灰書字。集古人句。成山居百首。○天者顛也。高而無上。淡而無際。有氣圓轉。健行不息。日月星辰。以光明繫焉。風雨霜露。以氣化墜焉。○有樂章二篇。一曰。有雉昂君子也。二曰。兼葭思賢人也。○東峯列忠臣。追傷著贊。曰。龍逢比干。箕子夷齊。變成甯俞。王蠋申包胥。屈原張良。蘇武龔勝。李業武侯。岳飛文天祥。○清寒子云。古人處山林。飲峯啄澗。必整規矩。故出而爲一代之師。漱石枕流之意。○全州之紙。號錦江牋。梅月堂詩云。錦江春水膩魚牋。閑製新詩寫數篇。鉅筆一揮雷雨動。白雲堆裡畫龍翻。○遊關西。入平壤。西插石堦。有詩云。君不見平壤城西滄海濤。浦口石堦如削簪。巨濤鳴瀧入海濤。恰似環珮笙鏞音。又不見海堦菰蒲鄉。春苗芄芃秋稻香。八月九月稻熟時。淅玉炊雲翻匙嘗。○山中詠有地椒詩。地椒生峯

危。香辣勝蒙頂。泔之清澗月。煎此青石鼎。端坐上方窓。激我春睡醒。○有和陶淵明詩六十餘篇。名和陶。○有蕞荷詩。春前莖嫩堪爲茹。秋後根肥可作菹。今村圃多種之。味香可啖。○年十五。慈母見背。鞠於外公婆。以孤外甥愛育子焉。○有種杉詩云。東風長汝歲寒枝。兩露偏承一尺姿。種我公庭仍培土。煩君莫說衆芳欺。○有護筍詩云。春風喚起籜龍兒。抽錦穿苔介介癡。挿棘編籬防獸觸。明朝應見碧參差。○邊山有一犬。遁入岩穴。經年不出。東峯嘗遊湖南。有詩云。狺狺山犬伏岩霍。雲返松關日已斜。狗亦有心忘物外。世人何不避喧嘩。○有俯仰詩。俯仰杳無垠。其中有此身。三才叅并立。一理自分明。形役爲微物。躬行卽大君。○有綠檜詩。庭前綠檜叅天長。骨節老大剛不偻。體備松栢不隨俗。氣含芝朮清香馥。又葺松檜以爲廬。因以爲題。作詩一篇云。落葉以爲氈。枯查以爲櫺。雲霞爲帳幕。碧山爲屏風。○東峯買蓑觀漲而歸。有詩云。百錢新買綠蓑衣。觀漲溪橋帶晚歸。細雨斜風吹不斷。一肩高聳入蓬扉。○喜友生見訪。有詩云。客裡

無人吊。柴扉盡日關。無心看世事。有淚憶雲山。故舊成踈濶。親朋絕往還。喜君留半日。相對一開顏。○賦東風惡一篇。東風惡。東風惡。料峭無時休。云云。若將東風比人心。東風忸怩爲下風。○曾遊湖南。念昔遊紀地名。有詩云。望遠山無等。程途谷有鶯。香秔豐沃溝。霜橘映長城。有鶯谷驛無等。山號沃溝長城皆邑名。○有醜花美艷二篇。醜花。一曰面。二曰凹眼。三曰鼻大。四曰唇厚。五曰蓬頭。六曰竅耳。美艷。一曰絳唇。二曰桃腮。三曰柳眉。四曰雲髻。五曰金釵。六曰酥乳。○有山中草木七咏。一曰古栢。二曰山竹。三曰地椒。四曰谷蘭。五曰人參。六曰萬年松。七曰三秀芝。○自居金鰲。不喜遠遊。但優游放曠。探梅問竹。以吟醉自娛。○性偏僻。寒不乞。賤不受。效東西銘。著南北銘。粘于南北壁。○天在上而運轉。日月代明。星辰森列。寒暑之交遞。晦明之迭作。威儀也。地在下而承順。山川草木。流峙榮枯者。皆威儀也。東峯書有形之危可防。無形之危難壓。役土木修宮室。倉廩溢服用侈。俗尚浮靡。談議請高。政令朝出而暮革。不著危迹者。乃無形之危也。

上同登山則思學其高。臨水則思學其清。坐石則思學其堅。看松則思學其貞。對月則思學其明。上同德者才之本。才者德之餘。自古才有餘而德不足者。未免先貞後黷之歎。上同朝菌見日則枯。大椿八十歲爲春秋。蜉蝣朝生而暮死。瑞世之禽。千年爲一世。欲朝菌爲大椿。蜉蝣爲瑞禽。可得乎。人之老。老則死。理固然也。僥倖而得壽者。亦異物也。○聖人之語。辭簡而意豐。浮屠之說。辭煩而意虛。○同是獸也。麋鹿來塲。則人共恠之。犬羊居山。則人共訝之。以其居處不同也。○千仞之鳳。不棲於枳棘。棲枳棘則蜩鶯可以頡頏而爲之笑。必翱翔於積石琅玕之叢。然後可以呈其瑞。九淵之龍。不遊乎蹄涔。游蹄涔則蛭蠃可以掎角而爲之譏。必遊泳於禹門跳浪之層。然後可以呈其神。○夷齊意趣。與時人雖異。而其欲後世人。臣事君以忠之心。則未異也。譬諸行車。一推一輓。其使臂雖異。皆意在行車也。○窮谷曠野之獸。寒無加暖。熱無乘涼。所啖者腥膻芟藜。所以不病不夭者。以其無心於調護也。○蜘蛛集而行人至。烏鵲噪而善惡應者。人與萬物。均

稟天地之氣。同育一元之妙。雖氣稟有偏。而知覺之情。未嘗異也。故人事冥感。則異類先報。○載道者易也。發揮者占也。前乎千百世之上。後乎千百世之下。九域之內。萬像之殊。不出戶而知興廢吉凶。以其易之理備乎道。而道之體備於我也。○抑抑威儀。維德之隅。在情則為喜怒愛樂。在身則為言語動作。在容止則為揖讓升降。在章服則黼黻組繡。正衣冠。尊瞻視。儼然人望而畏也。○人主之體。與天地焉。大包而無外。如日月焉。貞明而善照。如山岳焉。厚重而難遷。如江河焉。滋潤深廣而不竭。○有為之主。必須防微杜漸。勿使禍芽長於因循。何謂禍芽。清談高論。禍之源也。宮室園囿。禍之基也。妄崇無益。禍之漸也。寵嬖內謁。禍之根也。姦佞讒諛。禍之媒也。詩酒燕傲。禍之翼也。田獵遊觀。禍之底於荷校滅頂也。○治世之政。簡而重。亂世之政。煩而輕。○古人慕親之心。未嘗頃刻忘于懷。故名辰則拜而掃之。諱朝則追而薦之。禁樵火。樹松梓。皆所以盡追慕之心也。東峯書松肪作醴。可以代酒。服雖稍苦。酒有毒。此無毒。可以安五臟。答秋江書數有大

期有小期。大期者陰陽之闔闢。小期者有一時而盡者。有一日而盡者。有一月而盡者。有一歲而盡者。有一代而盡者。時盡者氣候也。日盡者晝夜也。月盡者晦朔也。歲盡者寒暑也。代盡者人世人物同死者也。東峯書今之科文。看之則似美。究之則無趣。其辭雖流口吻。而其意如曉露春霜。○種穀自麥至粟。垂穗穎粟。以為秋穫。可數十斛。不數日盡為山鼠所損。靡有遺穗。若匱乏而糊口。以求舖餽。則士之志願墜地矣。與柳襄陽書山林之士。麻衣縑緜。僅容於踵膝。葛巾岸倒。不庇於鬢耳。山林書北辰天之樞。常居其所。以不動為氣之主。而居天之心。如輪之轂。如磨之臍。欲動不可得。東峯書延壽之術。慎言語。節飲食。省貪慾。輕睡眠。中喜怒也。蓋言語無度。則過患生。飲食失節。則瘵勞發。貪慾多。則危亂起。睡眠重。則怠惰興。喜怒失中。則不能保其性。○虞慮之際。福慶之基。宴安之時。禍毒之萌。故帝王之業。莫不以憂慮而興。逸豫而亡。○至治者。非有意於願治。以其順也。欲治而不躬行。則民畔。民畔而加箠。則危之道也。○志者。心之所之。志之所至。無堅不

入。無高不企。其指向有邪正之分。○今俗買賣。有位勢則如蠓蟻之向大陽。得威勢則如籬籬之不能俯。以佞進逢迎為喜。○數孕青山。一片白雲。作不請客。為無言伴。○晚年獨與市童狂易者遨遊。醉倒於道側。恒愚恒笑。出入無常。人莫測其涯涘。師友錄聞我光廟攝政。入居水落山精舍。見儒生則言必稱孔孟。人有問修鍊事。亦不肯說。同上遊城市則如虛舟之駕浪。遁山林則若孤雲之蕭散。東峯書祝髮入山。諸比丘推以為神師。服事頗謹。一日合辭請曰。諸生迷方願受金篋之訓。東峰曰諾。大開法筵。坐跏趺。緇流方羅跪聳聽。東峯曰。可牽一牛來。眾牽牛繫庭下。又曰。將芻束令置牛後。大笑曰。爾等欲聞法語。類此矣。緇徒赧然而退。牛於畜物中最頑。人冥迷無識者。俗人謂牛後置芻。談寂記與秋江為方外。狂吟放浪。玩弄一世。逃世於禪。不奉其法。常行過市肆。或凝睇忘歸。植立移刻。或便旋街路。群兒爭擲瓦礫以逐之。世以狂僧目之。同上入金鰲山。著書藏石室曰。後世必有知者矣。大抵述異寓意。效剪燈新話而作。即金鰲新話也。同上豎言則曰

月之往來。星辰之運行。寒暑之相推。陰陽之相代。盈虛消息。皆氣也。橫言則山川岳瀆之融結。風雨霜露之施行。草木之榮悴。人物之動息。聖賢愚迷之群分。清濁粹駁之不齊。皆氣之寓於兩間也。服氣篇服氣者。守五神從四正。五神者心肝脾腎也。四正者言行坐立之正也。同上善治之主。待君子如芝蘭。避小人如虎蛇。君子小若遇佳辰吉日。則具明水香火。禮拜古先。或臨絕壑。邀明月。揮涕忘返。清寒子句語不規規於聲律。而典章不紊。不刺刺於詞華。而大璞愈麗。序集簡易少威儀。性復多迂。故談浪以玩流俗。性跌宕不能隨世低昂。遂托迹緇素。遍歷名山。攄發胷中磊塊。以為雲眾勝業。序集入一山。勸其徒治火田。所收差饒。即刻木作桶。列置澗曲。釀酒其中。持瓢導飲。經數月乃止。其憤世多類是。序集為醫師者。苟能反置合宜。則仰天之皮。野乾之堆。可命者皆良醫也。人才說為梓匠者。苟能捨短取長。則大為棟梁。細為榱桷。扶蘇之莖。扎片之飛。皆可用美材也。同上人生天壤之間。戚戚於名利。營營於生業。如鷓鷯之戀苕。瓠瓜之繫樹。豈不哀哉。

西遊關 嘗於一深山取一勺小瓢承庵後瀑布手奉高跪自寅至酉分毫不動水若傾瀉則更改酌水自酉至寅如前跪奉錄有牙如利刀又嚙我車軻使我不得行亦復不得進上東峯臧獲田宅任人取奪曾不屑意復從其人請還身就雀鼠之庭面爭供對譏譏如市井之競竟獲卞理官券既成納袖中出門視天大笑遽出券裂投之溝中其戲人侮俗如此粹既遊關東又抵湖南則居民之富物產之實倍筵關東此皆百濟之所恃以強所驕以亡者也游湖蒼崖萬丈仰難企雷雨長此石上耳內面攀鬆外面滑摘來煩擱清似紙耳冰石美石在荆顛明月沉重淵不遇良工琢誰知無價珍東峯衣裳冠履民之皮也酒食飲饈民之膏也愛民麒麟繫牢兮犬豕跳梁鳳凰鎖籠兮雞鴨翱翔擬吊有一沙彌喉音清楚能出商聲朗咏長吟遺響裊空悽有餘感每值皓月中宵獨坐令沙彌誦離騷經一過輒泣下沾襟談寂心之神發乎目目滯於色則久視傷血腎之精發於耳耳滯於聲則久聽傷腎脾之魄發於鼻鼻滯於臭則久臭傷脾修真多言傷

膽久臥傷氣久坐傷肉久立傷腎久行傷肝上若以收視反聽瞋目窒口為極則為人之類如未化之螟蛉蟠泥之螺蛤上五歲能作詩嘗於路上有老嫗以豆腐饋之者輒吟詩曰稟質由來兩石中圓光正似日生東烹龍炮鳳雖莫及最合頭童齒豁翁自是名動一國人目之曰五歲而不敢名行親死卜其宅兆而安厝之者非風水拘忌也蓋擇其安處也一擇其土厚二擇其水深三可以茂植松梓四世更而不可耕墾五近而可以時奠五者備然後安厝之此君子所行雖枯骸安處於九泉之下亦不忘慈愛之深意也喪葬景泰乙亥讀書于三角山有人自京城而還者即閉門不出者三日一夕忽痛哭盡焚其書伴狂陷於溷側而逃遂削髮自號雪岑行天馬遇伯樂而振鬣長鳴伯牙遇鍾期而擗手盡彈東岑聖人代天地無言而行聖人不令而天地善治之主有刑無赦至治之世為政不更刑政德者行之實行者德之顯德有裕則行自著行無尤則德自光德行古之聖王卑其宮室欲民之安居也惡其衣服欲民之厚暖也菲其飲

食欲民之飽飫也。不自滿假。欲民之安逸也。小心翼翼。欲民之謹慎也。人君義人主居宮室則思萬姓之安堵。御車輿則思萬姓之和慶。尋常供御。可矜可憫。豈可妄作無益。使民顛仆溝壑乎。愛民仁政在勸農桑務本業而已。勸之之術。非煩擾出令。朝諭暮獎也。在薄賦輕徭。不奪其時而已。梅月有一言而可以終身處之者。其忠恕乎。處之忠恕。則於變於常。猶可快駿而馳通衢。雖縱橫天下。莫之防禦也。常變抗直補匡。似苦而實甘。吮舐阿承。似安而終危。近君子蔗境也。接小人饑喙也。君子小今平壤南郭。有井田界道。八家同井。癡墻廬墟。彷彿猶存。梅月有同異吟云。同異異同異異。異同同異異同。欲知同異真消息。看取高高最上峯。同日日彈琴歌白雪。決有知音者不速而來聞堂下也。無必咄咄。同清寒子行儒而迹佛。明理而該釋。上同人之生也。八辰各異。壽夭亦各有差。而同舟之人。同時沉溺。則俱葬魚腹。一陣之卒。同時敗績。則肝腦塗地者。是蓋天也。萬物運數之自然也。同清寒子一日劇然大語曰。禪理頗深。吾道自有階級。若健者之

升梯。纔舉一足。遽達一重。無頓悟快決之樂。有優遊涵泳之味。梅月天地之呼吸。冬至之後為呼。夏至之後為吸。一年之呼吸也。子以後為呼。午以後為吸。此一日之呼吸也。同寓居水落山。值雨後山水添流。拆作片紙百餘端。必擇湍急處而坐。沉吟作詩。或絕或律。或古風。書于紙放流。見遠去。且書且放。或至終日。紙盡乃還。無汝是羊外羊。我亦人外人。同是物外物。各保身外身。梅月嘗住金鰲山。效剪燈新話。著金鰲新話數券。作詩書其後云。矮屋青氈。暖有餘。滿窓梅影月。明初挑燈。永夜焚香坐。恐看人間未見書。詩夫風氣無心。遇水土之異。而自為瘴毒。人若心不守身。則觸之而自病。犯之而或死。鬼神每遊覽舊都。必徘徊躑躅。慷慨悲歌。累月忘歸。集本平壤有舌池。相傳有老嫗洗舌之處。作詩云云。小利貪來忘大恩。一言便作萬年冤。至今池水渾成血。人道癡嫗洗舌痕。同有山畚詩。石田多犂确。高下半藤蘿。縱是山深處。年年可免科。同有我不如行二篇。以自嘆云。一曰。我不如張子房。一部素書佐漢王。二曰。我不如諸葛孔明。兩章上表

輸忠誠。上同東峯平生心懷。世人未窺。為詩好使薇蕨字。亦不知其意所在。
言撫內鈍外黠。小人為質。內括外豁。君子之吉。環堵樂者適也。故君子貴和
而適。和而適。故天地萬物同其樂。天地好生之德。洽于民心。施仁之澤。流
乎四表。則風雨時。陰陽序。麒麟可羈。鵲巢可攀。梅月

金守溫

永山人。字文良。號乖崖。我世宗朝登第。光廟朝再捷科。官至領中樞
府事。諡文平。人以佞佛譏之。文章雄深奇古。有集行于世。乖崖文章。雄渾
泛駕。專倣子長之軌。舉世無與支吾。其詩亦豪健。然押韻不正。故詩不如
文。華使陳鑑東來。作喜晴賦。乖崖和之。陳嘆服。焚香盥手讀之。叢青山縣
有悅雲亭。縣在高峰巨水之間。雲常為斯亭之所對。晴亦如是。雨亦如是。
朝橫暮竄。無一日之無雲。青山未嘗無白雲。白雲未嘗無青山。青山愈青。
白雲愈白。乖崖金子固能琴者也。卸銀甲促珠徽。為鼓宮聲之數引。油油
乎若春雲之敷空。浩浩乎若薰風之拂野。又忽變之。揚而激之。如迅霆驟

雨震蕩乎山岳。驚濤巨浪蹴湧乎天地。令人辟易而毛豎。及乎皦如繹如。
以至於一成。則又如風恬波定。天開日曜。而其淳古淡澹之旨。蓋在於唐
虞三代之天矣。琴軒鷗之為鳥。乾坤江海以為家。風月古今以為生。載沉
載浮。相親相近。其來也隨潮之至。其去也隨潮之退。蓋天地間一閑物
也。本集官至一品。常騎之馬。瘦骨崢嶸。旬月之間。喪數馬。筆苑為知館事。以孟
子見梁惠王論試館儒。有一上舍。見金東峯于三角山曰。乖崖好劇。此豈
合論題。東峯曰。非此老不出此題。乃走筆與之曰。為自製者。試瞞此老。生
如其言。乖崖讀未終。遽向曰。悅卿住何寺。生不能隱。其論大畧以為。梁惠
僭王。孟子不當見云。本傳花山為嶺南諸邑之冠。府之著姓大族。蜚英中外。
位至將相者。代不乏人。則其人土產之盛。固非他邑之可比。乖崖為龜城
太守。作夢告文。蓋夢魚而托為魚告之辭。本集臨卒。人云坐化。東峯聞之笑
曰。乖崖多慾。必無是事。假有之。亦不甚貴。曾子易簣之終。子路結纓之死。
吾知其此。不知其他也。冷話

金久罔

光州人。我太宗朝再捷科。以文名世。官至直殿。與卞春亭相忤。不大顯。嘗坐事謫吉州。○久罔嘗有聯云。驛樓舉酒山當席。官渡哦詩酒滿船。卞春亭曰。當字不如臨字。金曰。南山當戶轉分明。當字有來處。春亭曰。有青山臨黃河之句。金豈不知臨字之妙乎。金終不屈。終以一字之故。不相能。然臨字不如當字之穩。詩話久罔以能詩著稱。卞春亭主斯文。金多短之。春亭頗不悅。嘗有詩誚金曰。賈島文章少日事。橫渠學問晚年時。蓋金少為僧。賈島亦少為僧。橫渠晚逃佛老。故云。一時傳笑。筆苑自古詩人喜相傾軋。卞春亭嘗自矜。虛白連天江郡曉。暗黃浮地柳堤春。一聯謂有神助。金久罔曰。予亦嘗得。淡白流青溪映草。嬌黃漾綠柳韞烟。風引淡烟遮碧柳。雲拖清雨折紅蕖。何如所得。春亭默然不悅。金遂不大用。詩話

金原柱

永興人。國初倭寇宣州。泥城萬戶金原柱率兵赴援。突入賊中。為賊所害。

諫官上言。原柱突衝陷陣。矢盡力窮。以一身之死。易萬民之命。其功烈烈。死且不朽。乞追贈立祠。收錄子孫。慰獎忠魂。教可。行寶

金希壽

安東人。字夢禎。登第。歷敷清要。官至觀察使。善楷書。甚有法度。子魯登第。官至僉知。又善書。多有父風。

金宗瑞

安東人。登第。英廟十九年。為咸吉道都節制使。上築行營。便宜疏。遂置四鎮。文廟臨薨。命為相。與皇甫仁同受顧命。魯山癸酉。光廟定謀靖難。乃誅之。○金宗瑞築行城于六鎮。上疏陳其便否。以龍城為界者。有一不義。有二不利。蹙先祖之地。一不義也。無山川之險。無守禦之便。二不利也。以豆滿江為界者。有一大義。有二大利。復興王之地。一大義也。據長江之險。有守禦之便。二大利也。疏入。我英廟遣中使慰諭曰。今見卿書。北方之事。可無憂矣。寶鑑金宗瑞既設六鎮。徙南民以實之。日置酒張樂。大

饗將士。吏民苦之。或言其不可。乃曰。風沙絕塞。將士飢苦。以約試後必無終。一日夜宴。反側之徒。射中酒樽。左右驚擾。宗瑞自若曰。奸人欲試我。何能為哉。粹言我英廟建置六鎮。以金宗瑞為觀察使。委任之。瓜滿。移授本道都節制使。宗瑞母死。上馳駟召宗瑞。且賻紙與棺槨。過百日後。起復還任。宗瑞辭不許。令政院勸肉送之。東閣記我光廟率武士楊汀柳洙及宮奴林芸等。乘昏往宗瑞家。迎拜閑話畢。送至門立庭中。又話良久。子承珪不離左右。光廟紗帽角覺盡落。光廟曰。請借政承角。宗瑞使承珪入內取角。於是芸等擊宗瑞仆地。承珪奔救伏於宗瑞上。又擊殺之。宗瑞復甦。匿于宗珪閨中。曳出斬之。同上

金訢

延安人。字君節。號顏樂堂。我成廟朝。擢辛卯科壯元。有文名。官至叅議。早歿。三子皆登第。申從韻云。文章簡古雅潔。又能於詩。尤工排律。○我成廟朝。直提學金訢進獻其外祖成概所書魏徵十思疏。兼進筍子。以寓

規儆之意。上手札金牋以賜曰。徵之此言。實萬世之著龜。爾父勸汝以魏徵自許。爾又勸予以唐虞同治。可為父愛其子。臣愛其君者也。遂賞職而褒之。錄嘗奉使日本。海中遇風濤。舟出沒如鳧鷖。同舟之人。皆蒼皇叫呼。訢獨端坐讀書。怡然如在閨閣。客不動心。世稿三魁集

金礪石

嘗入侍。光廟下教曰。酒令人狂。爾勿嗜。驕使人慢。爾勿驕。慾不可滋。爾其忍之。仍命崔恒書母嗜飲。母驕矜。母嗜慾九字。以賜之。出虛白亭集

金墩

安東人。中贊方慶之後。自少力學。我英廟在潛邸。聞其名。召之。金墩辭焉。及登第。上引見曰。我欲見卿。卿避我。今則為我臣矣。為母屢求補外。特賜驛騎。奉母來京。以便孝養。士林榮之。墩精於儀象。上製簡儀臺。報漏閣。墩與焉。為承旨。凡七年。○李叔蕃得罪。謫咸陽。以純金帶寄贈都承旨金墩。請得還都。金墩欲受而難其請。每入朝。手摩其帶。時方撰龍飛御

天歌。英廟問詳知先朝時事者。金舉李以對。即命召還。既撰訖。命還
 貶所。墩竟不能受其帶。錄鎖我英廟命金墩金銚。創欽敬閣。取書欽若天
 道。敬授人時之義。名之。其制於殿庭建小閣一間。糊紙爲山。高七尺許。閣
 中內設玉漏機輪。以水激之。又作四神十二神。鼓人鍾人司辰玉女。凡百
 機關。不由人力。自擊自行。自若使然。天日之度。晷漏之刻。上與天行。不差
 毫釐。又山之四旁。依函風七月詩。四時之景。刻木爲人物鳥獸草木之形。
 按其節候而布之。以見民生稼穡之艱。名曰欽敬閣。寶鑑國家置漏器。名曰
 報漏閣。設坐二層三神在上。司時者鳴鍾。司更者鳴鼓。司點者鳴鈺。金墩記

金紐

安東人。字子固。號琴軒。我光廟朝登第。又擢重試。登俊試二科。爲吏曹
 叅判。能詩善書能琴。人以三絕目之。又曉音律。嘗於泮宮北谷。作雙溪齋。
 每春邀朋賦詩。酣歌自適。○樂者體乎性情而爲之也。清濁高下疾徐。豈
 言語文字之可載。而性情之發之妙。則又有如風之捕如雷之追。雖游夏

命文班馬操觚。亦不若之矣。其人亡則性情之道亦隨而亡。琴軒記子固構

書齋于雙溪。以琴書自娛。其澄神靜慮。保真養性。雖山林隱逸之士。無以
 過之。賦序有晒衲詩云。青松手植老龍鱗。晒衲枝頭絕點塵。只恐夜來還有
 礙。葉間明月損真身。詩話

金壽童

安東人。字眉叟。方慶之後。我成廟朝登第。性端重溫雅。叅靖國功。官至
 領議政。諡文敬。○金議政壽童。端重多智。自爲儒生至相。人莫議其是非。
 當燕山凶殘之時。亦能隨時低昂。上不獲罪。下能活人。搢紳之士。多賴以
 全。及舉義之日。成希顏往諭其家。不詭隨。不躁動。從容審度而行。士林皆
 服其量。陰崖雜記左議政金壽童等。率六曹叅判以上啓曰。舉義時。先除慎守
 謹者。欲以成大事也。今者守謹之女。入侍大內。人心危疑。請割恩出外。傳
 曰。所啓甚當。然糟糠之妻。何以爲之。再啓曰。臣等亦已料之矣。然於宗社
 大計何。請快決無留。傳曰。宗社至重。何計私情。當從群議。即夕慎氏出寓

河城尉鄭顯祖家。東閣記燕山廢時。成希顏往右相金壽童家以告。右相曰。此國之大事。吾初不知首末。遽從一宰樞之言而奔走可乎。即臥于枕曰。君持吾首去。成公告以立大君之意。則右相曰。然則吾當往矣。出行錄

金麟厚

蔚山人。字厚之。自號河西。我中廟朝登第。選入弘文館。轉至修撰。及仁廟賓天。以疾屢徵不起。常慨念時事。托於詩酒以寓懷。有集行于世。○河西六歲能詩。客至曰。汝可作小詩。因指天為題。即書曰。形圓至大又窮玄。浩浩空空繞地邊。覆幬中間容萬物。杞國何為恐顛連。本祠堂之美。祭享之腆。必罄其誠。朔望之叅。時物之薦。終始無間。行跡孝陵禮陟之日。竟夕愀然。乃有詩云。我心不可轉。世事東流水。泯泯幾春秋。至今猶不死。同上

金應箕

善山人。字伯春。知中樞府事之慶之子。我成廟朝登第。性端謹。動循規度。平生無疾言遽色。大為成廟所重。官至右議政。諡文戴。○我中廟

癸酉。兩司玉堂請復昭陵。廷爭踰月。得允復仁號。卜吉遷葬于顯陵。同塋異原。提調金應箕。宋軼等。竣事後啓曰。臣等當初深慮久遠。腐朽無餘。及開審則內外梓宮俱存。歛襲完全。然年久只存形骸。故改以新梓宮新衣櫛。凡事無憾。且歛時宮人及內官雖進去。而此莫大之事。不可不親監。故臣等親監歛襲衣。初葬于安山。號昭陵。光廟丙子。成三問之亂。后之母崔氏。及其弟權自新。被極刑。因并廢后梓宮。移厝水濱。居民僅識其處。至是遷葬復位號。雜記

金孟性

海平人。字善源。號止止堂。我成廟朝。遺逸舉後登第。官至吏曹正郎。有操行。以事謫高陽。詩語冲澹閑雅。有集行世。

金允壽

善山人。我英廟朝登武科。為人倜儻。不事產業。鎮北界二十餘年。野人懾服。初赴北界。妻有娠生子。年十八。往省父始相見。官至中樞府事。

金峙

善山人。字基甫。辛禡朝登第。入本朝。官至金海府使。退居府城西延鳳里。教授子弟。又作家廟。以奉祭祀。鄉人化之。

金從理

善山人。我太祖五年登第。官至藝文館直提學。陽村有薦書。頓首上言。臣所撰次禮記淺見錄。本經正文及陳氏集說。數百萬言。今臣僭著先後之次。并付臆見之說。亦不下數萬言。厘爲二十六卷。自臣作稿。已踰十年。未能正寫。常自以爲必更數年。然後可寫。今蒙主上殿下特命繕寫。前教授臣金泮前縣監臣金從理等。自今年八月承命以後。每日早晨來至臣家。終日繕寫。未嘗一日暫廢。甫踰三朔。乃於今月十七日。俱以畢書。其敬上命。勤謹不怠。誠可嘉賞。且泮精敏。從理篤實。皆好學問。孜孜無倦。或任文翰。或任世務。伏望殿下特下吏曹。量宜注擬。以旌其勤。以勸于後。不勝幸甚。陽村薦書

金叔滋

佔畢齋之父

善山人。字子培。嘗遊學於吉再門下。學問高詣。爲一代名儒。我英廟朝登第。晚年罷官南還。構草堂於凝川上。放情丘壑。惟意所如。自號江湖散人。官至成均司藝。○公性本恬淡。不屑屑於事爲之末。人或以爲迂濶。而大節則確然不撓。處世六十餘年。無一行欠缺者。○常訓子弟曰。人有言人之過失及議國事。初雖同坐當避之。聞人過惡。如聞父母之名。耳可得聞。口不可言。汝曹當以伏波之戒書諸紳。終身省之。○以讀書法。訓子弟曰。勿謂古人糟粕。務要體認自家分內事。窮而行已。達而治人。一以聖賢爲法。雖愚孩樸鈍。必淳淳叩兩端。令開悟。而後已。○平居每清晨而起。盥濯衣服冠而坐。雖妻子婢僕。不見其惰慢之容。雖無賓客。頭不脫冠。腰不脫鞞。衣服鞍具。不貴鮮麗。只要儉素堅緻而已。轡絡韉繫若絕。則以麻繩代之。○公著述簡潔精緻。其志辭命意。一字不苟。常訓讀書之法。曰讀書慎勿龜心大膽。容易放過。須仔細看破。○公爲人。動靜語默。皆律以規矩。

奉親以孝。敦行孝悌。○公誨人不倦。先入之小學。使之從事於愛親敬長。隆師親友之間。以涵養其本源。然後許取他書。故其教不煩捶楚。而人樂於學。○公於祭祀。凡所羞饌具。務令精潔。戒飭膳人。雖魚肉之片段。不祭不得與兒童猫犬食。○公於奉宗廟。曲致誠敬。凡國家大事。及水火盜賊婚娶死生。必以告。○嘗嘆曰。今俗忌日之祭。不以肉爲羞。子孫則以忌日爲終身之喪。不忍食肉可也。死者有何喪。○公於祭祀。曲致誠敬。雖窮迫之際。儀物有加而無減。在道路必載主於竹轎而自隨。○公爲縣。不求赫赫名。專以革汚俗興六行爲首務。大理學校。至於犧尊簠簋倚卓。鋤坵無不精完。必親詣釋奠。凡奠需預畜之。至於菱茨脯醢。罔有闕焉。○宰縣時。凡祭犧牲粢盛醴齊。必令豐腆。乃曰。吾爲專城之主。壤地雖偏小。豈乏吾祭之需。豐于享祀。何傷於廉。於是邑人皆感化焉。○於墓祭。則前期上墓。繞塋域三匝。艾薙草木。祭畢盤桓眺望。如有求而不得。至暮乃歸。○爲縣時。救荒則必急於水火。乃曰。昔韓詔活溝壑民。欲含笑入地。汲黯矯制開

倉。而無辭於罪。苟存心萬民。何懼於法。發軍須必賑給之。民感其惠。秋熟不煩鞭扑悉償之。○爲縣時。每春秋躬出入阡陌。巡視堤堰。民乏種者貸之。乏食者賙之。勤者慰。而惰者懲之。○公爲縣倅。其叙吏胥。作爲約束。雖簿書之微。明於檢覈。故吏不敢售其奸。○公在開寧。築灰洞松谷松林三陂。溉田七八百頃。至今民賴其利。○公爲縣時。乃曰。四時改火。守令視爲文具。此乃先王裁成輔相之事。且火之久者。薰爲癘疫。愛民者所當急也。每候至。令鑽木於廳事前。令布民戶。○爲縣時。必申明隣保之法。窮里僻村。皆設捕盜關。以故盜入境未信宿。而輒爲所擒。○爲縣時。有人餽節菓者。公受之曰。若酒食財賂。誠不可受。至若苾菓。乃節物也。以吾爲地主。故禮遺之以欲其嘗。彼豈以一苾菓干利於我。豈以一苾菓輕重吾政哉。○爲縣時。其於救荒。必揀勤厚人。持饘粥候於道路。見癯疾者輒施之。以故闔境全活。民無捐瘠。○爲縣時。遭世宗喪。向闕哀臨。罄其至情。又遭文宗喪。悲泣尤切。曰。嗟嗟乎。嗣君觀者爲之感動。○高靈縣歲貢白砂器。器

多苦窳。官被詰責。公爲縣。召語工人曰。舜陶河濱。胡公利器用。是豈少哉。若等妻子。知餅造餌。篩之數重。則米屑潔。搓按良久。則脉理膩緻。其用功。與此何殊。遂教其九篩之法。器之精緻鮮潔。無出其右。至今賴之。○爲縣必栽桑於官之隙地。令民來取種焉。○嘗言。世人以我爲拙。安知拙者誠吾之大寶。予因樂受而無辭焉。○爲縣時。有失時不稼者。爲給資裝。令醮之。○公精於易學。子弟來受業。則常於案上樸著。布卦以教之。○丁憂廬塋側。寒暑一褐一屨。身不脫經帶。枕苫蔬糲。終始不懈。○嘗在官。語人曰。吾行將謝事。開三徑撫松菊。每於春時。帶笊筲拾蟹蛤。蟹蛤何曾飛且走耶。○高麗時。諸郡州戶長。或本貫之俗。強梗不遵法度。遂至蕩弛。欲綏治而鎮服之。則自大官謝事于朝。還爲戶長。夾輔守宰。以聽民治焉。○公爲人。端方而簡直。居官以廉。聽訟以清。○著述精緻。爲詩工於下字。然觸興則爲之。不强爲也。並錄

金宗直

善山人。字季昱。淑滋之子。自號佔畢齋。我光廟朝登第。操履端慤。學問精深。文章高古。爲一世儒宗。誨人不倦。前後名士。多出其門。成廟重之。擢置經筵。以至刑曹判書。使所在官。特賜米穀。卒諡文簡。燕士戊午禍及。泉壤焚滅遺文。後收拾灰燼。刊行于世。○公天分甚高。總角已有能詩聲。日記數千言。年未弱冠。文名大振。誌丁憂服闋。築書堂於金山黃岳之下。池其傍而種蓮。扁其堂曰景濂。蓋慕無極翁也。日吟哦其中。似無意人事。碑公嘗入槐院。魚咸從子益爲本院先進。見公詩大嘆曰。使我執鞭爲奴隸。嘗甘受之。碑公入侍經筵。語不長而意暢。講讀最善。故眷注偏傾。碑公爲人短小。魚子敬戲之曰。人若恟奪其才思。則直一童蒙耳。聞者胡盧。同上公天性至孝。先考公病且瘦。公憂傷。作籲天賦。同上公之父學於吉再。一時之士皆受業於宗直之門。同心協志。以類相從。李承健時爲翰林。書之史曰。南人互相吹噓。師譽子弟。子弟譽師。自作一黨。其後李克墩見承健史草。每稱我直筆。儒先佔畢齋行到踏溪驛。夢見神人披七章之服。自言楚

懷王爲西楚霸王所弑。沉之郴江。因忽不見。余覺之愕然曰。懷王南楚之人也。余則東夷之人也。地之相去。不啻萬有餘里。世之先後。亦千有餘載。來感于夢寐。茲何祥也。考之史無投江之語。豈羽使人潛投其屍于水歟。遂作吊義帝文以悲之。弘治戊午七月十七日傳曰。金宗直草茅賤士。登第以至刑曹判書。寵恩傾朝。今其弟子金駟孫所修史草內。以不道之言。誣錄先王朝事。又載其師宗直吊義帝文。曰以寓忠憤。此宗直陰蓄不臣之心。非一朝一夕之故。其議刑名以啓。七月二十七日。以亂逆伏誅。告宗廟。本傳柳子光遊咸陽作詩。屬郡宰鏤版而懸之。佔畢齋守是郡曰。何物子光。乃敢爲懸板。命撤而焚之。及戊午禍起。先生追被極刑。並撤去環翠亭記。世以爲報咸陽之怨也。本傳咸陽郡年年上供茶。茶不產本郡。每賦於民。民持價買納。佔畢齋初到郡。知其弊。手閱三國史。見新羅時得茶種於唐。蒔智異山。曰郡在此山之下。豈無羅時遺種。訪諸父老。果得數叢於巖。川北竹林中。令建茶園于其地。纔數年。頗蕃數遍于園內。先生作茶園詩二

首以記之。本集咸陽郡有學士樓。崔學士致遠爲郡守時所登賞。後人因名曰學士樓。樓下有梅一株。雖半枯而朽。枝梢尙老硬。每歲花最早。佔畢齋到郡見而愛之。遂題詩云。學士樓前獨立仙。相逢一笑故依然。肩輿欲過還攀慰。今歲春風太劇顛。蓋懼其爲風所倒也。同黃山江上流有都要渚。沿江居民。幾二百戶。廬舍密比。藩籬相接。不事農業。專治舟楫。捕魚商販。以爲財產。其俗淳朴。一家有客。則諸家備酒饌爲禮。凡婚嫁喪祭皆然。若有淫行。則會議瀦其室。載舟中泛而黜之。同著東都樂府七首。一曰會蘇曲。二曰憂息曲。三曰鷄述嶺。四曰怗怗歌。五曰陽山歌。六曰確樂。七曰黃昌郎。同送人日本詩云。蠻衢井井分三町。註日本都中道路。皆傍通四達。每丁町有中路。三町爲一條。條中大路井井。凡九條。同佔畢齋詩云。烏味劉將盡。註烏味草。東人號爲烏乙背。生下田中。或如指大。或如彈丸。可蒸食。亦可生食。旱甚民飢。則掘而食之。疑此則范文正公所進烏味草也。味與背同音。東人語轉而云烏乙背。同公有日本硯詩云。銅鑄玉骨妙秋毫。

海泊年年索價高。色似馬肝能潑墨。滑勝龍尾恐飛騰。註硯四隅刻栗葉。其垠墉及栗葉極工。上同橘柚產于濟州。年年來貢。公作毛羅歌。萬家橘柚飽清霜。採著筠籠渡海來。大官擊向彤墀進。宛宛猶全色味香。上同烏梅玳瑁黑珊瑚。附子青皮天下無。物產非惟東府庫。精英盡入活人須。佔畢齋作毛羅歌十四篇。畧記風土物產。上同羅月上人常懷一海螺。或山林或城邑。輒吹之。人聞其聲即知上人之來。自以為螺僧。先生作詩贈之曰。他年許入紅流洞。須遣螺音出翠嵐。上同姜仁齋養花錄云。都下梅花栽接者。皆千葉紅白梅。結實多雙。即譜所謂重葉梅也。佔畢齋云。墻下有一花。如千葉桃。色有淺深。人云此乃千葉紅梅。殊不類於梅。上同智異山西北有豬淵。魚產于此。每秋下龍游潭。每春還于淵。漁者設網巖瀑間。魚騰躍落網中。背文若袈娑。故袈娑魚。佔畢齋有袈娑魚詩。上同冶隱之孫仁種所乘驪馬死埋之後苑。人謂有乃祖風。佔畢齋有詩云。清白真能遺子孫。上同爲人有田隱四時咏。一曰梅坡春色。二曰竹窓夏風。三曰菊庭秋月。四曰松臺冬

雪。上同金剛雄於東。妙香雄於北。九月雄於西南。登頭流則三雄之在眼底。猶培塿然。遊山錄和陶淵明秫酒詩。誅劉裕篡弒之罪。發淵明忠憤之志。集本俞勉田可植鄭之澹。居于善山府延鳳里。俱擢壯元。名其里曰壯元坊。佔畢齋有詩。鄉人從古重膠庠。翹楚年年貢舜廊。一片城西延鳳里。行人指點壯元坊。上同崔先生漢公台甫。與佔畢齋季昱同赴會試。先生曰。君子高必占巍科。吾無附驥之望。佔畢齋曰。昔孫僅與弟何同試。兄爲榜頭。弟次之。吾二人安知不爲僅何。因賦一絕曰。池塘春草雨痕多。人道吾行是僅何。莫道過門春色晚。滿城桃李未開花。是歲皆登第。錄佔畢齋因雨留增若驛。有詩云。增若驛中三日雨。戊戌夜半一聲雷。不辭衣服冠而坐。其奈飢寒渴并來。又寒食日雨詩。休誇故里印累累。雀鼠紛紜莫敢揆。四十七年頭欲雪。一百五日雨如絲。前詩起聯。後詩領聯。皆欲側字。而詩語帖妥。上同成化壬寅間。開寧人耕田得石佛。耳目口鼻皆泯滅。置之田畔。偶有病喘人拜之。病若輕歇。遂以爲靈。男女雜沓。持美布香燭者。日夜不絕。有僧

來住之。金山太守李仁亨聞之。遣吏卒捕逐之。佔畢齋以詩賀守云。拋擲田萊不記春。頑然拳石有何神。初如求食木居士。漸作撞錢土舍人。男女幾家傳污染。香燈一里欲因循。我侯直是邠州守。擊破妖邪震四隣。自註云。昔王嗣宗守邠州。擒殺神祠下妖狐。時人美之。至有聖朝方信有英雄之句。今之石佛。其恠愈於妖狐。而捕逐妖骨。焚毀紙錢。使愚民曉然知其為所誤。真曠世一奇事也。同佔畢齋由為親老。作宰咸陽。姜晋山以詩送之云。多君乞郡阻清班。好向庭闈罄一歡。五鼎縱來知匹奈。終天永慕泣鍾癢。借用泣鍾痕事。世稿見禁中白鷓。有詩云。紅蓼蒼苔映雪衣。御溝清淺欠危機。秋風偷看省雲漢。舊侶微茫何處飛。註因物以自况。詩格自少以文章名世。尤長於詩。精深醞藉。不落俗人窠臼中。推為近代詩祖。我成廟御書褒之曰。文章經濟。可謂雙美。同睡晤詩云。今日無官返我初。小窓幽夢到華胥。一爐蒼朮薰書字。分付清風自倦舒。時以病解官。意思閑遠。同上頭流山有蟹踰嶺船岩。相傳。上古海水懷襄時。船繫于茲岩。而螃蟹過之。

故名。渚山海島。或全露或半露。如人在帳中而露其髻也。遊頭流山錄判院李邊常以骨鯁自許。謂人曰。吾平生未嘗欺人。自入仕以來。無一偽病廢事。佔畢齋曰。古人仕者。以病托君者。前後比比。疑此言過當也。冷話公文章道德。為一代搢紳領袖。朝廷有事則問焉。學者有疑則質焉。秋江集金宗直喜獎進後學。多有成就。金宏弼鄭汝昌以道學名。金駟孫權五福曹偉俞仁好等以文章顯。其餘指授蹊經成名者甚衆。戊午事蹟公為先大夫撰一錄。先之以譜圖。次之以紀年。又次之以師友。及平生蒞官行事與夫訓戒之辭。家廟祭儀之可法者。目之曰彙尊錄。蓋取諸禮施于蒸彝鼎之義也。本序佔畢齋友愛天至。伯氏病癰。醫云。蚯蚓汁最良。公先嘗以進。果效。墓誌河鼓之居河為關。相望脉脉一水間。一年三百六十日。除却此言長為鰥。七夕吾東人詩格律。自羅季至麗末。無慮三變。其間識風教形美刺。開闔抑揚。深得性情之正。可以頡頏於唐宋模範於後世者。亦不少。金快軒台鉉崔槐山瀆趙石澗云。仵各有選集。石澗略快軒雜。惟槐山之編。頗為得體。風雅國朝序

丙申館閣諸公建白選文臣年少聰敏者給暇讀書蔡壽權健等六人在選常時朝參皆不與時謂之文章接本集註迎日縣東十里有都祈野野有日月之池人稱新羅時祭天之地迎日縣記高麗惠宗面有席紋故世稱皺王佔畢齋詩濯錦江邊舅氏鄉興龍寺裡藹祥光至今父老懷遺德簫鼓歡娛皺大王勝覽

金宏弼

瑞興人字大猷號寒暄堂中生員試嘗從佔界齋受業授以小學平生以小學律己精於性理之學以興起斯文訓迪後生爲己任甲寅以遺逸薦授叅奉擢拜刑曹佐郎燕山戊午史禍起以佔畢門徒配熙川又移順天甲子加罪中廟初例贈都承旨十三年特加贈右議政諡文敬先生謫熙川趙靜庵從往之遊得聞爲學大方久而歸目送之曰吾道東矣碑東序方士人皆以文詞爲業其潛心性理之學求濂洛關閩之緒自先生始戊午事蹟先生性學淵源謹獨不倦嘗謂辛永禧德優曰於君欲絕交而情不忍

問之則曰伯恭伯源皆有晉風晉以清談累不出十年禍在此輩予誓自今不復來往後皆不保師友錄先生獨行無比平居必冠帶人定然後就寢鷄初鳴則起同上先生常戴草笠垂蓮子纓晚年靜處一室對案觀書夜深不寐惟聞蓮纓抵書案有輕輕聲因知其尙觀書也儒先錄先生爲學精積力久確而不滯通而不流平生出就書堂危坐如泥塑行狀先生鷄鳴而起終日危坐講習不懈雖家人未嘗見其惰容同上先生家範有居家儀內外鷄初鳴咸起櫛頰冠帶男事乎外女事乎內男不入女不出本一曰司春任家禮二曰司夏任家貨三曰司秋任家刑四曰司冬任家膳又有賞刑赦肯本婢主內事一曰主庖以善飪者爲之男亦號曰典庖僕隸任家膳者曰司冬先生做內則作家範制爲儀節訓示子孫訓迪之方尤重彝倫下至婢僕分別內外職皆有名號內事以婢主之曰都主曰主績曰主辭曰主庖外事以奴典之曰都典曰典辭曰典廝量才授任拜跪業作皆有定規一升一降有賞有罰吉凶之儲因貧富而優約每朔望親行讀書之

禮未施行而禍作。景賢錄先生受小學於佔畢齋。作讀小學詩云。業文猶未識天機。小學書中悟昨非。從此盡心供子職。區區何用羨輕肥。佔畢齋批云。此言乃作聖根基。上同先生與一蠹志同道合。特相友善。每相遇。與之講劇道義。商確古今。或至達曙。上同一蠹出宰安陰縣。寒暄往訪。一蠹置一金盞。寒暄責之曰。不意公作此無益事。後必以此誤人。其後邑宰果以此坐臧云。上同先生禍及謫所。聞命沐浴具冠帶。神色不變。偶屢脫。既還著。以手理其鬚。啣之曰。身體髮膚。受之父母。不可并此受害。然後乃就。上同引古語訓諸子。嘗曰。言人之惡。如啣血噴人。先污其口。上同嘗教諸女曰。異日往之汝家。遇娣姒。必須敬慎。惟恐失兄弟懽心。上同得不傳之學。毅然特立。一時學者尊如山斗。雖不及就門私淑。而善者亦多。上同與童子數輩。讀書城南別墅。醒狂子南秋江共訪。作詩贈之曰。世路自多歧。後進爭長往。繁辭更啁啾。異說紛擾攘。龍門餘韻絕。我懷誰滌蕩。吾子固囂囂。瑤琴性所尚。三月解忘味。暗香徒像想。上同先生以訓迪後生爲己任。遠近聞風來集。學徒

填溢。每日執經升堂。坐不能容。上同先生與友同棲。鷄初鳴。共坐數息。他人讒過一炊皆失。獨先生歷歷枚數。向明不失。上同授小學於佔畢齋。佔畢齋曰。光風霽月。亦不出此。先生服膺不忘。上同先生平居櫛盥整衣冠。先拜家廟。遭戊午獄。謫熙川。俄移順天。時禍機叵測。處之晏如。不變常操。上同先生先世墳塋。年久圯壞。謂門諸族曰。先塋如此。子孫宜護禁。又於令節以時羞告虔。又講睦。不亦可乎。於是莫不樂從。永爲恒式。上同先生喜讀韓昌黎文。每至張中承傳後叙。巡呼雲曰。南八男兒死耳。不可爲不義生。未嘗不三復流涕。上同立風縣有俗號台離山。先生居此山下。時人以先生之故。呼爲戴泥。言其尊奉聖道若戴也。上同先生始號蓑翁。曰。雖逢大雨。外濕而內不濡。旣而改之曰。爲名似露。非渾然處世之道也。遂改之。上同先生謫順天。竟被殺。府人立景賢堂以祀之。李龜巖撰景賢錄。本伽椰山西有末谷村。一云末谷鄉。先生嘗卜築修學。金慕齋按慶尙。過此谷。有詩云。聞有金公棲築處。椰山應是武夷山。本集偕謫同遷。共配昇平。先生祭文戊午謫熙川。梅

磻謫義州。庚申同移配于昇平府。故云。○金大猷以小學律身。以古聖賢為準則。招來後學。恂恂然執洒掃之禮。修六藝之學者。滿於前後。謗議將騰。猶不止。冷話先生有路傍松詩云。一老蒼髯任路塵。勞勞迎送往來賓。歲寒與爾同心事。經過人中見幾人。景賢錄

金淨

慶州人。字元冲。號冲庵。我中廟二年擢壯元。歷敷清要。為親乞補淳昌。與潭陽府使朴祥聯名上疏。請復慎氏。朝議指以為邪論。竟被罪。丁丑擢授副提學。己卯夏陞刑曹判書。及禍作。杖配濟州。賜自盡。公天性忠孝。學問精深。臨死顏色不變。貽書兄弟。以善養老母勉之。公無後。以兄子哲葆為後。哲葆之孫聲發登文科。公之堂姪應教天宇。收遺稿若干編。為冲庵集。刊行于世。已卯錄後命復官爵。諡文簡。○先生臨絕。呼酒快飲。吟臨絕辭一篇以見意。其辭曰。投絕域兮作孤魂。遺慈母兮隔天倫。遭斯世兮殞余身。乘雲氣兮歷帝閭。從屈原兮高逍遙。長夜冥兮何時朝。耿丹衷兮埋草

萊。堂堂壯志兮中途摧。千秋萬歲兮應我哀。本錄著十二箴。一曰言。二曰行。

三曰志。四曰勇。五曰慮。六曰逸樂。七曰憂懼。八曰欲。九曰儀容。十曰忿恨。

十一曰好惡。本集玄豹隱於霧雨。狐狸輕之。然其號嘯長風。百獸破膽。夫成

文而出山者。玄豹之靈也。闇然而日章者。君子之道也。明見蚊睫之飛虫。

而不悟坐榻之將傾。聰聽床下之蟻鬪。而不覺頭上之霹靂。十一箴被七寶

之服。而臥於糞溷。則人皆掩鼻而避之。行箴世有大勇者。毀之而不怒。犯之

而不驚。辱之而不屑。夫勇於行義。故忿懣之事不入于懷。勇箴盛壯不力。腐

草俱泯。蜉蝣之羽。薨薨朝暮。飄風過之。則不見蹤跡。逸樂箴名不與謗期。而

謗隨之。利不與爭期。而爭及之。富不與怨期。而怨逮之。欲之在人。比如火

之始然。其初形氣甚微。人皆玩而易之。及其既熾也。撲之而不滅。雖傾以

彭蠡。呂梁之波。亦夫易救也。欲箴輕浮之徒。求入於德。比如適海而乘輦。望

翼而豢羊。容儀箴德人無累。平若秋水。躁者怵迫。吼若巨岳。忿恨箴投鼠不中。

則終日踴躍。揮蚊不去。則終夕不寐。心有不激。則慊然不平者。人情之常

也。同上君子德不離身。故身不近殆。行公天性純粹。外醇內敏。於書史讀數遍。輒誦。為文章精深灑噩。遠追西漢。詩學盛唐。嘗入俗離山。沉潛經傳。為居敬主靜之學。好賢樂善。出於天性。不顧生產。不通關節。俸祿均領於族親。其在謫中。語子弟曰。余平生處心。不愧幽獨。而今得奇禍。汝等無以我自怠也。公之落南也。道過淳昌。淳昌之民。爭持酒饌。攔道涕泣曰。吾舊使君也。仁廟末。命復公爵。宣廟朝。贈諡文簡。已卯當其年少之時。恃其長久。荒樂窮年。至其既老。悔其無成。比如奔蛇入穴。不沒其尾。欲挽而回之。吁亦脫矣。十一正德乙亥。章敬賓天。秋金淨朴祥抗疏請復慎氏。大諫李荇大司憲權敏手指以為邪論。擬於死罪。趙靜庵初拜正言。直斥李權。大司諫李長坤大諫金安老右靜庵之議。時安老在玉堂。亦不分辨。做出兩是之議。以為光祖為言路扶植。李權為宗社請罪云云。當時廷議互相是非。及至己卯。其禍尤酷。黨籍沖庵嘗守淳昌。李沆為承旨寄書。具衙署。公題詩一絕于簡後。而復之曰。曾同書榻。又鑿署。流落南荒。一病軀。

天上華術承旨李。臨題記憶故人無。沆以此啣之。常欲殺之。本錄杖流濟州。至海南南岸。憇路傍松下。吟成三絕。白松木而書之。其中二絕云。海風吹去悲聲遠。山月高來瘦影疎。賴有直根泉下到。雪霜標格未全除。又云。欲庇炎程喝死民。遠辭岩壑屈長身。樵斧日尋商火灸。知功如政亦無人。士林傳誦莫不憐之。撫先生雅好泉石。每遇佳山勝水。倘佯忘返。翛然有出塵之想。行金沖庵新羅敬順王之後。生有異質。數歲知讀書習字。未及髫髻。能誦大學。勉力學問。慷慨有大志。年十五而孤。喪制一從禮文。事母誠孝。十九中司馬。二十二擢文科第一。歷教清要。乞外補淳昌。與朴祥上疏請復慎氏。辭甚剴切。李荇權敏手指為邪論。請拿致王獄。事將叵測。賴大臣之救。徒配報恩。翌年賜還。又入玉堂為應教典翰。特命陞副提學。聞命震悚。決意求退。時中廟崇獎儒術。而靜庵先生方為上下所倚重。思與公協力贊襄。始書敦勉。公遂強起。俄命增秩。為吏曹叅判。為老親乞辭歸養。不許。受由歸覲。上疏辭職。願力耕給母。討究典墳。為他日陳力。

之地。不惟不之許。又陞資憲。以刑曹判書召焉。公控疏力辭。而不得命。其所以革弊興化。無所不用其力。而於君子小人進退之機。尤致力焉。凡建白設施。未免失於欲速。而至於追奪靖國功臣之濫叅者。曾增讐怨。陰伺間隙。已卯十一月十五日。夜。公與趙光祖等同下獄。諸公皆以為必死。相與酌酒永訣。是夜長天無雲。明月滿庭。公有詩曰。重泉此夜長歸客。空留明月照人間。翌日。供曰。臣年少戇愚。性且褊迫。濫登六卿。常自兢慎。交相朋比。詭激成風。使國論顛倒。朝廷日非。臣實無之。減死杖配錦山。錦山距報恩桑梓。百數十里。聞母病。亟請於郡守鄭熊。往見病母。未及還。聞金吾郎黃世獻以押移珍島。即馳還。與黃偕至配所。後事覺。鄭熊謀免其罪。以逃歸捕還為辭。庚辰夏。下獄鞫問。公裂衣上疏。特命減死。安置濟州。辛巳冬。追論亡命。賜自盡。時年三十六。明年冬。返葬清州朱鴈縣。公所嘗遊賞而卜築處也。己卯錄塔淵在荆江上流塔山下。一名辭滄丘。江渚有磐石。石有天作鍊凹。可盛斗酒。時儲酒于此。因名污樽。金冲庵常居淵上。有

辭滄丘一絕。集本冲庵謫濟州。錄風土叙物產處。似相如子虛賦。而光燄則加焉。其為文字悲壯。粹言濟州人見灰色蛇。則禁不殺。號曰遮歸神。冲庵風土錄云。俗甚忌蛇。奉以為神。見則呪酒。不敢驅殺。春秋男女具酒食。會遮歸堂。祭其神。遮歸既蛇鬼之誤。居壁樑礎。群蛇盤結。祭時以不見為祥。勝覽謫濟州。其俗尚淫祀。朦禮制。公述喪禮祭儀。以導氓。風俗大變。錄本濟州地方。泉井絕小。民汲水於五里外。必以木桶負行。取多汲也。錄風土濟州地有山果。名曰未應。實如木瓜。皮丹黑。剖之如林下夫人。黑子差大味。濃。蓋林下夫人之種。而大者耳。同濟州民俗。酷崇祀鬼。男巫甚多。嚇人災禍。取災如土。必殺生牲。為祀淫祠。幾至三百餘所。同濟州人無溫埃。掘地為坎。填之以石。其上以土。泥之如埃。既乾。寢處其上。同濟州人居。皆茅茨。編鋪積屋上。以長木橫結壓之。同嘗造釀松醪。名以碧香春。作詩一絕。寄懷云。汲取碧岩泉。釀得蒼松液。清香盍胸襟。至味餘澹泊。集本蜀道當前。掛轡而行不已。灑灑在眼。搖棹而進不疑。冲庵書

金安國

義城人。字國卿。號慕齋。少學于寒暄堂。燕山癸亥。擢科登二人。我中廟已卯。拜右叅贊。及禍作。罷歸田里。凡十九年。丁酉。權奸伏誅。謂金安老也遂還朝。典文衡。官至贊成。研窮性理之學。為儒者師範。至今學者知所趨向。皆先生之力也。有集行于世。諡文敬。配亨仁廟廟庭。○嘗按嶺南。列邑鄉校。皆教以小學。乃作詩勸立風學者云。金先生學世推宗。濂洛餘風振海東。鄉邑親薰應有得。須將小學益研窮。金先生寒暄堂本縣人也。首唱性理之學。丙丁錄呂江村庄。於座側。整輒作小塘如斗。引水注其中。放小魚觀之。一日夜。靜人絕。魚躍有聲。先生曰。大小雖異。自樂則同。靜中有動。是吾所樂也。行狀嘗按慶尙。巡到比安。相視川澤。築堤儲水。縣蒙其利。民感其惠。名其堤曰相國堤。有詰之者。曰相國非一。誰知其為誰也。遂改名曰安國堤。行狀生七歲。始學小學。讀至孝哉。閔子騫。曰人常以此為法。我何時能長行此。聞者異之。行狀東西籍田。創置年久。經界堙沒。民多盜占。朝廷命公往

理之。公出入溝塍。自監算量。築土為標。樹木其上。自是民不敢侵犯。行狀作家訓教子弟。一曰忠君。二曰孝親。三曰友愛。四曰睦宗族。五曰處鄉黨。六曰慎言語。七曰慎行。八曰居官。行狀嘗拜掌令。務持風裁。剛直不撓。時人敬憚。行狀燕山昏亂之餘。喪禮廢毀未復。慕齋時為持平。於經筵啓曰。三綱者宇宙之大經。古人謂之支天三柱。不可一日廢弛。自短喪之後。人皆忘親棄禮。彝倫墜地。請下明教以立風教。行狀早喪父母。終身哀慕。盡誠事死。出入必告。朔望必祭。小不如儀。終日不樂。構小齋於祠堂之側。居處飲食必慕父母。因以慕名之。行狀奉使朝京。多購性理諸書。又及古今表選。曰我國事大表。賤為重。而儒生不務學。每當文至多窘。故表選并購矣。行狀於死喪患難。匍匐救之。雖微賤必素食。執紼而送之。至老不廢。行狀詠龍門山蔬云。山蔬香軟擅龍門。遠餉應知厚意存。方丈膏粱何足羨。一簞裹罷負榮暄。有入來贈以詩謝之。本集呂江下流有梨湖。先生己卯罷歸。卜居梨湖上。有泛槎亭。又有梨湖十六景。瑞靄平楚。浮嵐層翠。賞蓮尋梅。禊飲踏青。雪驢

雨蓑耕歌牧笛。烟樹月艇。風帆魚火。集本罷歸田里。構小亭于東臯。因其地而名之曰東臯亭。日出則憇息。作詩以記之。集本呂江村庄構泛槎亭。日與鄉人淡飲其上。亭在水干。俯瞰蒼莽。浩浩如乘槎泛溟。故云。集本孤山在呂江下流。水中孤峭特立。清波四環。如芙蓉秀出。其上寬平若砥。四望則遙山環合。峯巒羅列。大野微茫。長江逶迤。曲浦歧沓。狀態千萬。真絕勝也。人傳李長沙存吾幼時作江漲詩。大野皆沉沒。孤山獨不降。即此山也。金慕齋詩云。自有茲天地。應知有此山。英名人供俱。千載莫難攀。集本呂江村庄構八怡堂。一曰晦庵塘。二曰濂溪蓮。三曰康節風。四曰莊周魚。五曰張翰蓴。六曰靈運草。七曰淵明柳。八曰太白月。又有八詠。一曰半畝清鑑。二曰清漣濯姿。三曰清來水面。四曰濠梁知樂。五曰江東寄興。六曰西堂泳夢。七曰栗里餘韻。八曰采石餘輝。逍遙自適。若將終身者十九年。集本八詠一曰張翰蓴云。既得何須憶。秋風忽飄然。不知方丈列。誰與此為前。集本泛槎亭東引遙泉注之。簷下鑿小沼。水清洄可鑑。有詩云。偶引遙泉開小沼。洄

然澄鑑喻心源。集本按嶺南孝子節婦。並皆旌表。存問厚饋。一方風動。興起於善。集本按嶺南時。民有兄弟爭田者。公告之以孝悌親睦之道。兩人感服。再拜而退。集本慕齋典文衡。凡事大表箋必親述。中朝之士見之。皆稱贊不已。同常以謙恭二字教子弟曰。惟謙與恭。是君子盛德。汝輩固當佩服。終身勿失。同嘗謫梨湖。取水中笞造紙。甚古雅。比他紙功省而用博。意欲流布益令勸造於四方。遂有詩云。水笞為紙自今吾。庶益民生日用需。同按嶺南過寧海泣嶺有詩曰。地豈為人恠。人心恠自生。群迷誰與解。一笑問山靈云云。改名曰破恠嶺。同遭禍罷居于鄉。構小亭與諸生講論經義。學者日衆。雖蔬食菜羹。必與之共。同退居呂江。慎使君送麪。先生使釀酒。酒味甚酸薄。即用趙石礪故事。以詩戲答云。麪生風味酸寒甚。難破窮愁慰寂中。堪笑逐賓神太守。欲將餘述調村翁。同慕齋家訓。一曰慎言語。勿誇已長而談人短。勿談人過惡隱微之事。勿談朝廷政令得失。勿言守令宰相得失。勿談淫褻醜語。勿言毀人之語。勿談傲慢之言。勿談反常凶悖之

言。勿譎張忘。荒言語。上同赴京師。到遼東。野間有飛虫。微如塵沙。群飛噴人。細見僅卞其形。晨昏則發。日午則無。蓋蚊類也。於是作一絕以志云。有生天地詎能窮。巨細妍蚩萬不同。渺渺群飛者何物。噴人肌肉腹方充。上全八詠一曰采石餘輝詩云。影是分身我。雙池月分三。孟中又分兩。七字興長。酣。上同按嶺南。撰集歷代諸賢處長幼交朋友行蹟。可為師範者。於兄弟圖附宗族。朋友圖附師生。名曰二倫行實。紀事圖贊。悉倣三綱行實。集本己卯冬。罷歸梨湖。自號恩逸。弟思齋。退居高陽。自號恩休。皆為後生矜式。時人謂之二難。慕齋寄思齋詩曰。休恩恩逸意相同。弟在西州兄在東。拱北丹心無彼此。時時稽首向瀛蓬。又云。逸逸休休弟與兄。熙熙皞皞樂餘生。聖恩自是天同大。顛藥猶沾雨露榮。又有序。以寓臣子惓惓感恩之義。丙丁錄按嶺南。惓惓以教化為先。列邑鄉校。教以小學。作詩勸咸安學者曰。金公治化鄭公鄉。庠塾薰風盡善良。小學工夫須臾勉。兩賢遺範詎宜忘。佔畢齋曾宰是邑。一蠹先生乃郡人也。丙丁錄慕齋性情謹詳密。如春杵則碎米

細糠。并收藏之。以賑春飢。嘗曰。天之生物。莫非有用。暴殄不祥也。人或譏之。笑曰。常人心蠹。聖人心細。上同嘗侍經幄。啓迪之言。必理學為主。貫徹簡婉。探願辨析。靡不究極。迹行我中廟庚午。日本僧彌中來聘。金慕齋充宣慰。唱酬瞻敏。彌中思涸不堪。欲試強韻以窮之。以讀易為題。輒呼壚尖鎌。公應聲而對曰。大羹元不試梅鹽。至理難形筆舌尖。靜裡默觀消長理。月光如鏡又如鎌。彌中擊節嘆服。有受業生進曰。請以半月為題。仍呼魚蛆與三字。慕齋曰。神珠缺碎鬪龍魚。剛殺銀蟾半蝕蛆。顛倒望舒仍失御。軸輪已折不成輿。己卯錄退居梨湖。日與諸生講學。徒弟日盛。時議欲加重譴。公若不為動。錄本童蒙先習。慕齋所著。首論五倫之道。又有總論。先之以中國。次及東方之事。本退居梨川村墅。南野中有高丘斗起。朴上舍承環築小亭于其上。扁以四樂。先生問其義。答云。主占閑逸一樂。賓盡佳良二樂。野禾茂稼三樂。川饒魚鰕四樂。集本同氣之間。益加友愛。臨財務讓。勿懷加得之心。家訓

金正國

義城人。字國弼。慕齋之弟。號思齋。少受業於寒暄先生。我中廟己巳擢壯元。歷敷清要。己卯觀察黃海。為學令勉訓後學。禍起。廢居高陽。自號恩休。後官至禮曹叅判。撫言一帙。行于世。○與友人書云。二十年處約之中。築室數間。產業數畝。冬絮夏葛。臥外有餘地。身邊有餘葛。鉢底有餘食。得此三餘。高臥一世。廣廈千間。玉粒萬鍾。綺紈百襲。視同腐鼠。恢恢乎處此身而無憾。遂自號三餘居士。本嘗按黃海。作警民編十三條。刊布村閭。曰君上父母。曰夫妻兄弟姊妹族親。曰隣里。曰鬪毆。曰勤業。曰儲積。曰作為犯奸。曰盜賊殺人。曰奴主。本己卯罷歸高陽。自號恩休。寄詩慕齋曰。休弟心情同逸兄。一窩安樂送餘生。居閒便覺君恩重。莫說君恩要臣榮。丙丁錄思齋平生不解鷹。每見鴟嚇於樹。錯認為鷹。與友書居閒處約之中。所不可無者。惟書一架。琴一張。友一。四履一雙。扶老一筇。煎茶一爐。負暄一楹。納涼一窓。迎睡一枕。尋春一驢而已。此二五不可去一。送了老境。此外何求。

與人書己卯之禍。廢居高陽之芒洞。諸生從學者甚多。築茅堂以處之。扁曰六務。相與講論不輟。慕誌引法而叅訂者。欲民之有所畏懼而知避也。語簡而辭俚者。欲民之有所不學而易曉也。凡事須務誠實。不謀詐僞。詐僞之事。終難掩覆。必陷於罪辜。警民編序兄弟與我同出於父母。同氣而異體。骨肉至親。無如兄弟。無知之人。爭小利害。遂為仇讐。與禽獸奚擇。如有相殘不和者。則隣里共斥。國有常法。警民編夫妻結緣。百年同居。夫須念妻。妻須順夫。夫益忍怒。妻益致順。然後家道不敗。同耕種須早。風霜可畏。除草須勤。草茂則害苗。同安東人今秋收穫。明年所食計除。堅藏餘穀。樽節喫破。故雖遇凶荒。不患飢餓。同凡民雖有疎親遠近之異。皆是一人之子孫。如木同根而異枝。如水同源而異派。同隣里同住一處。有無相資。患難相救。義同親戚。交相委曲。務為和睦。不和則相為仇隙。終至不測。如此者皆有罪。同北道之民。濫食無節。不用升斗。作餅炊食。朝飽不計夕飢。故一遇不稔。餓孍相望。同法。汚橋破舡。故令欺人過渡。致死者絞。同男女情欲易熾而

難防。所當勤慎者。莫如奸事。小不忍則終陷不測。上同人之死生。在於頃刻。不忍一朝之忿。下手傷損。則終致無窮之悔。上同自己卯禍起之後。群不逞之徒。以清君側為名。相繼而起。連頸就戮。猶不知止。言撫

金振宗

善山人。字孝善。自號文巖。高麗侍中宣弓之後。天性方嚴。器局弘偉。人以忠孝大節許之。嘉靖乙酉。中生員第二名。戊子登第。我仁廟初。拜副應教。乙巳禍起。罷還舊莊。構小堂數椽。扁曰新齋。為異日終老之所。一日鄭順朋使其妻潛通書曰。若多給臧獲。則可免遷謫。公聞之愕然曰。男兒死則死矣。豈可乞憐於小人以求活耶。順朋即公妻叔也。丁未秋謫淳昌。杜門不出者十一年。謫中述五言詩三百韻以見意。丁巳以疾卒于謫所。享年六十一。明廟末。首相李浚慶率百官請放乙巳被竄諸賢。仍啓曰。金振宗儼然有忠孝大節。今雖已死。請復其職。竟蒙允。

金倬

上舍金倬。性軒豁。釋采時為國學三公。道逢吏曹佐郎李徽。大言曰。君為真吏部。我為假政丞。紙上虛名等耳。吾何畏彼。倬不第窮死。徽遭極刑。人以紙上虛名為確論。滑稽傳

金絳

字大柔。我中廟癸酉登第。有文名。筆法勁健。慕鍾王。公嘗聞華人所購。絕不書。故罕傳於世。官至副提學。常入侍經筵。多所啓沃。己卯禍作。杖流遠地。後放還而卒。○丁卯生員進士。俱為壯元。癸酉及第。禍作日。與冲庵靜庵同下獄。配開寧。十二月流南海。構堂于竹林而居之。辛卯十二月。量移臨陂。癸巳蒙放。奔還禮山。哭父母墳。仍居焉。公前在南海。俱喪父母。欲伸追稅之情。而先嬰感疾而終。

金汶

金汶博通經史。尤長於史學。資治通鑑綱目。皆磊落載腹。人間歷代故事。應聲對曰。在某卷第幾張。百不一失。我英廟命撰訓義。公之功居多。國

以來能通史學以公爲首筆苑

金湜

清風人。字老泉。初以公薦拜主簿。轉至掌令。己卯擢薦科壯元。陞副提學。遷大司成。及禍作。竄于善山。後亡命自縊死。衣冠中有草疏。我仁廟初。命給職牒。○亡命匿人家。卜藏身吉凶。爻辭有山人毀事之語。時從行者有李信者。本以緇徒。性又不順。聞大成以理學倡學。倡徒卽長髮去緇來從學。築土宇於墻下。折節爲學。大成嘉其意。盡心教誨。如親子弟。及大成敗後。構告湜聚徒謀害大臣。直抵京城上變告。大司成行到居昌山中。遂自縊死。李信後連涉強盜杖死。己卯老泉生於成化壬寅。六歲而孤。長于外家。天姿精粹。聰警絕人。母睦氏命之曰。汝旣早孤。要自樹立無忝所生。公慨然刻勵。首倡性之學理。年二十中進士試。中廟乙亥。與趙光祖同被公薦。授廣興主簿。丁丑七月。經筵官韓忠進曰。近日在讀書堂欲讀性理大全。而難於解說。今之知理學者。惟金湜而已。臣欲與同僚啓請金

湜賜暇講讀。而國法非文士。無賜暇之例。故終不果。○戊寅冬。累遷拜掌令。上曰。金湜已欲使之進講。而臺諫之職亦重。故未果耳。湜之爲人。予於經筵講論時知之矣。副提學趙光祖進曰。如湜之爲人。非但文士所無。只是難得之人也。是時設薦科。公名在薦中。而不欲就舉。光祖力勸之。且有母氏之命。不得已應舉。遂擢壯元。上下教曰。金湜賢者。要得此人。將爲師儒之官。而今居壯元之列。予別有所喜焉。翌日超拜直提學。俄拜副提學。遷爲大司成。仍兼經筵叅贊官。使之入侍。己卯十一月十五日。公與諸表兄弟齋宿于外家。將行外祖忌祭。或問朝政。公愀然不樂曰。他日會宿亦難必也。要與叙舊耳。政教利害。非所聞也。祭旣畢。夜尙未艾。金吾郎領軍跟尋到門矣。遂就獄。供曰。濫蒙天恩。擢爲臺諫。及登第陞授大司成。欲效絲毫之補而已。不居權要之地。全無進退人物。至於互相朋比。詭激成風。使國論顛倒。朝廷日非。臣所不爲。杖配善山。蓋公之祖金耄爲安東府使時。公父生員叔弼年二十四。病卒于府。葬于善山栢田里。故請配於

此十二月間加罪事。喟然嘆曰。燎原之火。迫于四郊。將與所舍同就燒燼而已。適有客在傍曰。奸人之事不可測也。公曰。兇謀有所不測。則挺身赴難。以報不世之遇。素所願也。遂與客縱飲大醉。客謀曰。安忍坐見無辜而死於奸人之手乎。莫若竊負而逃。乃使家僮于音山。負持行數十里。猶剽睡如初。及曉乃覺。無可奈何。遂與李信于音山。向靈山李中家。李信者累年受學。及公被罪。又隨而來。李中者亦公之門弟也。至是卜藏身吉凶。有山人毀事之語。不欲向山寺矣。李中曰。信本一緇徒。即是山人。而性又不順。且人衆難容。不如先送。公厚給糧餉。即與之別曰。逮捕日嚴。吾三人勢難同行。汝須先行。探知朝報。朝會茂朱吳希顏家。希顏亦公之門弟也。信直抵京城上變告曰。金湜今在李中家。使其子德秀德純。與其門徒謀害大臣。金吾郎馳到李中家。則公先一日已出去矣。公艱到茂朱。聞吳希顏亦已被拿。而顧無所舍。由山谷間欲抵智異山。到居昌縣高梯院。題一絕于岩上曰。日暮天含黑。山空寺入雲。君臣千載義。何處有孤墳。此其命絕

之辭也。又草疏略曰。臣既負殿下爲亡命臣。極知無露情悃於殿下。徒爲喋喋。但臣之亡命。亦非徒然。則不忍不略吐謬見。使殿下長慮也。臣當初被罪時。詳問起禍之由。沈貞本一貪饕無厭。兇狡難狀。小人。不爲清議所容。積怨于胸。思欲作亂者久矣。第無隙。因光祖知遇。聖上學者同趨。小民稱善。乃以不經讖文。潛撓上志。又喉被屈。不逞數三宰相。遂構士林之禍。取嗜利無耻之輩。充滿朝廷。用其姻親李蘋。爲館長臺長。稍有清論。令頻擊去之。又與南袞。多聚武士。朝夕盈門者。其志豈止於剪除士林而已哉。臣故隱忍亡命。俟之。奸兇危逼於君上。則挺身赴難。以報殿下不世之遇。此臣之素志也。且深知殿下疑光祖非本心也。罪臣亦非本心。故爲此區區也。微臣一身非所恤也。以臣之故。延及無辜。即當爲殿下訣云云。帶於衣中。採薇欲治食。使奴于音山。求火於村舍。遂自縊于音山。蘊火而返。則已無救矣。即庚辰五月十六日也。于音山得衣帶中草疏。告于縣啓。聞命所在診檢。然後放夫人之囚。籍沒家產。乙巳五月。

仁廟特給沒官財產。六月還賜紅牌及職。公嘗力言宗系辨明之事。宣廟朝追錄公光國原從功臣。贈吏曹叅判。睦世稱著哀辭以明行己之實。門人申命仁作哀宋玉詞以著其意。公有五子。長曰德秀。孝友出天。不事科業。以教誨後進爲己任。次曰德純。勇力絕人。袞等甚畏之。移宅而宿。構捕日急。挺身遠避。一日乘夜還家。廳上設靈幄。見銘旌。乃其妻喪也。吞聲而去。袞貞死後。乃得還家。以妻傷心殞命。終不再娶。次曰德器。賢而有文章。可笑吟一篇傳于世。次曰德懋。辛酉司馬。季曰德成。德懋有子曰權。登文科。官至叅判。光海廢母后時。獻議立異。竄于江界。移拜務安而卒。邑人立書院以祀之。人以爲不墜家聲。東閣記

金胤宗

字繼志。金大司成湜之高弟也。聞起禍來在北丈山。一日中夜逃避。入俗離山。官人跡而至。遂被拿。奴僕泣而進食。公曰。我以死者不泣。汝何泣爲。遂從容進食。略不畏懼。杖流明川。卒于謫所。己卯錄

金世弼

字公碩。號十清軒。燕山朝登第。官至刑曹叅判。己卯禍起。公入侍經筵。啓曰。趙光祖常時信寵之一朝賜死。至爲慘惻。人人見此。孰有盡心國事乎。南袞李惟清等詣闕請罪。下獄削黜。寓居忠州而卒。

金胤胤

金胤胤登己卯薦科。罷科之後。訪靈川子申元亮曰。吾輩當更着紗帽。靈川曰。何故。金曰。聞朝廷以罷科人充翊衛僚屬。靈川以其事語洪篠叢。篠叢笑曰。爲是言者誰也。必是欲自爲者。探君意爾。居數日。金果拜洗馬。後復登科。乙巳構告桂林君。得叅僞勳。本錄

金孟

金海人。字子進。我英廟朝登第。官至執義。性廉退。不附勢利。晚年棄官歸鄉。一兄三弟尙無恙。時節會合。五老皤皤。相與磨腮交頸。若兒戲然。一鄉以爲美談。出虛亭金孟嘗夢龍馬之異。生三子。名其子皆從馬。長曰駿孫。

次日驥孫。次日駟孫。皆以文行名世。俱登第。同南怡為都摠管。僚屬例投刺其門。金孟為經歷。獨否。及怡誅。搜其家得留刺者。誅之。金孟得脫。

金駿孫

金海人。燕山時。金駿孫柳濱李穎等竄湖南。見燕山荒亂。日甚。宗社將危。謀推戴。中廟傳檄京師。未至而反正。其檄書畧曰。太祖創業艱難。世宗德教休明。成宗一遵成憲。節用愛人。民安物阜。躋世昇平。不意嗣王暴虐無道。王父後宮。杖而殺之。翁主王子。流而殛之。臺諫之言者。竄之。誅之。戮辱大臣。賊害忠良。父子兄弟。收司連坐。甚於秦法。拔人之塚。寸斬之刑。碎骨之辟。此何等刑也。奪人妻妾。恣行淫慾。破人廬舍。以廣園囿。徵歛無藝。民不聊生。宗室兄弟。妻妾逼令相奸。三年通喪。忍短其制。父母忌日。亦皆罷之。其他土木之役。聲色之好。池臺遊畋之娛。禽獸花卉之翫。難以覩覲。生民一生之苦。姑不足言。萬一大奸窺覲。遽起。則易姓之禍。亦或可憂。晉城大君。成宗大王之親子也。賢而有德。中外屬望。茲以某某

等。欲推戴。晉城某月某日。舉義兵聚京師。在朝公卿百執事。宜速推戴。以安社稷之危云云。雜記

金駟孫

金海人。字季雲。號濯纓子。首露王之裔。受業於佔畢齋門下。我成廟丙午。中司馬壯元。登同年甲科。以文章氣節名世。燕山戊午。史禍起。與權景裕。權五福同死。有集行于世。○季雲疏筍。汪汪大海。論議國事。是非人物。如青天白日。真希世之材。廟堂之器。粹言虎溪之水。其淺僅流。東蒲偃石。障其流空其中。上構高樓。曰燕子。然樓高而流潺。不相稱也。濯纓子樓記舜五絃。文王七絃。六絃非古也。晉以七絃琴。送高句麗。王山岳增損其制。作六絃琴用之。六絃於吾東亦古矣。銘曰。物不孤當。遇匹。曠百世或難必。噫。此物不我失。非相待為誰出。書六絃琴背濯纓子與申漑之姜士浩金子獻李穎之李師聖。迭在讀書堂。餘力學琴。權嚮之亦自玉堂往來學焉。乃曰。王山岳始奏六絃。玄鶴來舞。一琴鶴一耦也。遂倩慵軒李居士畫鶴。初欲置琴。而

難其子。東華門外有一老媪家。得門扉近百年。為琴鼓之。清越賓池。猶有為扉時釘穴。軒出睡集鶴有欲琴無欲。吾將畫鶴於琴。以從其類。書六琴背云。絃既五。則三在卦上。兩在卦旁。正桐腹無蹠跛不正之失。卦方言也。集本書案銘云。空其腹。物可畜。素無幹。樸未散。此物有四隅。可反以三隅。同濯纓子曰。天壤間凡物。必有與物相稱。不相稱則不得造物之情。如草堂茅屋。宜於處士。廣廈金屋。宜於王孫。易此則不稱也。同濯纓子朝京師。得順天府學士周銓。其人循循可愛。博學善吟詩。乃解佩刀為贈。周以數件圖書報焉。同我成廟嘗賜賜暇。諸儒宮醞。以水精盃宣勸。而遺之。館官鍍金為臺。金駟孫銘曰。清不但虛能受。德其物思勿負。勝覽母夫人李氏。教子弟甚有法度。濯纓之兄。出守咸陽。來侍病。劑藥用官鉄研。夫人聞之不悅曰。豈可以官物留私第。亟還之。出虛亭管處士有有心者。有無心者。擇其無心者取之。以其心無二適。故號無心子。管處士誌私諡管城子曰文悼處士。性貪墨。瘞而無槨。墓而不墳。同管子述古病肺喜飲水。值天寒飲水多。

腹脹凍死。同貂冠族貴。羔裘族賤。卯君臣貴賤之間。易短折。貂羔兩族。稍壽於卯。而勁健可人意。故世多任使。同加竹皮冠。斂以紙衾。從素志也。同上季雲能文章。性簡亢。少許可。任至吏曹正郎。李克墩為全羅監司。成廟之喪。不進香。載妓而行。金駟孫書其事於史草。克墩私請改之。駟孫不從。克墩啣之。及修實錄。遂起史禍而殺之。戊午黨蹟吟諷而未吐者。先意奉承。如照肝膽。必宣揚吾懷抱而後已。○金駟孫嘗為獻納。論李克墩與成俊交相傾軋。將成牛李之黨。克墩大怒。及開成廟史局。見駟孫史草。書已惡甚悉。又見書光廟朝事。欲因此報怨。與柳子光謀。封史草以啓。鍛成戊午大獄。論以大逆。一代名流。誅夷乃盡。柳子光傳濯纓子云。余昔年朝京師。得程愈集。註小學。及返國。即印頒于國中。學者皆獲程惠焉。集本季雲實問世之士也。逢時不祥。被禍而死。但其禍之首尾。及身洗雪之未盡。後生不能詳知。南止亭挽其遷墓詩。載之備矣。其詩曰。鬼神茫昧然。天道諒難知。好惡與人異。禍福恒舛施。悠悠此宇宙。脩短同蔑咨。焉知髑髏樂。不易南面。

治。達觀付一莞。浮雲於渺瀰。獨憐名世人。其出每遲遲。契濶數百年。乃得一見之。見之又不遂。至治寧有期。吾生亦何幸。得與君並時。文章漢西京。人物宋豐熙。云云。又坡坨城東土。草草難掩屍。情鍾有子孫。卜兆謀遷移。君今九天上。俯視息相吹。他年纂圖誌。錄墓當不遺。末句蓋謂季雲之墓。當誌於圖誌云爾。其後撰續輿地勝覽。郎官等季雲墓以進。堂上一員曰。季雲非宰相。又非謹厚。遂抹而去之。此豈盛世至公之論乎。重爲季雲惜之。出雜記。官言不雷同。而志則同。行不循蹈。而趨則同。仕有先後。而時則同。職有內外。而業則同。其聚也怡怡以歡。其散也忽忽以悲。彼聚也彼散也。吾歡焉。吾悲焉。悲歡亦果何心也。聚散記。上天王峯。頂上有石疊。俯仰心神俱凜。如身在鴻蒙太初之上。而襟懷與天地同流。頭流錄。自丹丘峽而東。山益奇。水益清。峽盡回首。如別佳人。十步九顧。丹山二樂樓記。儒而不知兵。非真儒也。訓詁之儒。陋詞章之儒。華文學之儒。誇真儒則實。射御書數。在其分內。錢穀甲兵。無一不用其極。送柳評事序。官有大小。而心無大小。職有內外。而心

無內外。武城絃誦者。不求當時之譽。單父鳴琴者。豈要他日之名。素其位。盡吾心。以臨其民可也。送崔玉果序。以壯遊而言。弧矢無定。由性命而觀。往來有數。較事業。則文武無分別。視君親。則恩義有輕重。親生我身。貢之於君。君制我命。而進退有義。戰陣無勇。以爲非孝。則男兒事親。豈全在晨昏堂塾之間哉。青油幕下。橫槊吐虹。黃雲塞上。解甲晏眠。使朝廷無北顧之憂。然後瓜時受代。歸報倚門。翩翩綵衣。得蒼顏之一破可矣。送李評事昔子沉序。昔年落魄嶺表。將遊頭流。抵斷俗寺。中有古樓。樓前有梅兩株。長丈餘。下有古楂。其不滅者半尺。寺僧因爲政堂梅。詰其所以名。則乃曰。姜通亭少時手植。其後釋褐。官至政堂文學。因名焉。政堂亡百有餘年。梅亦未免老死。其曾孫用休氏。承其椿府。晉山君之命。來尋遺跡。慨然增感。遂栽新根於其旁。今已十年。不特政堂有子孫。而梅亦長子孫矣。時方初夏。無復暗香。予手攀低枝。戲打青子而啖之。因僧言而錄爲一故事。後八年。用休氏入政院爲承旨。予爲夏官郎。朝夕於政院。一日以諸公所題政堂梅詩。若文

見示。乃索予書其末。予思天地間萬物。雖一草一木之微。莫不有數寓焉。其榮枯其得喪。皆

金大有

金海人。字天祐。號三足堂。濯纓先生兄子也。以遺逸登薦科。歷正言。修撰。罷歸田里。構三足堂于雲門山下。以自終。曹南冥撰墓誌。○世居清道。丁卯進士。以遺逸為直長。登薦科。為正言。辭歸。除柒原縣監。三月而歸。乙巳復科。又不就職。以疾終于雲門山。號三足堂。已卯錄曹南冥與三足堂金先生。交道最深。常以天下士許之。遺事金正言大有。以己卯人。罷歸田里。構一堂於雲門山。愚溪上。自言年過六十。壽已足矣。禍亂之後。撻司馬登薦科。歷敷臺省。佩符治縣。榮亦足矣。朝夕之供。不撤酒肉。食不可謂不足。遂以三足名其堂。本錄三足堂念南冥先生貧乏。令諸子歲遺之粟。先生不受。以詩復之曰。於光亦不受。此人劉道源。所以胡康侯。至死貧不言。其辭受之不苟如此。遺事甲視之則容容大雅。討論經史之弘儒。乙視之則仡仡長身。

射御不違之豪士。南冥三足堂墓碣

金克儉

金海人。字士廉。我光廟朝登第。又擢重試壯元。性廉介。不營產業。所蒞有冰薜聲。官至同中樞府事。○李相公蓀出守金海府。營小閣于燕子樓傍。有古梅數株。叢筠數十本。蕭然對立。合而扁之梅筠。金克儉有詩云。高閣穿雲倚碧雲。夜深涼月白紛紛。主人所愛無餘物。惟有梅兄與此君。官金志金克儉為安東府使。寄書于野城權五福云。嚮之消息久絕。懷抱頗惡。忽蒙問之以海錯。戲成兩絕。呈于文軒求和云云。小友爾來消息稀。移吾帶眼緩吾衣。如今頗得平安信。行見肌膚日以肥。又寂寞寒厨無所有。朝朝釘豆欠甘肥。誰分海錯兼珍味。便使鹽齏得解圍。睡軒集

金潛

禮安人。判書淡之兄。我英廟朝再登第。官至校理。景泰末。出守金山。為政慈祥明斷。及卒于官。吏民哀之如父母。

金淡

禮安人。字巨源。潛之弟。我英廟朝再登第。性溫雅淡簡。喜怒不形於色。官至吏曹判書。謚文節。○嘗守忠州安東慶州。人有犯盜情跡。少有可疑者。必殺不饒。盜不入境。民賴以安。筆苑

金若采

光山人。大匡鼎之子。恭愍王朝登第。性慷慨不畏強禦。嘗為左司議。叅治趙胖獄。廉興邦將置胖極刑。若采獨以為不可止之。人稱其有骨鯁風。及興邦伏誅。朝野稱快。入本朝。拜忠清道觀察使。

金若恒

光山人。大匡鼎之子。恭愍王朝登第。為司憲執義。我太祖四年。拜大司成。高皇帝徵撰表者。若恒以製方物表。同鄭摠赴京師。商流于遠裔。太祖遙授光山君。未還而卒。○金若恒當我太祖開國。推戴之臣。誘以建議之謀。乃固守不應。本金若恒死于大明。其子虛性至孝。常慟父之死。又

喪母居廬。為人善哭。書孝經喪親章於壁上。日日對壁而讀。讀必嗚咽。三載不少休。哭聲清亮哀慘。聞者莫不投淚。叢話

金延壽

清風郡民。得木偶人以為神。每歲五六月間。奉置客軒。大張祀事。一境全集。流弊已久。金延壽為郡守。即收杖巫覡。遂焚其木偶。淫祀乃絕。稗官

姜淮泊

晉州人。字伯父。號通亭。自少聰警。讀史書。一覽輒記。辛禡二年登第。累薦政堂文學。入本朝為東北面都巡察使。○恭讓王時。進御衣櫛。令買賣供進。一正之價。或倍筵。謀利之徒。坐取重利。姜淮泊上書。令奴隸習織綾絹。以供內用。列傳漢陽盤松亭。世傳松樹輪囷。可蔭數十步。麗王幸南京。因避雨於此云。通亭有詩云。蒼松蒼松生道左。數個連陰德有隣。細枝連揚張翠帷。遮斷白日相依因。人言遠古無何時。君王避雨如羸秦。因封此樹為將軍。守者代俸霑王仁。通亭盤松亭龍興江在咸興府。舊名橫江。河崙奉使

至府都巡問使姜淮泊置酒中流。請曰：此地度桓二祖下宅。太祖誕生之地。此江尚襲舊名。不亦一欠乎。河崙以龍興名之。勝覽通亭少時讀書斷俗寺。種梅一株於庭前。仍題一絕云：一氣循環往復來。天心可見臘前梅。直將殷鼎調羹實。謾向山中落又開。公登第。歷仕政堂文學。在朝調相濟之事實多。時人謂之詩讖。養花錄斷俗寺手植梅。居僧每年封土培養。枝幹樛屈。又封苔蘚。下有古查不滅者尺餘。與譜所謂古梅無別。真嶺南一古物也。同上政堂少時手植梅。百餘年而亦未免老死。其曾孫來尋遺跡。遂栽新根於其傍。今已十年。不特政堂有孫。梅亦長其子孫矣。濯纓政通亭之瑞麗。玩易齋之高雅。仁齋之平淡。三世相傳。各有所主。而其骨格之清健。如出一手。世稿通亭子玩易齋孫仁齋私淑齋。三世相繼。以文章鳴。多所著述。出慕齋集滄海無垠。墁瀾漫天地間。蛟龍之所穴。鼉鼉之所安。雖能制巨鰲。使之波瀾。通亭

姜碩德

晉州人。字子明。號玩易齋。淮泊之子。一舉不中。乃嘆曰：自有道義可樂。何用科目為。不復就試。以蔭累官。至知敦寧府事。謚戴敏。有集行于世。○性好古。風流文雅。近代無比。作詩最高古。書畫亦妙絕。謚曰敏宜矣。謚法好古不怠曰敏。此元學士趙文敏之敏也。筆苑玩易齋以人之所易失者忿與慾也。作大字懲忿室慾四字。貼諸壁上。以自省。行狀嘗言心與物接。惟怒最易發。不可不深省。書古詩於壁。以自警曰：怒氣極炎火。焚和自徒傷。物來莫如競。事過心源清。世稿國法。子登第。賜酒樂壽親。曰：恩榮宴。正統辛酉。仁齋中第。越丁卯。私淑齋擢崑科。時雙親無恙。兄弟據禮。請設恩榮宴。先大夫戴敏公拒之甚牢。且戒曰：有榮必有辱。名宴以榮。吾何敢當。朝夕慰我以菽水之奉。斯亦足矣。竟不許。世稿

姜希顏

晉州人。字景愚。號仁齋。玩易齋之子。善詩善書善畫。時稱三絕。詩似韋柳。畫似劉郭。書兼王趙。我英廟朝登第。官至仁順府尹。卒四十八。所著養

花錄行于世。○仁齋年數歲。或墻壁間。隨手揮洒。或書或畫。無不中法。行狀判刑部時。盜賊恣行。公治獄嚴明。奸徒竄伏。京獄空虛。舊制獄空則啓之。郎官請啓獄空。公拒之曰。若非臯陶淑問。安敢居此。僚佐愧服。上同我英廟欲用欽賜。體天牧民永昌後嗣八字爲寶。而難其書篆。朝廷薦公書。上同一日語曰。吾夢官府群公列坐間。有虛席。問諸下者。答曰。坐此者適他所。今歲當還。視其標題。則乃吾姓名也。吾其死矣。是歲果卒。上同凡物理精粗。一見自解。獨不知音律。見伶人彈琵琶者。曰。汝可徐徐下指。熟視曰。雖不成聲。且得梗槩。手彈一腔。不失條貫。人服其敏。上同篆隸真草。至於繪畫之妙。獨步一世。公皆秘而不宣。有求書畫者。公曰。書畫賤技。祇流傳後世。以辱名耳。上同佔畢齋由修撰。爲親老作宰咸陽。姜晉山以詩送之曰。見佔畢齋世稿下居閑聞蟬聲。感其高潔不群。遂圖形記實。乃作四言詩六句。上同仁齋所畫麗人圖。耕雲圖。青鶴洞。菁川江兩簇。真天下奇寶。序誌仁齋少有才藝。晚年登揚州院樓。有詩曰。有山何處不爲廬。坐對青山試一嘯。簪笏十年成

老大。莫教霜鬢賦歸歟。永川君定見而批之曰。此詩非徐即李。時徐居正李承召擅詩名。爲定所服。後定過樓下。更讀前批。其下有書。此詩有江山雅趣。無一點塵埃。非世儒結習者所作。且天地之大。江山之奧。豈無人才。而必推徐李耶。定見而大悔恨。抹其批而去。話冷姜希顏預朴彭年成三問獄。拷訊不服。上問希顏預謀乎。三問曰。實不知。進賜盡殺名士。宜留此用之。實賢士也。希顏由是得免。六臣傳養花錄。一曰老松。枝幹屈曲嶙峋。多枯槎老枿。葉針細短。帶子著花。寄生岩石間者爲佳。二曰萬年松。層枝翠葉。如條絲下垂。身幹回曲。如赤蛇騰林。香烈者乃佳。葉白有刺者。乃爲下品。好生金剛妙香。兩山絕頂。萬年松。二三月折枝。插別器置陰處。徐徐澆水則活。更敷新葉。必鬆鬆有刺。年久則條絲。○都下栽接者。皆千葉紅白梅。結實多雙。即譜所謂鴛鴦梅也。先將小桃栽盆。懸掛梅枝。剝去桃梅兩邊皮。合而用生葛堅緻纏束。待氣通皮縫相接。後斷去本梅。謂之倚接。頻以水澆交結枝梢。漸漸橫斜。作老梅之形。接梅栽于盆。冬月入置暖房。

中。數用溫水。撲其枝根。勿觸冷氣。可於冬至前綻開。清香滿室。○都下養花者。不知瑞香花韻高。亦不知培養之方。今得培養之術後。花葉茂盛。綠葉紫花者爲最佳。一萼纒綻。清香滿庭。花謝子結。則赤如櫻桃。爛熟於綠葉間。眞閑中勝友也。瑞香花葉深綠。廣厚者。乃不失常性也。陶隱送詩云。綠葉紅花香可烈。煩君擔送伴幽人。○緋桃粉桃。東方舊無此種。忠肅王入元。尙公主東還時。帝所賜賚也。○惟石產出松都南者。能引水至頂。形模一如水沉香。俗謂之沉香石。眞天下之絕寶也。世人於惟石中。或種岩菜及雜卉於凹處。自以爲高致。皆俗士所爲。○蘭葉一年不能盡抽。明年季夏畢抽。出湖南沿海諸山者最佳。○四季花獨占四時。以五行言。猶土之寄旺於四時也。學得養花者。必先養此花。此花之指南也。四季花有三種。其中青竿不佳。○山茶花東國所種。唯有四種。號冬栢春栢。及都下所養有千葉冬栢。又有千葉山茶。東方本無重葉山茶。忠肅王尙公主東還時。帝之所賜。好事者愛惜。至今不失其種。○梔子有四美。花色白腴一也。

花香清潤二也。冬不改葉三也。實染黃色四也。梔子花性大惡燥煖。收藏大暖。則枝葉萎黃。不能發花。凍傷亦不可。○衆花中收藏最難。澆水勿燥。又勿曝畏日。若善培養。則能結實。○凡養菊。毋作舊制。每一坎。分種一條。條弱者。用葦條扶之。○一曰石菖蒲。初春採盤根細葉者。剪其鬚根。列置惟石下。又用碎石鎮之。以石泉浸灌。自然生根。盤結石上。近世有一相。奉使日本。到西方寺。有一老宿。令沙彌捧一海螺來示之。螺背有物。如龍蛇蟠蜒之狀。纏結數重。有鬚鬣細如針。孰視之。乃菖蒲也。相甚異之。戲曰。願賜奇寶。以侈吾行。老宿曰。積至數百年。乃成。倘出塵世。必枯槁。此神物也。令還置舊處。○今養花家。多有盤榴。使枝葉蟠屈。作數三層。秋來結實。甚可愛玩。直幹上竦如張蓋者。謂之柱石榴。數株叢生。枝柯錯亂者。謂之藪石榴。○凡種蓮。紅白不宜并種。一池內。須作隔分種。不然則白盛紅必衰。大瓮中種紅白蓮。兼種菰蒲蘋藻之類。以爲池沼之形。最爲清絕。○橘樹唯值霜雪。莖葉蒼翠。微風一過。香亦不止。○牧丹有洛陽紅。忠肅王尙公

主東還時。帝所賜也。○五六月梅雨時。擇新竹葉短枝密者栽盆。斷取橫根。左右各連數節。少有搖動。則葉卷不舒。○養蕉之法。大燥則焦。大濕則敗。善養之機。妙在自得。養蕉賦序三曰烏斑竹。都下氣寒。所存者唯烏斑竹。斑竹經歲變烏。錄本我英廟二十三年。日本國進躑躅花數盆。上命植內庭。及其花開。葉單而花瓣甚大。色類石榴。重附錦萼。久而不衰。上嘉賞。命上下林苑分植。錄養花

姜希孟

晉州人。字景醇。自號私淑齋。又號雲松居士。或稱菊塢。仁齋之弟。我英廟朝擢鬼科。詩文醞藉精深。渾涵浸郁。大放以肆。雄深雅健。似司馬子長。汗瀾卓犖。似韓退之。簡古精密。似柳柳州。俊邁奔放。似廬陵文忠公。為時所推。官至左贊成。諡文良。有集行于世。○私淑齋編祖通亭父玩易齋兄仁齋詩集。名曰晉山世稿。集本初登第。謁南議政智。南曰。筮仕之初。持身最難。而世族之子。為尤難。寒門冷族。縱有豪橫。人不疑之。世族之子。則人以

為恃此而橫。挾此而驕。人心已疑。惡聲流布。今子年少擢鬼科。人之一可疑也。連世相門之裔。人之二可疑也。派連戚里。人之三可疑也。今有三可疑之勢。而一有不謹。則惡名加之。反不如寒門子弟處也。集本作五說訓其子。一曰盜子。二曰啗蛇。三曰登山。四曰三雉。五曰溺桶。曰吾陳古人之糟粕。汝啖其精。吾陳古人之皮毛。汝採其髓。上同為一庵作篔簹偈序云。有一奇卉。其名篔簹。通中勁節。其色蒼翠。一根或至二三十竿。一竿或岐五六十枝。一枝或敷數百箇葉。疎疎密密。整整斜斜。超眾草木。獨得妙想云云。上同作春筍發蟄圖。又作長篇古詩題其左云。一夜春雷乍驚蟄。群龍露角江之曲。信手輕脫紫虬茸。坼甲一一含嫩玉。上同申中樞浚觀察湖西。私淑齋抱病送之。江之滸。作春江詞三疊。以暢其意。一曰春江瀾瀾。二曰春江淡淡。三曰春江脉脉。上同蔡申葆精舍在梳山下彎溪之上。斷龍前平而後高。內向而稍句。形如臥梳。故名。私淑齋有記。徐達城詩山如梳。樣水如彎。肥土甘泉却勝盤。上同姜晉山作老妓篇。其小序云。戊子春。奉使到齊安。有

數妓名振關西。同行一相嬖之。辛丑奉使重到。則所謂數妓者。或除樂籍。或爲首妓。無復有舊時之態。今去戊子十四年矣。老醜尙如此。豈非取其容華者可暫而不可久哉。遂作詩以嘆之。集本一曰盜子。民有業盜者。教其子盡其術。子負其才。自以爲勝父。父與其子。至一富家。令子入寶藏中。子貪取寶物。父闔門下鑰。攬使主知。主家逐盜。及視鎖鑰猶故。主還內。子在藏中。無計得出。以瓜爬搔。作老鼠嚙齧之聲。主謂鼠在藏中。即張燈解鑰。將視之。子脫去。主家共逐。子繞池投石而走。逐者云盜入水中。由是得脫。其子能出投石之奇。後遂爲天下難當賊。盜子二曰昭蛇。三曰登山。魯民有三子。甲沉實而跛。乙好奇而全。丙浮輕而捷。一日共約登太山日觀峯。乙在山下。丙在山腰。日已昏黑。甲徐行不已。直到山頂。登山溟州有昭蛇者。其人持釵頭木弓及小屈木。入長林大谷中。遇蛇則輒以木釵按其首。又以屈木挫之。手剝其皮。藏于矢筒。和鹽炙食之。食之久則中毒而斃者相望。訓子余少時讀書山寺。蟣虱滿禪。癢慵難堪。張火烘之。猶不能止。自

手封疊送還。家人用秃帚掃之。沸湯沃之。浣滌既畢。蟣甲猶鱗鱗摸糊縫際。同余少時讀書山寺。家使久絕。蟣虱滿禪。今當綺紈被體。未嘗不思此苦也。積雪滿林。借昭菜茹。亦足療饑。今當天厨美味羅列眼前。未嘗不思此苦也。惡髡裸程。尸臥佯眠。直至亭午。晨炊未具。今當走卒前導。行路辟易。未嘗不思此苦也。同余少時志學。冬有袴襖數件。夏有麤褐數領。畧備寒暑而已。亮其至心。母棄稗說。同凡有血氣者。孰無男女之慾。如欲娼則皆欲娼之美者。娼之美。衆情所萃。當如蛇蝎以避之。同男女居室之欲攻。而淫荒之害甚。飲食滋味之欲攻。而侈靡之害甚。貴富功名之欲攻。而榮辱之害甚。同一心之微。分爲百慮。得喪判而憂喜生。憂喜生而恩怨立。恩怨立而仇敵見。仇敵見而元真盡。元真盡而能得長生者鮮。同夫父之於子。猶農夫之於嘉穀。養穀不成。終罹餓餒之患。教子無成。竟致孤危之禍。其糞壤耘耨之法。訓誨勵翼之方。曷嘗少弛於心。同豢養子弟。日見父兄享富貴。意以爲如此。彼安知今日紈綺之輕暖。乃前世鹿疎之驗。今日膏

梁之軟美。乃前世蔬糲之積歟。不知其源。何能有為。上同進德脩德之序。自卑而升高。自下而超上。毋恃力而自畫。毋怠力而自棄。上同四曰三雉。虞者捕雉有一覆而得者。有再覆而得者。夫人結契燕朋。輕情耽色。不恤人言。嚴父不能教。良友不能責。自罹禍咎。終身不悟者。是一覆再覆之類也。三雉說

五曰溺桶。大市中置溺桶。備市人之急。士子竊洩者。抵以不潔之罪。市傍有士夫。畜不才子。常潛往洩之。其父痛禁之。子不聽。日洩不止。主者欲挺之。畏其父不敢發。無何其父下世。子復往洩。忽聞腦後生風。毒挺加額。不覺揮到絕而復蘇。訓子說雉之性好淫善鬪。一雄畜群雌。每春夏之交。叢灌蒼鬱。雌鳴粥粥。則雄者聞其聲。振翮而至。虞者飾木葉為翳。捕雄雉為餌。日獲數十。三雉說畫雙鳧圖。送李侯仁文出守鍊原。序云。王喬鳧鳥之事。近於迂誕。然臣子之於君父。違離輦轂之下。出宰百里之地。想必魂一夕而九逝。豈但朔望之朝而已哉。意者好古博雅之士。假此以寓夫人臣戀君不已之忠懇歟。乃作詩一篇。題于雙鳧圖下以送之。世稿送廣陵李克培

巡察三道。贈詩云。聖主憂勤炳事幾。撒桑綢戶定安危。今公此去應多策。三道雄兵在指揮。上同我成廟乙亥。帝勅助征野人。命尹弼商往征之。戎車啓行。京朝出餞于城西。希孟作出塞詞五篇以送之。上同南原廣寒樓南邊有栗林。私淑齋有詩云。一抹秋光到樹頭。淡黃輕綠暗相浮。風吹金帽迸蛇卵。閒伴兒童作勝遊。上同無為子性不忌蚤。一日獨夜坐悄然。群蚤自塵垢中出。攻攢不已。毒如利錐。無為子左搔右爬。手不能暫停。天下之毒虫。無大於蚤。居衽席而嘬肌膚。刀鉅不容威。網罟不容繫。夏月臥弊簣中。群蚤攻之。而怡然無所苦。忘蚤說凡諸草木花卉。寓之目而得於心。得於心而應於手。神一畫則神一天機。妙一畫則妙一天機。時憑鉛墨。常與天氣劇戲。其與世之鳩集花名。羅列左右。誇耀富麗者。大有經庭焉。答李仲仲論畫說凡人之技藝。雖同。而用心則異。君子之於藝。寓意而已。小人之於藝。留意而已。留意於藝者。如工師隸匠。賣技食力者之所為也。寓意於藝者。如高人雅士。心探妙理者之所為也。豈可留意於彼。以累其心哉。論畫說童有甲

乙共樵於山。甲者性懦不能升木。乙者性儇俐如猿猴。甲取宿僅備炊爨。而乙緣崖上百尺之喬松取薪。失足墜地而氣絕。其父舁歸而洩灌其口。良久氣復。折兩臂傷兩明。塊然若一行屍。升木說上下無定位。高卑無定名。有下則必有上。無卑則安有高。因下以爲上。升高以自卑。高者卑之積。下者上之漸。恒乎高者。其高易卑。樂乎上者。其上可下。同衿川有萬松岡。即私淑齋舊業。松楸桑梓。不爲樵斧所害。每於公退之暇。以黃冠野服。往來逍遙。與村翁相農談。衿陽雜錄夫時世一田壤也。俗尙一燥濕也。士之處一世立功名者。無異農夫之蒔種。苟失於初。終未免下士矣。衿川之民。無居積。多冗費。由是冬初所收。已告罄。餒如秋蠅。衿陽雜錄貧民惜穀。播種甚踈。以待穀苗自茂。土腴則一粒所滋。多至二十餘莖。如此者得米少而不完。以理言之。旁莖餘孽。受氣不全故也。同私淑齋與其兄仁齋。自少俱有重名。徐建城謂仁齋曰。此君之子由。仁齋曰。兄非子瞻。弟安得爲子由。相與一笑。達城始見私淑齋於仁齋之第。時年才十五。才已老成。出虛白亭集取美薪

者善升木。安上而惡下。耽高而厭卑。不知高一分則危一分。去地遠而身返卑。以此誇於人。不亦愚乎。升木說私淑齋學問之暇。兼治醫術。父母有疾。遍閱諸方。手劑以進。行狀談論古今。霏霏如鉅屑。聽之終日不厭。同爲學研究典墳。貫穿經史。百家之言。搜抉無隱。其論議英發。使聽者亶亶忘倦。集跋私淑齋文章有家法淵源。先祖通亭以文顯於前。先大人戴愍公。趾美於後。先生與伯氏齊名一世。蔚然有蘇家之風。集序公詩文。比如富人之家布帛菽粟。如水火克箱積而溢。困廩用無窮而取不足。貧窶之人。積銖累鎰。營口腹之不暇。奚得潤厥身而發其采乎。同衿陽雜錄一篇。其諸穀品形樣之別。蒔種早晚之宜。先後用功之序。皆得其理。諸風卜農談農謳等篇。辨訂甚詳。而具述田家作苦之狀。同私淑齋詩文大篇春容。小篇要妙。出入莊騷。駕馭漢魏。同上或者見人之飽食啜茶。遽止之曰。此物傷元損真。不可食也。人笑啜而不止。或者怒其異已。呼於里曰。某將病矣。人節宣調適。氣益清健。是不知茶性蕩滌腥穢。不宜於虛。最宜於飽者也。私淑齋說我 太

宗幸松京。扈駕朝士皆寓民舍。有朝士二人。同一舍。乙帶所幸娼兒。甲帶呼爲嫂。而心欲之。夜備酒席。三人共飲。酒酣。甲曰。守長更。非戲謔難堪。吾先作一戲。乃入衾囊。使乙封紐。牽挽之。周匝房中。良久。乃請解紐。而出。語乙曰。在囊中甚悶。君亦能堪此歟。乙又入囊中。甲挽置僻處。與娼相合。於燭影間。主媪偵得。翌日。媪語乙曰。昨日之戲。甚非常。慎勿復爲。此聲頗聞。乙終身坎珂。私淑齋集宦海浩茫茫。欲渡無津梁。圭組爲錦纜。簪笏當牙樯。載彼萬種粟。孰不登其航。升沉自有數。利涉無定方。同都城仁王山。有白雲洞。中樞李念義舊居。私淑齋有詩云。白雲洞裡白雲陰。白雲洞外紅塵深。一逕盤回入雲中。忽驚城市藏山林。勝覽伽倻洞裡。怒浪噴風。聲如陣馬。私淑齋名其水曰吟風瀨。仍題詩云。濺沫跳珠急。驚瀾皺縠深。臨風看不足。泓下有龍吟。同南原府南有大母泉。私淑齋有詩云。一眼澄澄石底清。傳名祖母幾千年。雲仍變盡留餘澤。乳液清甘六月天。同伽倻山洞。口有一巨石。滑如磨礪。私淑齋題一絕于岩上云。鍊削千尋壯。雲生萬竇涼。冥頑

終不悟。屹立但蒼蒼。因名曰泚筆岩。同韓議政確。常惡人宿娼。李公克堪嘗爲議政書狀官。於路次。問曰。大人家畜數妾。而特惡人宿娼者。其有意乎。韓笑曰。惡人之趨禍也。昔有一重臣。分閫於外。請無賴子一人爲幕下人。恠其然。未幾無賴子犯軍輕律。軍吏推問其辭。即帳下稟之。主將判云。宜置極刑。軍吏退立屏間。以俟別旨。主將轉側帳中。作怨語曰。咄此惡少。偷我愛姝。軍吏以此知有宿嫌也。同玉不琢不成器。金不鍊不鑄劍。玉之用在器。而琢之必以沙石。金之用在劍。而鑄之必以爐炭。苟惡沙石。爐炭之麓。而耻居之。玉蘊於璞而已。金秘於鑛而已。安能成瑚璉。鑄龍泉。以爲奇寶哉。解嘲蘇紋蒸潤。灘瀨淙潺。烟朝月夕。氣像千億。石假性孝友。先考戴敏公。兄仁齋之病。親劑藥餌。朝夕供奉。至於身不解衣。目不交睫。碑序有嘲鸚鵡詩云。條金纏鎖隔籠紗。遍歷雲山入大家。爭似江湖一鷗鳥。月明隨意宿清沙。默用莊子龜寧曳尾之語。詩格姜希孟曰。宋朝朋黨之患。起於寇萊公。搏擊人物。其流之弊。雖程朱亦不免於黨。今觀年少氣銳新進儒

士日以搏擊人物爲事。弊將何如。苑筆姜晉山詩文典雅。天氣自熟。於國朝諸子中。最爲清絕。叢話南原府有廣寒樓。樓下有烏鵲橋。爲一府勝景。私淑齋有朱欄曲處。過牽牛之句。勝覽種法有十。曰備穀種。曰耕地。曰種麻。曰種稻。曰種黍粟。曰種稷。曰種大豆。小豆。菘豆。曰種大小麥。曰種胡麻。曰種蕎麥。○問答有五。曰農家。曰農談。曰農者對。曰諸風辨。曰種穀宜。○農謳有十四章。曰兩場若。曰捲露。曰迎陽。曰提鋤。曰討草。曰誇農。曰相勸。曰待饑。曰扣腹。曰望秋。曰竟長畝。曰水鷄鳴。曰日啣山。曰濯足。衿陽雜錄農家苗種之法。每水田十分。以一分養苗。餘九分擬栽苗。苗長一握以上。可移栽之。每一科栽不過三四苗。○種稻之法。既耕治以種。均撒水田中。以板耨覆種。灌水驅鳥。苗生三葉。以手耘。板耨俗名翻地。○農家以天旱苗枯。不可停鋤。古語曰。鋤頭自有百本禾。老農又有苗知人功之語。○農家欲知來歲所宜。以九穀種。各盛布囊。埋于土室中。後發取視之。則息最多者。其歲所宜也。○種豆之法。肥田種欲稀。薄田種欲稠。○種麥之法。預於收穀前用

長柄大劍。及草未黃時刈取。積在田畔。收穀訖。以其草厚布田上。火焚擲種。○荒地辨試之法。劬土一尺深。嘗味話者爲上。不話不鹹者次之。鹹者爲下。○種麻之法。冰解後擇良田耕之。縱三橫三。及撒種。曳耨覆種。麻長三寸許。有雜草則鋤之。○穀品有唐黍。本名葛黍。有盲葛黍。米者無芒。塾則盲者長。芒熟則赤。○穀種以受土氣之先後。有早晚損益。種之當及冰泮土融時。○耕地之法。荒地開墾。初耕宜深。再耕宜淺。○稻種甚多。別有一種早稻。一名山稻。偏宜於高地。又有冰折稻。無芒色黃皮薄。其性太早耳。甚聰。米白而軟。宜膏腴不渴之田。解冰初種之故。曰冰折稻。○凡穀初發穗。實在莖甲中爲水。日晝露滋。漸至堅牢。乃成爲米。東風善燥。莖中之水。遇風而燥。則損矣。○地多濕而腴者。宜種早。地多燥而剛者。宜種晚。土之濕諛者。地力旺。生物早。土之燥剛者。地力緩。生物遲。不審燥濕之別。早晚之宜。地力與穀性不相應。則苗不成矣。○大小麥隨熟隨刈。農家所望無過於麥。古語云。取麥如救火。若小遲緩。終爲災傷。衿陽雜錄東方之地。東南

接海。西爲曠遠。北有崇山峻嶺。拆而東蔽其勢。東北皆山。西南皆虛。風過海而至者温。故能爲雲雨長物。風過山而至者寒。故能瀉和而損物。何以知其然歟。嶺東之岷。當農而望東風者。以其風不過山也。諸風辨夫仕有三品。心存仁義。身佩道德。窮而善俗。達而化民。一身進退爲世輕重者。仕之上也。道德雖未合於聖賢。文足以飾治。武足以禦侮。進不隱賢。秉節不撓者。仕之次也。恭儉自度。謹守軌轍。斷斷休休。日計甫給者。仕之下也。農者對先儒謂。東北陽方。西南陰方。陽唱而陰和。則雨。陰唱而陽不和。則不雨。故風自東北則雨。風自西南則不雨。然長安西風而雨。則山川區域之分。氣候不齊。其間豈無變易其常理。吾東方每南風而大雨。西風而永晴者。亦未易曉也。諸風辨簪纓縛束。風塵眯眼。咫尺江湖。心往身滯。寄蔡子休書

姜孟卿

晉州人。通亭之孫。我世宗朝登第。所歷皆清要。事母以孝。官至領議政。諡文景。○孟卿爲相。我光廟幸其第。堂前有瓦甃數事。讓寧曰。此間得

無瓜子金乎。光廟曰。審知此家無瓜子金也。每於引見。深嘆公產業恬淡至此也。出私齋集爲相時。防納之禁既開。謀利者嗾守令。民所易備者。抑勒收價。民甚苦之。公極諫其弊。聽民自便。同上宣德間。牧隱之孫文烈公季甸。赴燕京。朝罷出掖。主客郎中請賦早朝詩。文烈窘甚。書牧隱早朝大明宮詩。大關明堂曉色寒。旌旗高拂玉闌干。一律示之。主客大加稱賞。後通亭之孫文景公孟卿。將赴京。文烈戲曰。奈如華士試文何。文景應聲曰。吾家亦有通亭集。滿坐絕倒。詩話爲相時。我光廟幸第。御楹前。仰視屋宇曰。急撤蠹楹。恐傷於人。首相之第如此。茲不亦美乎。碑序

姜謙

晉州人。字謙之。觀察使子平之子。爲人正大有節操。我成廟庚子登第。選入弘文館。累遷至正郎。燕山戊午。史禍起。杖流遠地。後官至司藝。

姜訶

晉州人。字訶之。謙之之弟。爲人寬平厚直。又有志節。我成廟朝登第。官

至大司諫。燕山甲子被殺。中廟初命贈吏曹叅判。

姜渾

晉州人。字士浩。號木溪子。我成廟丙子早登第。工文章。燕山朝為丞旨。燕山喪其嬖姬悼甚。令群臣誄之。渾作祭文而進。頗得幸。為士林所賤。後叅靖國功臣。官至判中樞府事。謚文簡。○姜渾自知名當世。被寵于燕山。因經術以文亂政。阿諛取容。及燕山廢。以都丞旨草赦文。輒書輒抹。終不成文理。時人稱狐魅之文。暮夜得肆。遇明自沮。陰崖雜記

姜景叙

晉州人。字子文。號草堂。我成廟朝登第。又捷重試。天性清直慷慨。燕山戊午。杖流會寧。後放還。官至左副丞旨。有草堂集一帙。後追贈禮曹叅判。

姜應貞

恩律人。自號中和堂。知中樞府事毅之子。年十七。父母遘疾。常侍藥終夜不寐。取糞嘗之。焚香禱天。請以身代。及歿。廬墓盡禮。不食鹽菜。○少遊太

學。與申從濩朴演鄭敬祖康伯珍權柱諸公。月朝講論小學。皆一時名士。世之不悅者喧之。至有四聖十哲之譏。師友錄

張繼弛

我英廟朝登第。理學精博。又有操行。官至成均館司成。嘗論鬼神之理曰。人之始死有鬼神。久則無鬼。

大東野乘卷之二十終

大東野乘卷之二十一

海東雜錄三

(未詳)

本朝 朴子安

咸陽人。我太祖朝。慶尙全羅都按撫使朴子安。應接降倭。失誤軍機。罪斬。已移書誅之。以事干彼賊。秘而不宣。人莫得知。其子實聞之。詣太宗。痛哭請活。太宗心傷之。欲與宗親俱詣以請。諸宗親曰。此國家秘事。上若問從何得聞。則何事以對。太宗曰。刑人殺人。國之大事。外人豈有不知之理乎。令內宦曹恂入啓。太祖初聞之。怒曰。汝等以子安無罪乎。俄而命中樞院曰。予欲末減子安之罪。急召善射。持印移送文書。中樞院以沈龜壽啓。即命曰。汝盡力疾馳。及救子安之死。龜壽受命疾馳。中路墜馬。令驛吏代送文書。書到之日。官欲刑子安。染其面。褫其衣。刀刃已具。

忽望之。有一人馳來。以笠揮之。官恠之。停刑以待。子安得不死。實本無學術。又非武藝之人。太宗賢其救父。使掌禁旅。位至三品。雜記

魚有沼

忠州人。射御絕倫。魁武舉。我光廟朝。征李施愛。討建州衛。叅敵愾。佐理兩功臣。官至贊成。封藥城君。諡貞莊。○魚有沼之遠祖重翼。本姓池也。生而體貌奇異。彎弓百鈞。膝下有三鱗甲。及長。仕高麗王太祖。時人咸稱某有三鱗甲。非常人也。太祖見之曰。汝有鱗甲。乃是魚也。仍賜姓魚。成化丁亥。李施愛反于北道。魚有沼奮勇先登。策功第一。天朝有夾攻建州衛野人之命。有沼爲右大將。直擣巢穴。斬馘無算。斫樹白而書之曰。某年月日。朝鮮大將魚有沼滅建州而還。天兵後到。見白書。聞于帝。帝嘉之。降勅。賜銀五十兩。緞絹各四疋。方其旋師也。虜驍騎數千衝突。我軍披靡。有沼瞑目而出。戒士卒。毋得相從。單騎馳射。連發殪之。賊驚潰。有野人舉部潛移他處者。朝廷恐生他變。特遣有沼慰安之。以有沼曾爲北道兵使服。

其心也。有沼倍道而進。先使人於其部。開視教書。野人初不信。曰。誑我輩也。遂投書于地。使者曰。魚令公來矣。野人曰。令公果來乎。令公來則是我父也。可得見之乎。有沼聞之。馳入其部。虜皆羅拜。有沼開誠撫諭。皆悅服。歸命。遂率其酋長。而使居舊地。以康純魚有沼爲大將。與李施愛戰于蔓嶺。賊乘高據險。矢下如雨。我軍不得上。魚有沼以小舟載精兵。着青衣與草木同色。攀木緣崖。繞出上峯。鼓噪。賊潰散。走吉州。本州人許由禮誘擒李施愛。施愛合來降。斬于陣前。傳首京師。雜記

魚變甲

咸從人。字子先。我太宗朝登第。大提學鄭以吾以考官入試院。夢占一詩云。三級風雷魚變甲。一春烟景馬希聲。雖云對偶元相敵。那及龍門上客名。果擢第一官。至集賢殿直提學。以母老。棄官歸養于咸安。棄官歸養。不治產業。舊有殖貨契券。悉取而焚之。行狀與申檣友善。相約曰。吾等事君盡忠。苟得名遂。須歸養老親。及入集賢殿。每歎曰。事君日長。事親日短。

及得腰下塞澁之證。即呈辭願就家鄉。沐溫泉治病。上教政院曰。此人終必可用。待病差速啓之。公乃行至家。作詩曰。謝病歸來一室幽。荒涼草樹古池頭。若余豈避功名者。只爲慈親不遠遊。後申檣累官至叅判。謂公之子孝瞻曰。余與乃翁密約歸養。乃翁決意而歸。余則負約多慚。權贊成躡謂人曰。我國辭爵祿者。許判尹周與魚某也。公旣歸。父母俱存。兄弟無故。朝夕甘旨。日以娛悅。親心爲事。朝議惜其行義。授金海府使不起。又以司諫徵之。竟不就。以終。東閣錄自左正言。爲忠州判官。時公之父淵。以前河陽縣監置散。變甲上疏陳情。請代已職。太宗許之。陞淵二階。除本職。同上嘗爲獻納。同列將上疏論劾。鷄林府尹尹向。而事涉曖昧。公不署名。曰。吾於其時。適在尹公所。詳知此人必無此事。敢虛捏以陷人乎。遂奮袂而起。坐罷。同上鳥嶺有龍湫。其深不可測。魚變甲有詩云。龍動盤渦靜。滿天明月新。晴雷白虹瀉。恍惚孰窮神。勝覽魚變甲家鴿爲猫所害。作傷家鴿一絕云。雌愛其雛雄愛雌。响响如保主人慈。一朝相繼填猫喙。未謹樊籠終咎誰。

稿世

魚孝瞻

咸從人。字萬從。變甲之子。我世宗朝登第。備歷館閣。上風水疏。官至判中樞府事。性剛直廉潔。諡文孝。嘗在憲府。前此府例置小宇。叢掛紙錢。相聚而瀆祀之。凡新除官亦必祭之。公令撤紙錢焚之。痛絕其祀。曰。安有憲府而瀆祀無名之鬼乎。自後凡所歷官府。皆焚毀之。行狀自幼端凝。不妄游戲。循循然如成人。見者皆知其遠到。上同為文章。詳切委曲。辭意俱到。尤長於疏議。然不敢輕出。及至下筆。滔滔不竭。上同丁母憂。哀毀過禮。居廬三年。足不出洞門。服將闋。又丁祖母喪。情禮有加。鄉黨稱為孝純之門。上同在集賢殿。進講禮記。仍博採諸家要說。解釋該貫。名曰禮記日抄。我文廟徵之入內。藏之本館。上同嘗判吏曹注擬。以公有舊相識者。潛行投謁。公反書紙尾曰。天知神知我知子知。寧無慚懼。君去休矣。遂絕之。上同嘗辨論山家地理說之非。上疏極陳。後葬父於家園之側。母歿。與先君同域。及卒。子

世謙世恭葬於廣津。亦不擇地。家法如此。苑筆魚孝瞻昏厚。我光廟嘗戲曰。魚孝瞻淳厚人也。上同金月川吉通嘗為吏曹正郎。魚孝瞻時為集賢殿校理。有一朝士。設宴以邀吏郎。魚不知之。先就其第。杯盤草草。無下筋處。既而金至。則饌具如獐肝等味。極其芳鮮。魚舉動寬緩。徐執筋攝肝曰。吾亦喫吏曹肝也。蓋鄙其為人也。劇談疾於敬德。而勿聽無稽之言。以天命為主脉。以民心為按對。水論風說正統間。有地理說者。建言當於宮城北路築堵作門。且於城內補土為山。明堂之水。禁投穢物。魚孝瞻上疏極言不可。我英廟覽而嘆賞之。雜記魯山幼冲嗣位。光廟為領議政。以宮內孤虛繼嗣為重。從權納妃脫服即吉可也。魚孝瞻為禮曹叅議。抗議。納妃雖以宗社大計不得已而為之。短喪有何不得已而強為之乎。條辨不少屈。竟不見用。上同

魚世謙

咸從人。字子益。文孝公孝瞻之子。我光廟朝登第。氣宇倜儻。叅翊戴功。

臣久典文衡。官至左議政。嘗奉使到遼東。三大人爲公設筵。公揖而不跪。御史云何不跪飲。公曰我奉國命。來朝京師。諸大人特設筵慰我。我焉得跪飲。竟不屈。行狀既疾病。內醫來診曰宜灸。公曰七十稀壽。政丞極品。二者得兼。復有何冀。而必灸求活哉。遂卒。行狀公因祀事。往懿墓齋室。因感周太子晉之事。乃作招子晉辭。以寓悲。世稿御屏畫古十賢后。一曰周文王后妃。二曰周宣王姜后。三曰齊華孟妃。四曰楚樊姬。五曰漢班婕妤。六曰馮昭儀。七曰漢馬皇后。八曰唐長孫皇后。九曰宋光獻曹皇后。十曰宣仁高皇后。魚世謙皆有詩記之。同香凝鵠卵黃膚皺。嫩入金薺雪縷紛。黃橙

魚得江

咸從人。字子游。號灌圃。又稱渾沌山人。燕山朝登第。性真率恬澹。又善談諧。我中廟朝爲大司諫。棄官歸鄉。終不起。所著有東洲集。嘗守曲江。作詩謝故人惠飴糖云。甄城風土好飴糖。貢篚年年進上房。還恠東州無此物。三年始賴故人嘗。完山人善造飴糖。他郡莫及。年年上供。俗稱完山之飴。出適丁外憂。廬側構一堂。扁曰寓愛。以爲節日奠祭之所。金慕齋題詩兩絕以誌之。集本魚子游與語。雜以謔浪。有人傳言。鄭某拜文學而去。魚輒應曰。吾曾爲文學。何以云鄭爲之。左右恠問之。魚曰。文學子游子夏。聞者絕倒。言子游性真率無威儀。居處淡泊。禪室不如也。丙錄丁守曲江郡。因友求墨有詩云。習氣年來苦未痊。又於東海制魚烟。一年三度剗鯨腹。揮筆還慚不直錢。取鯨油烟爲墨。故云魚烟。適效王禕贈著器物銘二十首。曰冠帶履枕衾帳笥。鼎鏡櫛尺印觚琴。櫃榻劔屏。花外綵繩。搖月影。柳邊紅袖。競春風。鞞鞞

韓明滄

清州人。字子濬。政堂文學尙質之孫。少落魄不振。與權擘輩同遊。年近四十。始筮仕。落落不偶。贊我光廟。三爲領相。四首麟閣。章順恭惠兩王后皆其女也。諡文成。常居帷幄。密贊機政。我光廟每日。韓明滄吾之子房也。續權吉昌擘與韓上黨明滄爲布衣交。有忘形之分。權有小婢。姿色